



~~26~~

20





DE LOCIS
S. SCRIPTURAE
HEBRAICIS

ANGELI CANINII
COMMENTARIUS,
ET ANTONII NEBRISSENSIS
QUINQUAGENA.

Nunc primum simul emendatiùs edita.

ACCESSIT GASPARIS VARRERII
LVSITANI DE OPHIRA REGIONE


in Sacris litteris Disputatio


Ad Cl. V. BALTHASAREM SVNIGAM,

Regis Catholici in Belgio Legatum.



ANTVERPIÆ,
SVMP TIBVS VIDVÆ ET HÆREDVM
IO. BELLERI, sub insigni aquilæ aureæ.
ANNO M. DC.





AMPLISSIMO VIRO

BALTHASARI

SVNIGÆ, REGIS CATHO-

LICI IN BELGIO ORATORI,

GASPAR BELLERVS S. P. D.



TOLEMAEVM Philadelphum

Ægypti Regem memoriae proditum est, ut te non fugit, ampliss.

SVNIGA, Hebræorum doctissimos, senos è singulis tribubus

Hierosolymis Alexandriam euocasse, qui sacras litteras Græco sermone redderent; Vocanturque hodie rotundo numero Septuaginta Interpretes. Sapiebat nimirum rex ille, qui diuino Bibliorum thesauro, Bibliothecam, quam instrueret, carere nefas duceret. Idem exemplum parentum memoria secutum fuisse video è Diui Francisci familia sodalem, Fran. Ximenium Archiepiscopũ

EPISTOLA

Toletanum, & S.R.E. Card. Raro enim & inu-
 sitato Principibus exemplo, condita recens Aca-
 demia Complutensi in Carpetanis, atq; adeò Hi-
 spaniæ vmbilico, non hic eius beneficentia immor-
 talitate digna substitit, sed & maiora & illius
 penè propria aggressus est. nam ut ijdem Aca-
 demiae alumni Theologiam non è turpidis sed pu-
 ris fontibus haurirent Gymnasium trium lingua-
 rum eruditarum instituit, quibus linguis Christi
 crux inscripta Euangeliumque per totum terra-
 rum orbem propagatum, ab Hebræis ad Græcos,
 hinc ad Romanos, ubi fixum habet domicilium,
 penetravit. Mox Biblia illa euulganda incredibili
 sumptu curauit, quæ summam in Ecclesia Catho-
 lica, diligentiae fideique nomine obtinent aucto-
 ritatem, & in Rēgijs illis Philippi II. Regis Ca-
 tholici auspicijs nuper editis, expressa videmus.
 Accitis igitur Undique primum vetustis exem-
 plaribus calamo in membrana exaratis, cū He-
 bræis tum Græcis, partim è media Græcia ac Sy-
 ria, partim è Vaticana Romæ Bibliotheca, bona
 cum Leonis X. Pont. Max. venia: dehinc doctis
 hominibus euocatis non Theologis modò, sed &
 lingua

DEDICATORIA.

linguarum peritis, opus opinione celerius absoluit,
 & in omnium oculis, tanquam in claro lumine
 collocavit: magno sanè Ecclesiæ commodo, ut his
 Biblijs Theologi plurimum se profecisse indies
 ingenuè fateantur. horum in numero fuerunt De-
 metrius Cretensis, Ioannes & Franciscus Ver-
 garae fratres, domo Toletani, & hic Ælius An-
 tonius Nebrissensis Antiquaria in Baticis
 oriundus. Is cùm Bononiæ in Hispanorum col-
 legio, quod Ægidius Carillus Albornotius Car-
 dinal. suæ genti excitavit, studijs operam de-
 disset, non tam Iuris Ciuilis scientiam, quàm
 Latinam Linguam (qua nimis diu patriam,
 Maurorum armis afflictam, carere dolebat)
 gratus ciuis inuexit, & profligata barbarie La-
 tinum sermonem instauravit, hoc trophæis meritò
 adscripto elogio:

Barbarie pulsa popit hæc Antonius arma.

Tandem è litteratore Rhetor, cùm de supe-
 riore loco diu Doctoris personam sustinuisset,
 Regum Catholicorum historicus renunciatur:
 quorum etiam res in Nauarraeo regno præclare
 gestas, litterarum, ut illa ferebant tempora mo-

EPISTOLA

numentis, mandauit. Idem natu grandior sanctæ linguæ non ignarus, & à sacris, ut Christianum decet hominem, minimè abhorrens, in sacris Biblijs Præsulis auctoritate elaborare iussus est. Quo in munere dum se exercet gnauius, tres sibi Quinquagenas, hoc est, capita observationum è Sacra Scriptura quinquaginta scripserat: quarum due priores, incertum an temporum iniuria, an hominum incuria interciderunt; tertia salua ad nostram usque ætatem peruenit. Hanc longè emendatiùs quàm olim Illiberitani, qui hodie Granatenses sunt, nunc nominis tui auspicio euulgamus unà cum Angeli Caninij Anglariensis raro nimis, sed aureo libello, De nominibus Noui Testamenti Hebraicis: quem Lutetiæ olim cum Syriacæ linguæ institutione ediderat, post Hellenismos aureum verè librum & Simplicij in Epiætetum commentarium Latina ciuitate donatum. Coniungere autem visum fuit, quod, nisi me fallunt omnia, Theologis iuxta atque Ecclesiasticis utilissima fore confidam. Adieci & Lusitani hominis eruditi, Gasparis Varerij de Ophira regione in tertio Regum libro

commen-

DEDICATORIA.

*commentarium, quam Peru, seu Piru esse ple-
rique autumant, unde aurum ædificando Salo-
monis templo sit aduectum. Quo de loco Varias
etiam repugnantes doctorum hominum senten-
tias ex Abr. Ortelij Geographico Thesauro colle-
ctas, ut symbolam quoque contulisse videremur
adiecimus, quem quidem laborem, ut, qua es
humanitate propè singulari atque doctrina præ-
ditus, æqui boni facias iterum atque iterum rogo.
Sic fiet ut diligentiae atque industriæ fructum,
abundè tulisse videar. Vale.*

A 4

INDEX



INDEX CAPITVM.

- De nomine Iesu & Ioua.* Cap. I.
De omnibus Dei nominibus, & quomodo Arabes & Æthiopes Deum nomenclant. Cap. II.
De מַלְאָכִים apud Micheam, & Nequaquam minima es, apud Matthæum. Cap. III.
De Hosanna. Cap. IV.
De Amen. Cap. V.
De Rabbi, Rabboní, & cæteris. Cap. VI.
De Raca, Mamona, & Concilio. Cap. VII.
De Publicanis. Cap. VIII.
De Camelo per foramen acus. Cap. IX.
De Effathá. Cap. X.
De Mamona, & locutionib. quibusdã. Ca. XI.
De Dimitte nobis, & alijs. Cap. XII.
De Messia Maria, & omnium Apostolorum nominibus. Cap. XIII.
De Pane quotidiano, in oratione Dominica. Cap. XIII.

LOCI

LOCI ALIQVOT NOVI
TESTAMENTI CVM HE-
BRÆORVM ORIGINIBVS COLLATI
atque historicè explicati ab ANGELO
CANINIO Anglariensi.

DENOMINE IESV, ET IOVA.

• CAPVT I.



THOMINES nostri linguæ Chal-
daicæ cognitionem noui quoque
Testamenti studio conducere, ac
multum ornamenti atque adiumē-
ti pijs conatibus afferre intelligant: locos ali-
quot in medium proferemus, quos nemo hu-
ius linguæ ignarus assequi penitus potest.
Eam tamen adhibebimus præfationem, ne-
quis nostræ religionis mysteria ac dogmata à
sanctissimis doctissimisque viris, qui Chal-
daicè nesciuerunt, ignorata fuisse de nostris
verbis existimet. Nec enim hîc de sublimi-
bus adeò agemus quæstionibus: sed locos
quosdam, quod ad institutum nostrum atti-
net, pressius tractandos, atque accuratius ex-
plicandos proponemus: Idque historicè fa-
ciemus ac simpliciter quantum è linguæ He-
braicæ atque Syriacæ, quas à teneris annis ar-
dentissimo sumus studio complexi, proprie-
rate vsûque intelligere potuimus. Nam si, vt
Demosthenicam dictionem, & Homeri sen-

tentiarum atque verborum maiestatem inspiciamus, totam linguam Græcam, quæ cum laboriosius, tum maiore temporis iactura cognoscitur, ediscere non piget: videndum est, ne turpe homini Christiano sit, Christi verba minoris facere, quàm Homeri aut Demosthenis: cum illa præsertim iucundissima pios animos voluptate afficiant; hæc aures modò demulceant. Sed iam instituta perficiamus, si vnum id lectorem monuerimus, ut non authoritatem, nec personam, sed rem ipsam intueatur, quæ rectè intellecta luminis aliquid sacrarum literarum studijs afferre potest. Cum enim sacris scriptoribus ea deferenda sit authoritas, ut, quamvis ratio nobis non constet, verissima tamen esse, quæ dixerint, credamus: sic ceteris tantum habendum est fidei, quantum rationibus & argumentis probare atque efficere potuerint.

Primùm itaque de sanctissimo nomine *Iesu*, quod indignè à quibusdam laceratur, atque è suauissimo absonum ac penè monstrosus efficitur, tum de *Hosana*, *Amen*, *Rabbi*, ac cæteris eiusmodi disputabimus: cū ut quæ perfectè hætenus explanata non sunt, conferendis priscorum authorum sententijs dilucidius è sua origine exponamus: tum ut superciliosam quorundam doctrinæ ostentationem cum summa incitia coniunctam re-

tunda-

tundamus. Qui maximam peregrinarum linguarum scientiam iactare & venditare solent, atque petulantissimis verbis D. Hieronymū ac nostros homines proscindere, vt qui inscitia lapsi persæpe vel malè interpretati sint, vel non intellexerint linguam Hebraicam. Cū si conferantur in vnum isti omnes, D. Hieronymi instar futuri non sint. Cæterū ne cōuicijs potius, quàm rationibus agere videamur, iam nomen mirificum Iesu explicare incipiamus.

Putat Osiander homo doctus & ingeniosus (sed cuius diligentiam in linguis peregrinis tractandis desiderare cogor) & verbosa disputatione persuadere omnibus conatur, nomen hoc יהושׁה Iehesúh scribendum esse, vt literas omneis nominis Terragrammati habeat, eaque in re magnum credit inesse mysterium: alibique de Christi maiestate aliquid detractum iri contendit. Nos verò, nisi Cabbalistarum nugas in Christianam religionem admittere volumus, nec in literis יהוה Iehouá, nec ישׁוע Iesuá magnum aliquod mysterium ponimus: sed in virtute atque omnipotentia Dei, quæ nullis literarum figuris exprimi potest, Mysteriorum vniuersam abyssum esse credimus. Verū capita argumentorum eius colligamus, quæ quàm vera sint, mox apparebit.

Princi-

Principiò ait nomen *Iesu* in libris alicuius authoritatis יֵשׁוּ *Iesu* scribi.

Tum putat non esse ferendum, יֵשׁוּ, sine litera Aain scribi, si Thema esset יֵשׁע, ut nos credimus.

Deinceps è verbis Matthæi & prophetæ Esaïæ argumentatur, quæ, si Christus vocetur יְהוֹשֻׁעַ *Iehosua*, non rectè exponerentur. nam, si linguæ proprietatem penitus introspectias, non tam *saluatorem*, quàm *saluandum* significare.

Præterea aliud *Iesu*, aliud *Iosue* esse existimant.

Postremò apud Arabes bisyllabum scribi, & cum *Iesu* conuenire ait.

Tum, ne Iudæis inuideamus, literas quasdam interijcit, noménque, quod simplicissimum ac diuinum est, prodigiosum facit, ut nec Hebraicum sit, nec quicquam prorsus significet.

Hæc omnia commentitia esse mox ostendemus. Quod quò planius intelligi possit, primùm quid sit יהוה *Iehoua*, videamus. Verùm animaduertendum est, hoc nomen יהוה *Iehoua* vel *Ioua*, quod Hebræi vocant שֵׁם אַרְבַּע אֲהוּיֹת *scem leel arbâa othijóth*, nomen quatuor literarum, vel *Tetragrammaton*, quod quatuor literis Iod he vai he constet, aliter à Iudæis pronunciari, quàm scribatur.

Aiunt

NOVI TESTAMENT.

Aiunt enim suos maiores ab ipso usque Mo-
 se, cui primùm traditum est, semper pronun-
 ciare solitos *Adonái*, quod est Dominus:
 Deo tamen soli tribuitur, ut *Adon* quemlibet
dominum significat. Septuaginta certè Inter-
 pretes, & Apostoli atque Euangelistæ omnes,
 quod Hebraicè scribitur יהוה Ioua, κύριος,
 hoc est, *dominum* perpetuò reddunt. Quod
 illa ostendunt, באב יהוה לאדני, Neùm Ioua
 ladoni, *Dixit Ioua Domino meo*, Psalm. 110.
 quod Græci scribunt, εἶπεν ὁ κύριος τῷ κυρίῳ
 μου. Et, שמע ישראל יהוה אלהינו יהוה אחד,
Scemáa Israél Iehouá elohénu Iehouá chád,
 Deut. 6. Quod Euangelistæ, ut Septuaginta,
 vertunt, ἀκούε ἰσραὴλ, κύριος ὁ θεὸς ἡμῶν, κύριος
 εἰς ἑν. *Audi Israël, Dominus Deus noster, do-*
minus vnus est. Vbi vbi præterea in nouo Te-
 stamento κύριος vel *dominum* leges, absolutè
 intelligendum est יהוה Iehoua, vel אדני A-
 donái: cùm, ut diximus, Hebræi vtrunque
 eodem modo pronuncient *Adonái*: nisi quòd
 Iehoua vocitant אדנא Adqerá, quod est
memoratio, quasi symbolum mnemosynúm-
 ue dixeris: nempe quòd debeamus hoc no-
 mine audito Dei omnipotentiam in mentem
 reuocare. *Adonái* autem nominant ודאי va-
 dái, hoc est *manifestum*, quoniam vnique
 sanæ mentis homini manifestum est, Deum
 rerum omnium dominum esse ac moderato-
 rem.

rem. Ego itaque, cùm præsertim authores habeamus Apostolos, idque Ecclesiæ consensus receperit, nomina immutanda nō censerem. Nam si *dominum* vocemus, planissimè omnes intelligent: Si malimus *Ioua*, cauendū est, ne indocti offendātur nominis nouitate. Sed ad propositū reuertamur, quidq; id nomen etymologiæ ratione significet, explicemus. Nullū enim nomen Hebraicum Syriacūue est, cuius etymon aliquod è Themate & grāmatica analogia reddi non possit. Quædā porrò composita sunt, sed sic, vt faciliè radices omnes distinctæ cernantur, vt Gabriél, Melchisédec, Israël. Abraham quoque, quod difficilius resoluitur, componitur, vt scriptura docet, Gen. 17. ex אב Ab pater, רב rab *magnus*, & חמון hamon *multitudo*, quòd magnæ multitudinis pater futurus erat: sed quia nimis durum atque asperum nomen esset, si diceremus אברהמון Abrabhamon, eliditur b: n enim ad thema non pertinet, ac euphoniæ caussa pronuntiatur & scribitur אברהם Abraham. Sunt tamen quædam Babylonica, Ægyptiaca, Persicæque atque aliarum nationum propria nomina, quorum etyma è suis quæque linguis petenda sunt. Nomen certè *Iehoua* simplex est, facilèmq; etymi habet rationem. Nam thema יהוה Hebraicè atque Chaldaicè significat *est*, vel *fuit*: cui præfixa

litera

litera Iod nomen deriuatum format יהוה Ie-
houá. vt à צחק *sahac risit* fit יצחק Ishác, & à
עקב *acab supplantauit* יעקב Iacob. *Iehoua* ergo
significat, *Qui est*, vel, vt Platonice loquar
τὸ ὄν, aut αὐτὸ ὄν, *Ipsum Ens*, vel *Essentia Ideam*:
quam Dionysius vocat τὸ αὐτὸ εἶναι. Philoso-
phi interdum nomināt τὰ γὰθόν, vel αὐτογα-
θόν, *ipsum Bonum*, vel *Ideam bonitatis*. Huc fa-
cit, quòd Aristoteles siue Theophrastus in li-
bro de Mundo ait, supremum deorum om-
nium διὰ appellari à ζεὺς, nempe δι' ὃν ζῶμεν,
propter quem viuimus, quòd ipse omnia ve-
getat atque viuificat. Hesiodus quoque in
eandem sententiam cecinit in ἔργοις,

Οντε διὰ βροτοῖ ἀνδρες ὁμῶς ἄφατοί τε φάλοί τε,
Ρήτοίτ' ἄξιητοί τε διὸς μεγάλοιο ἔκκῃτι.

Omnium authorem Iouem esse indicans.
Quin etiam ipsa scriptura planissime etymon
exponit, cùm Deus Mosi mandata dans, quis
esset, docet his verbis, ויאמר אלהים אל משה
אהיה אשר אהיה ויאמר כה תאמר לבני
ישראל ואלהיה ואלהיה ואלהיה ואלהיה ואלהיה
Vaiiomer Elo-
hím el Moscè Ehiéh ascér ehiéh vaiiomer
còh thomár libné Israël Ehiéh scelaháni
alechém.

Et dixit Deus Mosi, *Ego sum quisum*. Sic di-
ces filijs Israël, *Sum misit me ad vos*, Exod. 3. Ex
quibus verbis dilucidè ac simpliciter etymo-
logiam nominis habemus. Cùm enim Mo-
ses

ses Dei primum imperiū detrectās scire eius nomen, si id forte populus quæreret, ad quē legabatur, perciperet: Respondit Deus se eum esse, *qui est*, hocque suum nomen esse. Deus quippe solus absolutè est, cetera omnia, quòd sunt, Deo acceptum referre debent. Iam ergo planum fecimus, simplicem esse nominis huius significatum, ut interim omittamus acutissimè ineptas Iudæorum tricas, qui simplici sententia, hoc est historica veraque neglecta, confectantur quod nusquam est, ut apud indoctos eruditionis atque acuminis gloriam aucupentur: à doctis certè & prudentibus temeritatis atque impudentiæ opinionem reportant. Sed prætermittere non possum, quod apud Macrobiū, multæ ac reconditæ doctrinæ hominem, Sat. lib. i. cap. 18. observavi: qui cū deorum omnium nomina ad vnum Deum referre vellet, hunc Orphei versiculum citat,

Εἰς Ζεὺς, εἰς ἄδης, εἰς ἥλιος, εἰς δῖον υἱος

Bacchus, Sol, Orcus, & Iuppiter unus & idem.

Huius, inquit, versus autoritas fundatur Oraculo Apollinis Clarij, in quo aliud quoque nomen Soli adiicitur, qui in eisdem sacris versibus inter cetera vocatur *ἰάω*. Nam consultus Apollo Clarius quis deorum habendus sit, qui vocatur *ἰάω*, ita effatus est;

Ὅργια μὲν δ' ἑδ' αὖτε εἰς χρεὶν ἡ περὶ θεῶν καὶ θεῶν,

Εἰ δ' ἀπὸ τῆ παύρῃ σύνεσις καὶ νῦν ἀλαπαδνὸς.

Φράζω τῶν πάντων ὑπατον θεὸν ἔμμεν' ἰάω.

Quorum versuum hæc est sententia,

Orgia qui norunt, arcana recondere par est.

Fraudē mentis inops agitat, quē inscitia versat.

Diuorum summum cunctorum en accipe Iao.

Nam quid aliud quæso per *Iao* intelligemus, quàm *Iouas*? Nam v consonante Græci carēt, vt δᾱος ostendit, quē *Dauum* Latini vocant, vt οἷς, ouis, δῖος, diuus. Sic fecerunt ex *Iao* *Iouem*.

Quanquam reclamant Grammatici, qui à *iuuando* dictum volunt. Nec mirandum est, quī fieri potuerit, vt nomē hoc, quod Hebræi nemini præsertim peregrino cōmittebāt, à Græcis cognosci quīuerit: Cū oracula illa cacodemone magistro ac duce instituta & celebrata fuerint. Is porrò nomen illud non ignorabat.

Sed eò, vnde discessimus, reuertamur, cū iam ostenderimus simplicem ac germanā huius nominis significationem, non cabbalisticam neque commētitiā. Id quod faciendū est in sacrosancto nomine *Iesu*, quod Hebræicè dicitur יֵשׁוּעַ *Iesúa*. Id in sacris Biblijs aliquoties legitur, quod ignorasse videtur Osiander, qui semper scribit יהושע *Iehosúa*, negans *Iesu* vllō pacto idem esse, quod *Iosue*. Nos scimus summum sacerdotem filium Iosadac יֵשׁוּעַ *Iesúa* appellatum, atque eundem יהושע *Iehosua*. Nomen itaq; vtrumque vnū

idémque est: nisi Osiandro plus fidei, quàm Ezræ atque Nehemię volumus adhibere. Ille contendit idem non esse vtrunque, hi probant. Qua in re suam in sacris literis tractandis somnolentiam atque oscitantiam prodit, qui ex vno scripturæ loco, qui mos sciolorum est, *ἵνα μὴ τοιαύτότερον εἴπω*, probare se, idque contra omnium sententiam, quod semel in animo insedit, posse existimat. Nos verò non è somnijs nostris, sed ex usu & sermone prophetarum idem vtrunque esse asserimus. Nam sacerdos ille summus, qui cum Zorobabele è Babylonia cum cæteris exulibus in Iudæam redijt, ab Haggæo & Zacharia semper nominatur *יהושע בן יהוצדק* *Iehosua filius Iehosadac*, quem eundem Ezras & Nehemias vocant *ישוע בן יוצדק* *Iesua filium Iosadac*, detracta litera he: non vt hoc nomen litera vna tetragrammati defraudarent, sed ob linguæ Syriacæ proprietatem, de qua mox agemus. Constat enim Ezriam & Nehemiam historiam scripsisse, cùm Iudæi iam ab exilio Assyriaco reducti essent, & lingua Syriaca loquerentur. Vulgò autem vocabatur *ישוע*, cùm docti scriberent *יהושע* *Iehosúa* more Hebræorum. Sed ne quisquam hæc à nobis confingi putet, verba Haggæi. 1. exponamus, qui ait, *היה דבר יהוה ביד חגי הנביא אל, זרבבל בן שאלתיאל כחת יהודה ואל יהושע*

:בן יהושדק הכהן הגדול לאמר: Haiáh deuvár
 Ichouá beiád Haggái hannauíel Zerubbauél
 ben Schealthiel ben páhat Iehudáh veel Ie-
 hosúa ben Iehosadac haccohén haggadól le-
 mor. Hoc est, *Factū est verbum domini in manu*
Haggei prophet. ad Zorobabel filiū Salati'el Prin-
cipem iuda, & ad Iehosúa filium Iehosadac sacer-
dorem summum, dicens. Atque eadem ortho-
graphia in toto vaticinio vtitur, vt Zacharias
quoque. Confer nunc Ezram & Nchemiam,
qui eodem seculo vixerunt, déque iisdem
hominibus locuti sunt. Ezræ. 2. sic scribitur,
 וַיָּאִיָּאֵם בֶּן יִשׁוּעַ בֶּן יִשׁוּדָק וְאַחֵי הַכֹּהֲנִים Vaiácom
 Iesúa ben Iosadac veehau haccohánim. *Et*
surrexit Iesus filius Iosadac, & fratres eius sacer-
dotes. Lege totum Nchemiam, sempérque
inuenies יִשׁוּעַ Iesuá, יְהוֹשֻׁעַ Iehosúa nun-
quam. Quinetiam in 2. Paralip. 31. quorum
author Ezras fertur, scribitur, יִשׁוּעַ Iesuá:
Nempe quòd hi omnes libri post exilium
Babylonicum conscripti sunt. Ostendimus
itaque non errasse veteres patres, qui vtrum-
que Iosue vel Iesum tam ducem, quàm sum-
mmum sacerdotem, vt nomen, sic etiam Chri-
sti typum gessisse autumant. Ob id enim Ie-
sus vocatus est Mefsias Christúsue, quod est
vnctus: quoniam & rex & sacerdos, qui soli
vngebantur, fuit. Quin etiam Angelus Matt.
1. disertè ait Iesum nominandum esse, quòd

salutem populo suo allaturus erat . Id autem significat etymon *Iesu*. Quæ ergo impudentia est, contradicendi studio adductum, suam sententiam, quæ solis coniecturis, iisdemque incertis nititur, alijs omnibus insolentissimè anteponere? In Thalmud certè *Perrec Merubbe* sic legimus, אִיקלְעוּ לְבֵי יִשְׂרָאֵל *peruenerunt ad domum redemptionis filii*. Nam scholiastæ *Iesum* יִשְׁרָאֵל *redemptionē & salutem* interpretantur. At ex propheta, qui cap. i. ait vocatum iri *Emmanuel*, argumentatur *Osiander*. Id enim impletum non esse, si *Christus* vocetur יְהוֹשֻׁעַ *Iehosua*. Qua in re satis mirari nō possum hominis cōtradicendi vi abrepti, atque in angustias adaçti peruicaciam. Nam si *Osiandro* credimus, *Dei* virtus tribus literis tota includitur: quæ si quid habent momenti, in nomine יְהוֹשֻׁעַ *Iehosua* cernuntur: alioqui nemo nisi *Hebraicè* doctus fidei mysteria intelligere posset, quod falsissimum est.

Quin etiam verba Prophetæ optimè cum *Angeli & Euangelistę* sententia conueniunt, siquidem cap. 30. ait, *Ioua est index noster, Ioua est præceptor noster, Ioua est rex noster, ipse saluat nos*. Qui saluat ergo, quod facit *Iesus* *Christus* solus, quid aliud est, quàm *Ioua*, non nomine, cū *Dei* virtus nominibus non comprehendatur, sed re ipsa est verus *Iesus*

Iesus saluator, iudex, præceptor, rex, & redemptor, & propterea *Emmanuel*, id est, *nobiscum Deus*? Vides itaque *Emmanuel* & *Iesum* idem significare, si rem, nō literas spectes, quorū vtrunque in Christo perfectè impletū est. Sed iam ceteris respondeamus argumētis.

Quod existimat in libris alicuius auctoritatis hoc nomen יֵשׁוּ Iesu scribi, falsum esse ostendit doctissimus Iudæus Abèn Ezrà, qui semper scribit יֵשׁוּעַ, lege eius in Genesin præfationem. Quin etiam Elias in Tisbi, cur aliquando יֵשׁוּ scribatur, præsertim in Thalmud, rationem affert: confitens scribendum יֵשׁוּ Iesua: sed quoniam Iudæi non credunt eum esse seruatorem suum, ideò literam vltimam Aain abieciſſe: vt hinc iam facile alterum eius argumentum dilui possit. Sed ex vsu linguæ Syriacæ atque Thalmudicæ, quas ignorare videtur Osiander, docebinus dteras gutturis, vt Hebræi vocant, præcipuè Aain, quæ omnium crassissima est, absorberi, vel potius excidere.

Cū enim ostenderimus *Iesu* & *Iosua* idē esse nomen, si rationem vltimæ literæ Aain reſectæ exposuerimus, iam nihil amplius, quod dicat, habebit Osiander. Exempla plurima producere possemus, sed paucis erimus contenti. Nam quod Hebraicè atque Babylonice dicitur שֶׁבַע *seba*, *septē*, id Syriacè & Thalmudicè

mudicè vltima litera abiecta scribitur שב sab.
 Sic pro קטיע qetia, quod est *abscissus*, dicitur
 קטי qeti. quod etiā in numeris fit, ארבע עשר
 Arba asār, *quatuordecim*, ארביסר Arbisār.

Cùm ergo hoc nomen in libris tantùm
 Thalmudicis ישו Iesu scriptum inueniatur,
 quis amplius miretur, cur postrema litera re-
 secta fuerit?

Quòd verò apud Arabes bisyllabum esse
 ait, & cum Iesu conuenire: id verò nos con-
 stanter negamus. Vt enim hoc nomen in Al-
 corano bisyllabum sit, non tamen quadrat
 cum Iesu, cùm scribatur عيسى Isa cum Aain,
 quanquam corruptè, quomodo etiam Beel-
 zebub, Euangelium, Esau, in Iblis & Engil &
 Eles, quædam alia, deprauarunt. Alij certè
 Arabum scriptores sæpe scribunt ישוע Iasue.
 Nihil ergo hinc, nisi contra suam sententiam,
 colligere potest. cùm vel Arabicè scribatur
 cum Aain.

Nunc veniamus ad יהשוה Iehesu, quod
 obtrudere nobis volunt, quod primùm con-
 tra Hebraicæ orthographiæ rationem scrip-
 tum esse, tum nihil significare, sed merum
 esse hominum commentum, qui cùm vt de
 alijs detrahant, tum vt ipsi soli sapere videan-
 tur, hæc confingunt, clarissimis probabimus
 argumentis. Sed prius ostendendum est, fidei
 mysteria locum habere etiam præter literas
 Hebraicæ

Hebraicas, tum ex Apostolorum auctoritate, qui bona magnâque, si istos audimus, mysteriorum parte nos defraudarunt, ut qui Græcè scripserint & locuti sint : nec tamen usquam in literis Hebraicis, sed in prophetarum, & Christi sententijs, quæ in omnibus linguis intèlligi possunt, mysteria posita esse docuerunt. Tum etiam è priscorum Hebræorum sententia, qui suis Iudæis permittunt, ut eam precationem, quæ apud eos non minùs sacrosancta habetur, quàm apud nos dominica precatio, manèque ac vesperi quotidie canitur à singulis, & de nomine *Iona* præcipuè agit, qualibet lingua recitent. Ea sunt verba, quæ Deut. sexto capite leguntur, *Audi Israel, Dominus Deus noster &c.* Eam precationem à primo verbo vocant שמע *scemá*, *Audi*. Nam in Thalmud Ierosolymitano, Massèchet Sotá, Pérec éllu neemarín, in hunc modum scriptum est, רבי לוי בר חזותא על לקסרון שמע, לון דהור קדר שמע אלנסתין בעי לעבבון שמע רב יוסי אקסר אמר מי שאינו יודע לקרותה אשודית לא יקרא אלא קורא אותה בבללשרן שירדע וירצא יודי חובתו: Sententia hæc est, *Rabbi Leui filius Hazota ascendit Casaream, atque audiuit eos qui recitabant scemá* (eam scilicet precationem, quam suprà diximus) וירצא, hoc est, *Græcè. Volebat itaque eis interdiceret. Quod cum audisset Rab Ioses (qui nempè*

maiore erat autoritate) iratus est, & dixit, Quicunque eam Assyriacè recitare nescit, ne recitet. Recitans autem ea lingua, quam intelligit, hoc pacto suo muneri facit satis. Vbi sunt ergo isti, qui superstitione plusquam Iudaica nos obligare volunt: ut si Hebraicè nesciamus, maxima nequeamus mysteria assequi? Nec tamen contemnenda est eius linguæ cognitio, cum ad rerum origines explicandas ferè necessaria sit. Sed ad *Iehesu* redeamus. Principio nemo linguæ Hebraicæ doctus negarit, nullū nomē delinere in he antecedente י. Quod si vel vnū quisquam protulerit, vincat. verū nunquam id faciet, cum ratio orthographiæ repugnet, quæ præeunte vaušuréc in quiescentibus Lamed he postulat, ut he mutetur in Iod. Præterea יהשׁוּה Iehesú nihil significat. Nam cū Hebraica omnia nomina Thema aliquod habeant, *Iehesu* nullū habere potest, nisi יהשׁה hafáh, quod nec vsquā legitur, nec quicquam significat. At dicat aliquis significare literas יהוה *Iehouá*, quæ in nomine sparsæ sunt. Quid ergo faciemus שׁ scin, quod in medio semper ad thema pertinet? Sed confugiet ad Cabalistas, qui cū præsertim grāmaticæ Analogiæ repugnent, & rem totā incertis cōiecturis frigidisq; cōmentis tractēt, audiendi nō sunt.

Nec est quòd quisquā Christi sanctissimo nomini iniuriam fieri existimet, si literas omnes

nes Tetragrammati non habeat, quæ passim in hominum ignobilium, & plerunque maiorum nominibus reperiuntur, nec quicquam tamen continent mysterij, nisi impiè ineptire volumus. Multi enim è veteribus & nostræ ætatis Iudeis nominantur יהודה, Iuda, quorū tamen plerique fuere, & sunt perditissimi. atqui in eo nomine sunt omnes literæ Tetragrammati. Quin etiā in verbis tertiæ cōiugationis, quæ dicitur הִפְחִיל hiphil, frequenter cernuntur concurrere. Multò igitur consultius, ac magis pium est, mysteria non in literis, quod Iudaicum est, sed in spiritu, quod veri faciunt Christiani, vestigare: verūmque Christi nomen credere esse *Iesum* יֵשׁוּעַ, hoc est, *salutis authorem*: siue etymon, siue linguæ Hebraicæ analogiam spectes.

CAPV T II.

De omnibus Dei nominibus, & quomodo Arabes & Aethiopes Deum nominent.

Postulare videtur rei series, vt cætera Dei nomina tam quæ diuinæ nobis literæ tradunt, quàm quibus Iudæi in suis commentarijs vtuntur, exponamus. Dei enim essentiam humani ingenij angustia capere non possunt. Ex nominibus tamen utcunque, atque, vt ait Paulus, per ænigma, Dei omnipotētiam prospicere possumus. Nā Deū nemo homo vidit vnquam. Hinc intelligere possumus

mus, cur Deus Exod. 33. Mofi se videre cupienti dixerit, וְהִסְתֵּיתִי אֶת כְּפִי וְרָאִיתָ אֶת אַחֲרַי, *Et auferam manum meam, & videbis posteriora mea: ora autem mea non conspiciuntur.* Cùm enim, vt philosophi docent, duplex sit sciendi atque intelligendi Methodus: Vna, quæ à naturæ cognitis & prioribus ad nobis nota & posteriora deducitur: altera, quæ eadem via ab vltimis ad prima recurrit: è quibus illa ἀποδείξις, hæc ἐπαγωγή colligitur: quis non videt, ora Dei oculis mortalibus cerni non posse, hoc est, Deum sub Apodixin non cadere, cùm eo nihil sit antiquius? At Dei posteriora intueri possunt non omnes, sed ij tantùm, quibus obumbrantem manum suam sustulerit Deus. Quod princeps poëtarum Homerus non ignorauit, apud quem Ilia. é. Diomedes cum dijs congressuro caliginem omnẽ, vel vt ipse loquitur, ἀχλὺν ἢ πρὶν ἐπὶ νῆν, Minerva abstergit. Nam quid aliud, quæso, est Dei nomina cognoscere, quàm eum in rebus creatis, quæ diuinæ prouidentiae signa sunt, contemplari? Duo enim sunt in Natura, Res ipsæ, & rerum signa, quæ nomina vocitamus. Plato quidem nomen definit Cratylus, ὄργανον διδασκαλικόν, & διακριτικόν τῆς οὐσίας, ὡς πῶρ κερκὶς ὑφάσματος. In Sophista nomen apertè σημεῖον appellat. Aque hoc maxime inter Deum & hominem interest, quòd ille

ille res per se intelligit, hic nihil nisi per signa cognoscere potest. Hoc est, quod Paulus vocat *A Enigma*: cùm in hac vita rerum simula-
cra quasi in speculo contemblemur. Hæc res errandi ansam Iudæis præbuit, qui cùm cre-
berrimam diuinorum nominum mētionem audirent, coeperunt supersticiosè adhibitis
Arithmēticis & Geometricis proportioni-
bus, acutissimè delirare, vel potius cum ratio-
ne insanire: anatomicè literas singulas rese-
cantes, resoluentes, numerantes. Sed somnia
sunt, quæ stupidos & vanos delectare pos-
sunt, prudentibus certè non probantur. A-
postoli sanè & Christus ipse nihil eiusmodi
docuerunt: nam ignorasse, vt Iudæi garriunt,
si tam alta mysteria continent, pijs nefas est
dicere. Nos igitur non Dei nomina, sed
Deum ipsum adoremus, nisi relicto corpore
vmbra[m] consecrari libet. Nam quòd in no-
mine *Iesu* omne genu flexum iri Scriptura
ait, non de literis aut vocis simplicis pronun-
ciatione intelligitur: sed de virtute, quæ per
fidem omnia agit: ad quam certè cultus is,
qui audito sacrosancto nomine *Iesu*, vel in-
specta veneranda eius effigie à pijs homini-
bus exhiberi solet, præcipuè referendus est.
Quòd verò magi diuinorum nominum ap-
pellatione mira prodigia efficere videntur, id
fit Cacodæmonis præstigijs, qui in ea super-
stitutione

stitutione homines retinere cupit. Alioqui ipse quoque Satan nominibus non mouetur, sed Act. 19. respondet infidelibus exorcistis *Iesum cognosco, & Paulum scio, vos autem qui estis?* Sed ad propositum redeamus, nominaque Dei, quę decē sunt, recēseamus. Hic nihil dicā de summa denarij perfectione, qui idem etiā est Tetras, & supremus omniū, in quo numeri omnes simplices non potestate, sed actū cernuntur: cū alij omnes hoc nomine imperfecti sint, quòd ad denarium nō peruenerint. Hęc inquam, & alia eiusmodi Pythagoreis relinquimus. Nomina verò hęc sunt:

- 1 יהוה Ioua, Tetragammaton, de quo supra dictum est.
- 2 יה Iá, hinc halelu_ia. κύριος, Dominus.
- 3 אל El, ισχυρός, Fortis.
- 4 אלה Elóah } δικάστης, ἀρχὴς, Iudex,
- 5 אלהים Elohim } princeps.
- 6 שדי saddái, ἄλκιμος, παντοκράτωρ, omnipotens, vel αὐτάρκης, se contentus.
- 7 אדון Adón, אדני, Adonái, κύριος, δεσπότης, Dominus.
- 8 אשר יהיה : עוֹ, Qui est.
- 9 אלהים צבאות vel יהוה, Adonai, vel Elohim Sabaoth, Dominus vel Deus exercituum.
- 10 עליון Elión, ὑψίστος, excelsus, summus, supremus.

Duo prima à themate יהוה fuit, proficiscuntur: vtrum

utrūque tamen redditur, ὁ κύριος, *dominus*. Nō possum hīc prātermittere, quod sanctissimus ac doctissimus vir Epiphan. cōtra Anomōeos scribit super hoc nomine *Iā*. Sunt enim, qui personarum in Deo, ut loquuntur, pluralitatē ex veteri Testamento probari non posse contendunt. Contra quos Esaiæ vaticinium producit, in quo ca. 26. disertē id expositum est, בָּטַח בַּיהוָה עַד כִּי בִּיהַיָּהוּ צָר עַל מִיָּם: quæ verba ex Origenis Hexaplis in hunc modum Græcè citat, βετόν βαδωνάϊ ἀδ' ἄθι, χι βαϊά ἀδωνάϊ σὺρ ὠλεμέιμ. Et interpretatur, πεποιθατε ἐπὶ ᾧ κυρίῳ ἕως αἰῶνος, ὅτι ἐν τῷ κυρίῳ κύριος ὁ στερεώσας τὴς αἰῶνας. Hoc est, *Confidite domino usque in seculū*, quoniā *in domino est dominus* (id est, *In Ia est Iouā*) *qui stabilivit secula*. Quā interpretationē Hebræus nullus labefactare potest. Nos Theologorū prudentum iudicio rem totam cōmittimus. Sed ad rem.

El, elohim, & eloah frequentia sunt: *El* à themate אֱלִי fortē sonat. *Elohim* iudicibus & magnis viris tribuitur, & angelis, ut quidam putant. *Eloha* aliquando in malam partem accipitur, ut notant Grammatici.

Saddai aliqui compositum esse aiunt ex שׁ relatiuo, & דַּי nomine, quod est *idoneus, sufficiens*, Græcè αὐτάρκης. natura enim Dei opis haud indiga nostræ, verè est αὐταρκής αὐτὸς ac beatissima. Cætera facilia sunt.

Porro

Porro Hebræi in commētarijs alia decem nomina Deo accommodant.

השם Hassém, τοῦνομα, *Nomen illud κατ' ἐξοχήν*, quanquam sepe addunt יתעלה extol-
latur, vel יתברך celebratur.

השכינה Hassechiná, *habitatio*, qua Dei præsentiam intelligimus.

המקום Hammacóm, ὁ τόπος *locus ipse*. Dei enim omnia plena, vt Esaias, Hesiodus, Aratus, & Virgilius canunt. Nam omnia, vt locus, complectitur, & omnem ipse locum implet.

Infra c. 12. השמים Hassamáim, ὁ οὐρανός, *cælum*. Hinc illud, *Baptismus Iohannis utrumne à cælo est, an ab hominibus?* Hoc secuti fortè Græci poetæ Saturni patrem οὐρανὸν vocarunt, vt Latini *Cælum*.

הקדוש ברוך הוא Haccados Baruch hu, ἅγιος εὐλογημένος ἐκαίνος, *sanctus ille & laudatus*.

הגבורה Haggeburá, τὸ κράτος, *summa potestas*: vt imperatorem Antoninum Oppianus appellat γαίης ὑπατον κράτος.

רבונו של עולם Ribbonó sel Olam, ὁ κύριος τῶ αἰῶνος, ἢ τῶ κόσμου, *Dominus seculi mundiue*.

מלך העולם Melech Haolám, βασιλεὺς τῶ αἰῶνος, ἢ τοι αἰδῖος *Rex seculi, vel sempiternus*, vt Galli Deum vocant *A Eternum*.

אבינו אבינו אבינו אבינו Abinu sebbassamaim, πατήρ ἡμῶν ὁ εἰς τοὺς οὐρανοὺς, *Pater noster qui est in cælis*.

calis, vel celestis, ne terrestrem somnietur.

רחמנא Rahmaná, ὁ ἐλεήμων, *Misericors.*

Cæterum apud Arabes hæc obseruavi Dei nomina, quæ literis Hebraicis exponemus, quando characterum Arabicorum copia non est.

אללה Allá, vel Illé, vt Poeni pronunciant ὁ κύριος, *Dominus.*

אלרב Arabb.

קדיר עלי כל שאין Cadír alé cullí sciáin, *Potens supra omnē rem, omnipotens, παντοκράτωρ.*

אלרחמן אלרחים Arrahmán arrahím, ὁ ἡπιος ὁ ἐλεήμων, *mitis & misericors.*

Allá componitur ex articulo al, quod est ἰ, & pronomine lah, id est, ei: nomen ergo significat, eum, cuius omnia sunt, qui omnia habet. Id Hebraicè diceretur אשר לו Ascér ló, vel vno verbo שלו scelló. Hoc etymon mirificè consentit cum versione Septuaginta, qui locum illum Gen. 49. in vaticinio Iacobi de Christi aduentu, *Non auferetur sceptrum à Iuda, nec legislator è medio pedum eius, donec veniat qui mittendus est: sic reddunt, ὃ τὰ ἀποκείμενα. ille cui sunt reposita, omnia videlicet.* Hebraicè scribitur עד ביובא שילה. Quod Onchelus vertit משיחא דדילה היא מלכותא, *Messias, cuius est regnum.* Vtrique legerunt שלו scelló, id est, אשר לו. Nā ה ponitur pro ו, vt עירא & עירד pro עירא & עירד, vt mox עירא & עירד pro עירא & עירד.

Locus Genes. 49. expositus.

Sic

Sic Deut. 34. לַחַר pro לָחָה. Noster interpres legisse videtur heth, nec tamen video, cur interpretari potuerit, *Qui mittendus est*: nisi fortè legit שלח. Mihi tamen שלח, quod Septuaginta & Chaldaeus paraphraſtes ſecuti ſunt, magis placet. Id enim multò melius eſt, quàm Silò oppidum frigida planè abſurdàque ſententia accipere. Nam quod quidam Hebræi ſomniant Sil filium eſſe, vt ſit, *Donec veniat filius eius*: quanquam plauſibile videtur, cùm coniectura tantùm nitatur, non probō. Illud verò שלח Chriſto optimè congruit, cui data eſt poteſtas omnis in calo & in terra, vt Scriptura teſtatur.

Nomina, quibus Deum appellant Æthiopes, hæc ſunt,

אמלך Emlác.

אגזיא Eghzia.

אגזיאבחר Eghziabhér.

Vbi nemo miretur duo Seuain initio ſcribi: quod cum Hebraica orthographia nō recipiat, Æthiopica familiariter uſurpat.

Emlác, βασιλεὺς, *Rex ille*: quod mihi ab Hebræis mutuati fuiſſe videntur, qui regem Melech vocant, qui Æthiopicè nominatur נגוס Negús.

Eghzia, אררן, ὁ κύριος, *Dominus*.

Eghziabhér componitur ex Eghzia domino, Ab patre, her bono: quod eſt dominus patris.

pater bonus: ut illi Æthiopes, qui Romæ habitant, interpretantur.

CAPUT III.

De צעיר sair apud Micheam, & Nequaquam minima es. apud Matthæum.

AD MONUIT me hoc loco Evangelij ordo, & rei difficultas, ut de cōtrouerso illo atque perplexo loco Matthæi, quo Michea vaticiniū adducitur, aliquid diceremus: cū vt scrupulum molestissimum, qui maximos ac doctissimos viros torsit, si fieri posset, eximeremus: tum etiam vt D. Hieronymi auctoritatem, quanquam is nec nostro, nec mortalis cuiusquam patrociniū indiget, tueremur: quam omnibus admotis machinis quidam labefactare atque euertere conantur. Sic enim agunt, vt inuidiosa Hieronymi cum Euangelista Matthæo collatione proposita, illum potius, quàm hunc, lapsum esse credamus. Ac neminem quidem esse arbitror, qui non plus Matthæo tribuat, quàm Hieronymo: non tamen propterea errasse eum hoc loco persuaderi nobis poterit. Nam mancum & imperfectum est Osiandri argumentum, quo necessariò vel Matthæum, vel Hieronymum hallucinatum fuisse colligit: nos neutrum errasse planissimè ostendemus.

Vt longè sincerius & cādidius fuerit dicere, *Nescio*, quàm cōtra Chaldæum paraphrasen,

sten, Hebræos omnes, & postremò D. Hieronymum, incertam & commentitiam, atque, ut probabimus, falsam interpretationem confingere. Nec erat, si vera narrasset, cur invidiam & calumniatrices obtreccationes reformidaret. Veritatem enim, quæ initio premittitur invidia, Æschyli Tragicæ exemplo, τὸ ἄριστον ἀνὰ τι θεῖον δέει, *Tempori nempe consecrare oportet*. Ut contrà, commenta aliquandiu specie veritatis se venditantia, ad extremum conuincuntur mendacij. Sed ad rem redeamus. Primùm tamen omnes rogatos volumus, ut rem ipsam potius, quàm personam inspiciant, atque ita sententiam nostram legant, ut à nobis hæc omnia dici sibi persuadeant, quòd literarum Hebraicarum utilitas elucescat, & iudiciorum temeraria præcipitatio cohibeatur. Ac primò verba prophetæ Mich. proponamus, qui cap. 5. in hunc modum ait, ואתה בית לחם אפרתה צעיר להיות באלפי יהודה ממך לי יצא להיית מושל ביהודה: *Quæ D. Hieronymus sic reddidit Latinè, Et tu Beth-léhem Ephratha paruulus es in millibus Iuda, ex te mihi egredietur, qui sit dominator in Israël.* Chaldaus autem paraphrastes hoc modo, ואת בית לחם אפרתה בועיר, הויתא לאתמנאה באלפא דבית יהודה מנך קרמי יבק משיחא למהוי עביר שלטן על ישראלי: *hoc est, Et tu Beth-léhem Ephratha*

feri

ferè paruulus es, vt recēsearis inter Chiliadas domus Iuda. Ex te mihi prodibit Mesias, vt fiat imperator super Israel. Matthæus autem sententiam potius, quàm Prophetæ verba considerans, vt qui sciret diuina mysteria non in syllabarum superstitiosa enumeratione, sed in sententiæ eiusdem, quanquam verbis paululum immutatis, concordia posita esse, sic exposuit, cap. 2. Καὶ τὸ βηθλέεμ γῆ ἰούδα, οὐδ' αὖτως ἐλαχίστη εἰ ἐν τοῖς ἡγεμόσιν ἰούδα. ἐκ σοῦ γὰρ μοι ἐξελεύσεται ἡγούμενος, ὃς τις ποιμανεῖ τὸν λαόν μου τὸν ἰσραήλ. Quod Latinè est, *Et tu Bethléhem terra Iuda haudquaquam minima es inter duces Iuda. Ex te enim mihi egredietur dux, qui reget populum meum Israel.* Hic diuino prorsus consilio Euangelistam postrema prophetæ verba; *Et egressus eius ab initio à diebus æternitatis*, cùm Christi diuinitatem atque æternitatem disertissimè loquantur, præterisse videmus. Nempe quia ad rem non faciebant: cùm non quis, quantū sue Christus foret, sed vbi nasci deberet, quaereretur. Præterea pro *Ephratha*, vertit, *terra Iuda*, quoniam dilucidior narratio futura erat. Tum pro *chiliadibus* vel *millibus* (quod Hebræi tantum intellexissent, apud quos populus per chiliades oppidatim distruebatur sub suo Tribuno, vt Gedeon ostendit, cùm Iud. 7. Deo respondet, אלפי הרל במנשה, *Mea*, inquit,

Chilias inter Manasseas tenuissima est) scripsit, *Duces*: quod facile omnes intelligunt. Illud verò, *qui sit dominator in Israël*, fusius explicavit, *Dux qui reget populum meum Israël*. Vbi ergo sunt, qui Euangelistis obganniunt, quòd perperam verba prophetarum citent, si vel vna syllaba inuersa fuerit? Qui mihi Iudaica superstitione, non Christiana libertate delictari videntur.

Nunc cur, quòque modo, aiète Propheta, neget Euangelista, cum idem vterque sentiat, aperiendum est: si prius Osiandri còmentum confutauerimus. Is enim, vt Hebraicè solus scire videatur, verbum פָּאִיר *saír*, id est, *paruulus*, in quo totus controuersiae cardo vertitur, contra omnium, vt ipse quoque fatetur, sententiam, interpretatur, *Parum est*, hoc modo, *Et heus tu Bethlahema ephratha, parum est vt sis inter Chiliadas seu Chiliarchos Iudæ, &c.*

Quam interpretationem si absurdã & falsam esse ostēderimus, alia querēda nobis erit. Principio non est idem, *parum est vt sis*, & *hancquaquam es*: quod omnes vel mediocriter docti facile dabunt. Tum constanter asserimus פָּאִיר *saír* in lingua Hebraica nunquam significare *parum*: sed *paruulum* vel *minorem*, praesertim aetate vel dignitate: quomodo Arabicè عَیْر *çaguer* dicitur cū Aain notato vnico punctulo, idēque est prorsus quod

quod Hebraicum צעיר, vt Hispani intelligūt,
qui paruum vel non primogenitum *el cague-*
ro vocitant. Verū, *parum*, Hebraicè dici-
tur מעט *meát*. Cēterū, ne id comminisci vi-
deamur, proferamus locos omnes Bibliorum,
vbi legitur צעיר *saír*, vt etiam curiosis satisfiat.

Vocabulum hoc viginti & vno tantū lo-
cis in vtroque genere reperitur.

De filia minore Lot, Gen. 19. ter legitur
הצעירה *hacceirá*. De Iacob, 25. *Et maior ser-*
uiet צעיר *saír* *minori*. De Rachel, 29. Quæ mi-
nor natu, quàm Lea erat, legimus הצעירה, *ha-*
ffeirá. De filijs Iacob minoribus natu, 43. צעיר.
saír. De Ephraím, 45. qui minor natu erat ip-
so Manasse, הצעיר *hassáir*. De eo, qui dirutam
Ierichuntem reficeret, cui imprecatur Scrip-
tura, Ios. 6. & 3. Reg. 16. Vt in primogenito
iaciat vrbis fundamēta, & בצעיר *bisfíró* *in na-*
tu minimo portas erigat. De Gedeone, Iud. 6.
qui ait, Ego הצעיר *hassáir* *natu minimus* *in do-*
mo patris mei sum. De Saul, 1. Reg. 9. qui in-
quit, *Et cognatio mea* הצעירה *hassleira* *mini-*
ma est (dignitate scilicet) *inter omnes cognatio-*
nes Beniaminitarum tribuum. Iob, 30. loquitur,
צעירים *seirim* *minores me diebus vel natu me*
vident. Et Elihu, Iob. 32. צעיר *Sair*, inquit,
minimus natu sum. Benjamin, Psalm. 48. *saír*
natu minimus regit eos. צעיר, Psalm. 119. *saír*
Paruus ego sum & despicabilis. *Paruus eus-*

det in mille, Esa. 60. & הצעיר minimus in gentem potentem. & Iere. 14. potentes eorum miserunt צעיריהם seirehem paruulos suos ad aquas. Eversa est Moab, Ierem. 48. & clamorem susulerunt צעיריה seireh paruuli eius. Nisi lingent eos צעירי seire paruuli gregis, Ierem. 49. צעיר Paruulus es in millibus Iuda, Mich. 5.

Et Zach. 13. referam manum meam ad צעירים soarim paruulos, vel non primogenitos.

Hi sunt loci omnes, in quibus hoc verbum legitur. Proferat ergo Osiander, aut alius quilibet vel vnum locum, vbi saír accipiatur pro parum, & triumphum agat.

At, dicat aliquis, istud non est nodum soluere, sednectere perplexius.

Dispiciamus itaque qua ratione aientem prophetæ propositionem cum negante Euāgelistæ componamus. Quod planius percipietur, si superiora Prophetæ verba repetamus. In eo enim maximè errat Osiander, quòd posteriorem orationis partem prioris rationem esse putat. Cùm apud Prophetam non αἰτιολογία sit, sed ἐναντιωματικῶς dicatur, vt perspicuè apparebit.

Propheta cùm suprà de Iudæorum exilio, de reductione eorum, atque Babyloniorum clade & excidio copiosè locutus esset, postremò cap. 5. ait.

Nunc vastaberis filia Turmæ (id est, Babylon bellicosa

bellicosa, vel, ut quidam volunt, Ierusalem) quæ obsidione nos cinxit, virga pulsarunt mālā iudicis Israel. Et tu Beth-lehem Ephratha minimus es in millibus Iuda: ex te mihi egredietur, qui sit dominator in Israel.

Hic nemo non videt vrbis potentissimæ, siue ea Babylon, siue sit Ierusalem, collationem cum obscuro atque ignobili oppido à propheta proponi.

Tu, inquit, Vrbs potentissima euerteris, idque propter tua flagitia, quod obsidione nos cinxeris, & iudicis Israel mālā baculo pulsaueris. Tu autem Beth-lehem minimus quidem es, vel minimum atque obscurissimum oppidum in Chilia-dibus Iuda: ex te tamen nascetur Christus. Deus enim deturbat potentes de sede, & extollit abietos. Hanc veram ac germanam esse Prophetæ sententiam nemo communi sensu præditus, & in sacris literis vel mediocriter versatus, negauerit. Sed illud ostendamus oportet, cur Propheta non addiderit, Tamen, quod nos intelligendum esse asserimus tam ex ipsa sententiæ consecutione, quàm è sermonis Hebraici proprietate: qui particulas quasdam interdum omittit, quæ tamen ad sententiam, si in aliam linguam vertantur, omnino faciunt. quod vno aut altero exemplo demonstrandum est. David loquitur, Psal. 119. ogd. 18. צר ומצוק מצאוני מצותיך, שעשעתי.

Micheæ
locus explicatus.

Angustia & ærumna inuenerunt me, præcepta tua deliciae meae sunt. Vulgata. Tribulatio & angustia inuenerunt me, mandata tua meditatio mea est. Quis hîc non videt addendum esse, Tamen? Contrà, si quis addat, Quia, ut in Prophetia facit Osiander, impia erit sententia: nec enim Dauidi ob seruata Dei præcepta quicquam aduersi obtigit. Mox idem ait, רבים רדפי וצדי מערבותיך לא בטיתי, Multi sunt insectatores mei & aduersarij mei, à testificationibus tuis non declinaui. Vulgata: Multi qui insequuntur me & tribulant me; à testimonijs tuis non declinaui. hîc iterum intelligendû, Tamen.

Expõsita Prophetæ sententia, Euangelistæ verba perpendamus. Ille enim ita scribit, *tu es minima, Tamen ex te prodibit Christus: hic verò ait, Tu haudquaquam minima es: ex te enim exhibit Christus. Quæ duæ orationes idem prorsus loquuntur. Nisi quòd Euangelista, qui illius collationis Propheticæ priore parte non indigebat, nec erat cur de Babylone vel Ierosolymis loqueretur, posteriorem partem, quæ ad rem faciebat, dilucidius quàm Prophetæ explicauit, addita ratione: Prophetæ idem sentiens alio modo orationem disposuit, sed paulò obscurius. Hanc interpretandi rationem ad eò veram esse credo, ut nemi- nem tam impudentem aut præfractum esse existimem, qui eam audeat conuellere.*

Alio

Alioqui ἐφίημι οὐκ ἐπὶ τὸν καίσαρα μὰ δία,
 ἀλλ' ἐπὶ τὸν χρόνον, quod Cæsare longè cit po-
 tentius. Vbi sunt ergo qui è musca clephantū
 faciunt, & Euangelistarum auctoritatem, quæ
 omnibus sacrosancta esse debet, ex vno ver-
 bulo in discrimen adducunt? Vbi sunt qui nō
 tam Euangelistarum amore, quàm odio Pa-
 trum, illorum defensionem cum horum ac-
 cusatione coniungunt?

CAPVT IIII.

De Hosanna.

I Nuitat nos celeberrima in Euangelio vox
Hosanna, vt rei originem paucis expona-
 mus, in qua sibi ad cō placet Osiander. Cui
 quidem non refragaremur, nisi loci obscuri-
 tas nos propemodū cogeret, quæ nescio quos
 sic delirare fecit, vt interpretarentur, *Hosanna*
fili d David: vt esset casus vocandi.

Habet enim hæc res controuersia aliquid,
 quæ exponenda ac componenda est. Aliter
 enim vox hæc apud vetustissimos Hebræo-
 rum scriptores accipitur: aliter intelligitur à
 recentioribus in precationum libello, quem
 secutus est Osiander. Qui rectè ait in festo ta-
 bernaculorum cani à Iudæis litanias quasdā,
 populo identidem respondente, *Hosanna*.
 Quodam enim loco sic scribitur,

בְּרוּשָׁעָה אֱלִים בְּלֹד עִמָּךְ

בְּצִאתְךָ לִישֵׁעַ עִמָּךְ

C ,

Vbi proculdubio *Hosanna* significat, *Salua quaeso*, vel *Salua nunc*.

Sed si hoc recipimus, ut nobis author est Osiander, quomodo, quod in Euangelio legimus de voce turbæ clamantis, *Hosanna filio David*, aptè exponemus? Nam Græcè sic scriptum est, καὶ οἱ ὄχλοι οἱ προάγοντες καὶ οἱ ἀκολουθῶντες ἔκραζον λέγοντες, ὡτανιᾶ τῷ υἱῷ δαβίδ. Et turbæ præeuntes & sequentes clamabant dicentes, *Hosanná filio David*. Si enim, *Hosanna* significat, *salua quaeso*, quid erit, *Salua quaeso filio David*? Atque hunc nodum, quod sciam, nemo hætenus soluit. Non nego apud Hebræos esse precationem, quæ dicitur הוֹשַׁעֲנָא גִּדְרִילָה *Hosanna magnum*: sed quæro quomodo intelligendum sit, *Hosanna filio David*. Iudæorum quidem recentiorum, qui suam linguam non intelligunt, authoritas Christianis magni facienda non est. Videamus itaq; quid *Hosanna* apud priscos Iudæos, quorum plerique Christi ætate vixerūt, significet. Sed prius ostendendum est vocabulum hoc Hebraicū esse non posse, siue nomē sit, siue verbum. Ac nomen quidem Hebraicum non esse, vel qui primoribus labris Hebræorum fontes degustarint, facilè concedent. Aleph enim ultimū planissimè id nos docet, quod in hac voce ad theman non pertinet: cū, si Hebraicū nomen esset,

esset, necessariò in themate futurum fuerit. Verbum verò quî quæso erit, si analogiã modò seruare volumus? **נא** *Na* enim cum Hebraicis verbis nunquam componitur, præsertim cùm ratio coniugationis postulet **הרשע** vel **הרשיעה** *Hosea* vel *Hosiah*, vt in Psalmis legimus. In Ieremia tamen cap. 31. legimus, **הוֹשִׁיעַ יְהוָה אֶת עַמּוֹ** *Hosá Iehoua eth ammecha. Salua Domine populum tuum.* Dixerit hic aliquis corruptum esse, vel potius per synopen contractum, vt Elias docet. Ait enim **הוֹשִׁיעָה נָא** *hosiáhna*, quod crebrò canebant Iudæi in festo tabernaculorum, factum esse breuitatis causa **הוֹשַׁעְנָה** *Hosanna*, quod mihi non displicet.

Nec est quod quidam, qui vix Hebraica elementa callent, verbum Euangelistarũ *Hosanna*, in *Hosianna* mutant. Addit enim Elias hanc rationem, vt vnam vocem esse intelligamus: quòd fasciculos salicum fluuiialium ob crebras Iudæorum vociferationes, qui identidem respondebant *Hosanna*, iam vocent omnes *Hosannas*. Quod mirificè cum Thalmudicorũ vsu cõsentit, qui vt in mysterijs plumbei sunt, sic linguæ suæ proprietatem atque elegantiam accuratè seruant. Audiamus ergo quomodo in Thalmud vocabulum hoc accipiatur. In perec *Lulab haggazul* sic legimus, **אָמַר לְהוֹרָא רַבָּא לְהַנְהוּר רַגְלֵי הוֹשַׁעְנָא רַבִּי**

ויש גלותא בי גדליתו הושעני עבדו להו בית
 יד: *Dixit Rabbi illis, qui nectunt Hosannam do-*
mus AEchmalotarchæ, vel principis exulum (is
erat insignis quidam Iudæus) cum nectitis Hosan-
nas, facite eis manubrium.

Mox etiam scribitur, אמר רבא לא לגז, *Dixit Rabba ne deca-*
cuminet quisquam spatulam vel ramum palmæ
in Hosannâ. Nemo hîc non videt Hosanna pro
 vno ac simplici nomine usurpari, quod om-
 nes Glossographi *salicem* significare vno o-
 re asserunt. Porro quoniam salices passim
 inveniuntur: cedri, palmæ, myrtique non
 item, obtinuit usus;

Quæ pangs arbitriū est, & vis & norma loquēdi,

Vt omniū arborū rami, quos in festo Sce-
 nopegion Hebræi gestabant, subinde cla-
 mantes Hosanna, id nomen nanciscerentur.
 Quod etiam in secundo Thargum Estér, ca.
 3. scribitur, ועבדין להון הושענא, *Et faciunt si-*
bi Hosanna: & mox, והדדין בהושענא, Et circ-
cumeunt cum Hosanna, vbi apertè intelligitur
 salicum, aliarumve arborum fasciculus.

Vt etiam Galli in festo palmarum, cum
 propter cæli intemperiem oleas, cedros, myr-
 tósue non habeant, buxeos ramos gestare so-
 lent. Iam itaque intelligi potest, cur turbæ
 Christum aduentantem hoc elogio exceper-
 rint, fatentes se *Hosanna*, hoc est, salicum, pal-
 marum,

marum, aliarumque arborum ramos ferre filio David, eumque Deum ac Messiam agnoscere: quod tãtopere Phariseos offendit. Quãdoquidem hæc vox Deo soli conuenit: non, vt quidam somniant, est saluatio, qua reges Iudæi compellabant, vt illa vulgaris, *Fuat rex*. Vox itaque, si etymon quærimus, significat *salua nunc*, vel *salua quæso*, quod Græci dicunt, *σῶσον δὲ*. Vfus verò nominis de salice, aliisque arboribus, quarum ramos, *Leu. 23.* gestare iubentur Hebræi, intelligitur.

Vtrunque optimè conuenit Christo Dei filio, quod Deo tribuebant Hebræi. Nam & rectè clamamus *Hosanna*, vt nos saluet, qui salutis solus author est: rectè etiam manibus gestamus *Hosanna filio David*, vt victorem ac triumphantem ouantes ipsi comitemur.

CAPVT V.

De Amen.

R Eceptũ in primitiua Ecclesia fuisse Paulus *1. Cor. 14.* ostendit, vt populus post recitatas preces responderet, *Amen*, quod neminem rectè dicere ait, qui preces non intellexerit. Cui valdè consentanea sunt, quæ in libris Thalmædicis leguntur. Sed prius explicandum, quid significet *Amen*, quod Septuaginta vertunt, *γένοιτο, fiat*. Nonnulli interpretantur, *confirmetur, stabiliatur*, quasi *אמן*, respecta prima litera, quæ ad thema non pertinet.

Quod

L O C I

Quod si recipimus, dura erit verborum illorū sententia, *Amen amen dico vobis*. Mihi quidē esse videtur adverbium affirmātis, verē, quod addita paragoge he dicitur אָמֵן. Symmachus rectē vertit *παραγωγέως*.

Thalmudici itaque suorum hominū somnolentiam carpētes, triplex dicunt esse *Amen*, יְתוֹמָה *Iethoma pupillam*, חֲטוּבָה *surreptitium*, & קְטוּעָה *sectile*. Nam in *Massēcheth Bera- chóth Pérec ellu debarim*, sic legimus, אֵיזֶר הָיָא אָמֵן יְתוֹמָה רַב הָרַבָּא אָמַר הֵן הֵן דְּמַחֲיִב לְבָרְכָה וְלֹא יָדַע מַה הוּא עָבִי חֲטוּבָה שְׁחָטָה וְאָמַר אָמֵן קִדְּם שְׁחָטָה הַבְּרָכָה קְטוּבָה שְׁקָטָה לְשָׁנִים :

Quòdnam est Amen pupillum? Rab Heuna ait, Est cum quis precatione tenetur, nec intelligit, quod responder. Surreptitium, cum surripit, & dicit Amen, antequam absoluator precatio. Sectile, cum secatur in duas partes, nempe oscitāter audiens, & alias res agens.

Præterea in *Massēcheth Succá* scriptū est, בִּימָה שֶׁל עֵץ בְּאַמְצֵעַ וְהָזֶן הַבְּסֵסֶת עוֹמֵד עָלֶיהָ לְקִרְוֹת בְּתוֹרָה וְהָיָה הַמְּכַוֵּה מִבֵּיתָה בְּסוּדְרִין וְהָזֶן עוֹבֵין אָמֵן :

Suggestus ligneus in medio erat, & lector Synagoge in eo stabat, ut legem recitaret. Porro Synagoge præfectus sudarium circumagebat, & ipsi respondebant, Amen.

Is enim mos diu permansit in Ecclesia, ut
populus

populus frequens preces & cætera, quæ in ecclesia recitabantur, audiret, tum responderet *Amen*. Quod facit populus Israël, Deut. 27. Mose Dei mandata exponente. Atque utinā nostri quoque homines in Ecclesia *Amen* nō *pupillum*, non *furtivum*, non *sectile*, sed legitimum ac pium responderent. Sic enim fieret, ut & attentius sacra verba audirentur, & intelligerentur exactius. Sed de his hæcenus.

CAPUT VI.

De Rabbi, Rabboni, & cæteris.

F Requentissimum est in Euāgelijis hoc vocabulum: sed quoniam vetat Christus, ne quis vocetur *Rabbi*, nec *Pater*, explicanda est huius rei ratio, quæ certè intelligi non potest nisi è libris Thalmudicis. Legimus enim in Euangelio *Abá, Rabbi, Rabboni*, & apud Paulum *Marán*. In Thalmud hæc omnia repertiuntur, & præterea *Rab, Rabbán* vel *Rabbaná*, & *Abai*, quæ omnia sunt nomina dignitatis. Ac primùm agemus de *Rabbon* רבון, & מרן *Maran*, quæ soli Deo propriè tribuuntur.

Rabbon Syriacum verbum est, dominum nō quemlibet significans, sed qui *αὐτοκράτωρ* est, vel, ut Iurisconsulti loquuntur, qui *merum habet imperium*.

Hebræi in commentarijs, & Misná siue Deuteriosi scribunt רבון *ribbon*, ut illud creberrimum dictum ostendit, רבונו של עולם, *dominus*

dominus mundi, quo Deum describunt.

Quæ enim Hebraicè initio habent i, ea Syriacè cum a pronunciatur. Quod dilucidè cernas licet in *Mariam*, quæ Hebraicè dicitur *Miriam*. Et *Migdal* Syriæ oppidū, Syriacè est *Magdal*, vt Herodotus docet, qui μάγδαλον scribit. Sic quod Hebræi dicunt *Ribbon*, Syri *Rabbon* pronunciant. Propterea Maria Magdalene Syriacè Christum, qui iam resurrexerat, salutauit *Rabboni*, hoc est, *mi Domine*; Deū scilicet agnoscens, cū ante mortem nemo eum vocauerit *Rabboni*, sed *magistrum*, id est, *Rabbi*, & *dominum*, hoc est *Mará*.

Sic *Maran*, quod est *dominus noster*, Deo tantū accommodatur. Hoc tamen interest inter *Rabbon* & *Maran*, quod illud sonat κύριος, hoc δεσπότης: illo intelligimur filij, hoc serui. Vt pater filiorum suorum κύριος est, seruorum δεσπότης.

Hinc Paulus cū solennia anathematis verba pronunciat, Syriacè dicit, מרן אתה *Maran athá*, *Dominus noster* (cuius scilicet serui sumus) venit. Id Hebraicè scribendum fuerat

ארבנו בא .

Ceterorum nominum ratio in libris Thalmudicis exposita est. Rabbi Nathan insignis doctor, ea sic colligit, רבי מחבמי ארץ ישראל, הסמכות שם בסנהדרין שלהם דאמרין לעבין סמיכות וקבימ דסמבין לה וקרר לה רבי ויהבין הל

לה רשותא למרן דינן קנסרת. ור' מוחבמי
 בבל הסמוכין בשיבות שלהן והדודת הרא-
 שונים שהיו גדולים מאד לא היו צריכין
 לרברבם לא ברבן ולא ברבי ולא ברב אלא
 Quorū verborum hæc
 est sententia, Rabbi tribuitur sapientibus terra Is-
 rael, quibus imposita fuit manus illic in cōcilijs eo-
 rum: quod dicunt propter impositionem manuum
 seniorum, qui imponunt alicui manum, & vocant
 eum Rabbi, quod est Magister mi, & faciunt ei po-
 testatem cognoscendi causas mulieritias.

Rab autem est sapientum Babylonie (Rabbi-
 norum scilicet exulum) quibus imposita est ma-
 nus in scholis eorum. At homines Priscæ ætatis,
 qui maximi erant ac præstantissimi, non opus erat
 ut magistrarentur per Rabban, quod est magister
 noster, nec per Rabbi, nec per Rab, sed solo ac sim-
 plici nomine appellabantur.

Alio etiam loco legitur, גדול מרב רבי, Hoc est,
 רבנא מרב רבן וגדול מרב רבן. Hoc est,
 Rabbi maior quàm Rab, & Rabban maior quàm
 Rabbi, maior tamen quàm Rabban, est qui simplici
 nomine appellatur.

Et alibi, מר מוחבמי ראשי הגליות שבבל, ורבנא מוחבמי בית דוד אבי ואבא מוחבמים
 רזקנים. Quod est, Mar, id est, dominus tribui-
 tur sapientibus AEchmalotarchis vel principi-
 bus exulum, qui sunt in Babylonia.

Rabbana dominus noster, sapientibus domus
 D David.

David Abái & Aba, hoc est, Pater mi, & Pater, sapientibus iam senibus.

Ex his facilè horum nominum ratio atque ordo cognosci potest: & mos præterea manuum impositionis, qui hodie quoque apud Hebræos seruatur in Rabbiorum, vt vulgo loquuntur, promotione. Hinc etiam cernere licet, cur interdicit Christus, ne quis nominetur *Rabbi*, nec *Pater*. Vnus enim est verus *Rabbi*, magister & doctor noster Iesus Christus: Vnus *pater*, à quo adoptati fratres Christi eius merito efficimur.

Nec velim quisquam hæc à me in alicuius ordinis contumeliam dici putet, cùm auctoritatis conciliandæ causa, ne passim omnes vel insulsa, vel impia tradant, necessaria prope modum in Ecclesia sit dignitatis ac titulorum vsurpatione.

C A P V T V I I.

De Raca, Mammona, & Concilio.

DIu ac multum magnos etiam Theologos exercuit locus ille Matth. 5. de *Raca* & *Concilio*; qui ad mores Hebræorum & publica iudicia pertinet, vt ex eorum libris debeat explicari. Sed præstat Euangelistæ verbum proferre in medium.

Audistis, inquit Christus, quòd dictum est antiquis, Non occides. Qui verò occiderit, obnoxius erit iudicio. At ego dico vobis, quòd omni

qui irascitur fratri suo temerè, obnoxius erit iudicio: Et quicumque dixerit fratri suo *Racá*, reus erit Concilio. Qui autem dixerit fratri suo *Fatue*, reus erit gehennæ ignis.

Hic considerandum est quid sit *Iudicium*, quid *Concilium*, quod Græcè est συνέδριον, quid *Racá*, & postremò cur dixerit, *Audistis*. Nam cum quasi delictorum gradus constituerit Christus, ut gravius peccet qui dixerit *Fatue*, quàm *Racá*, quærenda eius rei ratio est. Porro ut hæc omnia, quæ ad Hebræorum mores pertinent, planius intelligi possint, de iudiciorum ratione paucis agendum est. Ea verò depromi non potest, nisi è libris Thalmudicis, in quibus iura omnia humana & diuina Iudeorum exposita sunt.

Extat itaque in Thalmud Masséchet *סנהדרין*, id est, συνέδριον vel conciliorum. Quod ita esse qui Græcè & Syriacè sciunt, facile concedent. Solent enim Græca verba in Thalmud & commentarijs alijs, præsertim ubi Hebraicum non reperitur, usurpare, ut illa ostendunt, קבלין καπηλείον caupona, אסרין אסάριον Affis, אבטיבתא ἀνθράκων pro consule, הגמון Dux, סבלין σύγκλητος Senatus, טריקלין τρικλίνιον triclinium, ברהסיא βαρυσία liberè, אמילון עמילון Amylum, הדרולוס ὑδραυλος hydraulus, aliæque sexcenta, quæ afferre possem. In quibus accuratè

Græcæ orthographiæ ratio seruata est, vt apparet in ἡγεμὼν, παρρησία, & συνέδριον: vt ne accētum quidem densum præterire voluerint.

In eo igitur libro Synhedrion, quæ à iudicum confessu id nomen inuenerunt, legimus Iudiciorum genera duo esse, quorum vnum vocāt דיני ממון Dinè Mamonóth, alterū דיני נפשות Dine Nephasóth, id est, *Iudicia pecuniarum, & iudicia animarum*: Latini Iurecosulti *iudicia pecuniaria, & capitalia* vocarent. Porro Iudicum classes tres sunt, Prima dicitur בית דין של שלשה, Beth Din scel scelosciá, *domus iudicij triumuirum*, ad quam minores causæ, vt furti, iniuriarum priuatarum, malæ tractationis, ac denique Dine Mamonoth deferrebantur.

Secunda appellatur בית דין של עשרים, Beth din scel escrím vsclosciá, *domus iudicij vigintitriū*, vel סנהדרין קטנה synhedri quetanná, *Synhedrion paruum*: in quo causæ maiores, nempe capitales, cognoscebantur.

Tertia ac præcipua, instar Atheniësis Areopagi, nominabatur בית דין של שבעים ואחד, Beth din scel scibín veehád, *domus iudicij Septuaginta vnius*, vel סנהדרין גדולה synhedri ghedolá. *Synhedrion magnum*, in quo causæ grauissimæ, quæ pertinebant ad summā Reipublicæ tractari solebant. Nam sic eodem capite scriptum est, אין דנין לא את השבט ולא את בניא, תשקו השקו

השקר ולא את כהן גדול אלא על פי בית דין
 של שבעים ודברים. *Id est. Non pronunciant iudicium de Tribu, nec de pseudopropheta, nec de summo sacerdote, nisi de sententia curiæ Septuaginta unius, vel τῶν ἑβδομήκοντα.*

Nam hæ causæ omnes, nempe totius tribus, pseudoprophetæ, summique sacerdotis, magnæ sunt, quæque ad Reip. statum ac dignitatem spectant. Ceterum Septuaginta unus illi Iudices siue Synhedri, quorû Synhedrion Ierosolymis tantum ius dicere poterat, alia parua Synhedria vigintitrium, vel triumuirû in alijs Tribubus constituebant, bella decernebant, urbem dirutam reficiendam locabât, resque omnes publicas administrabât. Quod Iosephus in Antiquitatib. apertè docet, li. 14. cap. 17. Cùm enim Herodes cædis postulatus esset, quòd Ezechiam prædonum ducè occidisset, cùm Galilææ præfectus esset, personamque publicam sustineret, Ierosolyma accitus est, ut in Synhedrio causam diceret. Nam maior erat, quàm quæ à priuato iudicio diiudicari posset. Ipse porro Herodes rerum potitus, Synhedros omneis, præter vnum Sameam, interficiendos curauit.

Ex hoc loco perspicuè cognosci potest, quid sit *Mamona*. Nam omnia, quæ ad rem pecuniarum pertinent, hoc nomine censentur. Cui cùm Græcum nullum aptè respondeat,

deat, Syriacum vocabulum efficacie causa relictum est: vt faciliè dispiciamus, cur Christus dixerit, *Parate vobis amicos de Mammona iniquitatis.*

Sed ad id, vnde digressi sumus, redeundum est. Cùm sciret Christus ordinem hunc esse Iudiciorum, & veteres Iudæorum ritus cum Christianis moribus conferret, ait, *Audistis, quòd dictum est antiquis, Non occides: qui verò occiderit, obnoxius erit Iudicio: intelligens secundam iudicum classem, qui iudicia capitalia exercebant. Verùm maiorem in Christianis perfectionem cupiens, non modò de gravibus iniurijs & cædibus, sed de conuicijs etiam, & tacita ira iudicium fore ostendit, de diuino iudicio humano more & parabolice loquens. At ego, inquit, dico vobis, quòd omnis qui irascitur fratri suo temerè, reus est iudicio, triumuirum scilicet. Et quicumque dixerit fratri suo *Racá*, reus erit concilio, quod est Synhedrion paruum vigintitrium. Qui autem dixerit ei *Fatue*, reus erit gehennæ ignis, id est, summo Synhedrio Septuaginta vnus, quò diuinum iudicium intelligimus.*

Auditio.

Nunc explicandum quid sit *Audistis*, quid *Racá*. Dixerit quispiam, *Audistis*, propterea à Christo dictum, quòd filij à parentibus & sacerdotibus legis præcepta audire solebant. Quod nec ipsi negamus. Sed alium subesse sensum

sensum credimus huiusmodi. Apud priscos Iudæos triplex fuit ratio diuinas literas interpretandi, vt in Thalmud sæpe obseruare licet.

Prima dicitur שמעתיא scemaata, quod est ἀκρόασις vel *auditio*, cum historicum sensum exponimus, quem audisse satis est.

Altera vocatur אגדתיא Aggadtiá, siue *extensio*, cum historicam sententiam mystica expositione dilatamus.

Tertia est מיתלי Mithle, hoc est *parabolica*, cum parabolis vtimur, quod passim in Euangelijs Christus facit.

Porrò Rabbini populo historiam tantum, hoc est *auditionem*, explicabant, qui propterea dicebatur *audire*. Hinc ergo patet, cur dixerit *Audistis*, quasi dicat, verba tantum intelligitis, mysterium non item, quod ipse postea Christus explanat. Iam superest, vt dicamus de *Raca*, quod D. Hieronymus optimè red- Racá.
didit *Inanem*: vsum tamen ac vim non aperit, quod è veterum Hebræorum sermone cognosci debet. Nam in Masséchet Berachoth aliquoties hoc verbum legitur, quod scribitur ריקה Rica. Est autem conuicium non acre, sed familiare, vt cum maior minorem pro auctoritate familiariter castigat, vel leniter obiurgat. Cum enim Rabbini quidam plebium nescio quem orare in loco periculoso animaduerneret, increpat eum dicens, ריקה Rica.

Rica. Vt cùm vulgò errantem vocamus *pauperem stultum*, non quemlibet tamen, sed inferiorē tantūmodò. Cæterū *μαρὸς*, vel *fatuus*, acrius est cōiucium, Syriacè *שטש*, *Sote*, quod in linguam Gallicā defluxit: inde verbū *שטש* asti *infatuare*, frequens in Thalmud. *Raca* itaque est, quē ob inanitatē, *folle* vocitāt. *Fatuus*, vel potius *excors*, *Sote*, hoc est, cuius mēs à ratione abalienata est: vt verbū Syriacū sonat.

Cùm igitur nec Græca lingua nec Latina nomen vllum habeant, quo indignationis lenis significatio exprimatur, relictum est ob efficaciam, verbum Syriacum *Raca*.

Cur verò *Raca* non *rica* in Evangelio scribatur, ratio suprā exposita est, cùm docebamur Syriacè per à pronunciari, quæ Hebraicè per i proferrentur, vt *Miriam*, *Mariam*, *Migdal*, *Magdal*: sic *Rica* *Racá*.

C A P V T V I I I.

De Publicanis.

CRebra fit in Euāgelij *Publicanorum* mētio, quorum *ordo* Romæ honestissimus erat, nempè *equestris dignitatis*, vt multis locis ostendit M. Cicero: Ierosolymis, & in tota Iudæa infamis ferè habebatur, vt illud indicat, *Esto tibi sicut Ethnicus & Publicanus*.

Eius itaque rei ratio ex Hebræorum iure petēda est: idque explanandum, quī potuerit Matthæus Euangelista & idē Leuita esse *Publicanus*.

blicanus, cùm Romani tantùm publica vectigalia licitarentur atque conducere.


Iudæi igitur *Publicanos* Syriaco verbo vocant גבאין gabbain, quod est exactores. Porro in Thalmud Massechet Synhedrin, Pérec zeh borer, vbi agitur de iudicium reiectione, in hunc modum scriptum est, אלר הז הבסר לין, Hoc est, *Hi reijciuntur in iudicio, Pastores, Publicani, & Diaconæ.* Hos enim vnà cum furibus & foeneratoribus, aliisque infamia notatis personis, legitime reijci posse docent Thalmudici doctores. Nam isti omnes fures atque impostores à Iudæis habebantur. Cæterum quidam erat princeps Publicanorum, qui dicebatur ריש גבאי res Gabbaé: is verò Romanus vel ciuitate Romana donatus erat. Ceteri simpliciter nominabantur גבאין gabbain, Publicani, qui Romani necessariò non erant, sed ex ea provincia vel vrbe à principibus Publicanorum eligebantur, in qua vectigalia exacturi erant. Nam. ff. de public. & vect. & com. l. i. §. hic. *Omnes qui quid à fisco conducunt, rectè appellantur Publicani.* In eo autem titulo alij vocantur domini, nempe principes Publicanorum: alij socii, id est, simpliciter Publicani. vt l. 9. *Socij vectigalium, si separatim parteis administrant, alter ab altero minus idoneo in se portionem transferre iure desiderat.* Cum igitur Iudæi deci-

mas tantum suis sacerdotibus pendere quotannis solerent, inuiti Romanorum Publicanos eorumque socios Iudæos videbant: atque ob eam causam, quasi publica notatos infamia, auersabantur.

C A P V T I X .

De Camelo per foramen acus.

EXtat apud Matthæum c. 19. Christi dictum *παρρησιῶδες*, *Facilius est Camelum transire per foramen acus, quam diuitem ingredi in regnum celorum.* Id adagium cum à consuetudine nostri sermonis abhorreat, fecit ut quidam portam, nescio quam, Ierosolymis è suo somnio fabricarentur, quæ *acus* diceretur ob angustiam, per quam *Camelus* animal tam vastum ingredi non posset: cum multò ciuilius fuisset, ingenuè dicere, *Nescio*. Alij nonnulli, qui Græcas literas sic mirantur, ut alias omnes fastidiant, nauseantes si quis aliquid se inuenisse dicat, quod Græci illi inanissimi ignorauerint: metamorphosin monstrosam commēti sunt, atque ex immani bellua funē nobis nec opinantibus architectati sunt. Aiunt enim *κάμυλος*, si cum iota scribatur, esse crassum funem, quo anchoræ religantur: atque, ut sententiam suam communiant, locum hunc Euangelij proferunt. Sed quod controuersum est, pro certissimo testimonio citant. Nos constanter negamus vllum extare bonum Græcum authorem,



thorem, qui κάμιλον vel κάμηλον pro rudente, aut quouis fune vsurpet. Nā Athenæus omnium, quod ad vocabulorum vsum attinet, scriptor atque obseruator diligētissimus, cū nauium vel minutissimas scobes & tenuissimas rimas describat, atque partes omnes & ferramenta enumeret, nusquā *Cameli camiliue* facit mentionem. Quinetiam Iulius Pollux in suo Onomastico, in quo nomina omniā vsitata persequitur, *Camelum* funem ignorat. Producant igitur vel vnum testem, & causam En tibi Suidam. per me obtineant. Sed quī poterūt, cū *funis* Græcè κάλως, vel σχοινίον vocetur, κάμηλος bestia tantū sit?

Itaque vt Græcorum prouerbiorum ratio in Græcis scriptoribus quærenda est: sic Hebraicorum dictorum origo ex Iudæorum petenda est commentarijs. Multę enim sunt paroemiæ Iudæis familiares, quæ in alijs linguis absurdæ vel obscuræ videri possent. Quod quò melius perspiciatur, non fuerit ab re adagia aliquot priscis Hebræis vsitata, quæ in lectione Thalmudica obseruauimus, asserre in medium.

למַת יִרְקָא יִרְקָא שֶׁקָּל :

In urbem oleribus (abundantem) olera (venalia) importa. Huius dicti authorem faciūt Mo-
sen, cū in Ægypto Magos Pharaonis pro-
uocaret. Ii Moſen deridebant vt ineptum, qui
in

in Ægyptum magicarum artium peritissimā,
noua prodigia magicis, vt ipsi putabant, præ-
stigijs importare vellet. Quibus respondit
Moses hoc prouerbio, In urbem olerum a-
bundantem importanda esse venalia olera.
Sæpe enim fieri videmus, vt carissima sit in
singulis urbibus earum rerum annona, qua
maximè abundant, omnibus ad alia loca ex-
portantibus, atque urbem ipsam ferè relin-
quentibus inanem.

טבא חרא בלבלתא חרובתא ממלא צנא דקרי.
*Melius est granum piperis acre, quam cista plena
caryotarum.* Huius prouerbij plana sententia
est, quæ pluris esse sapientē vnum, quàm stul-
tos multos ostendit. acerrimū enim est piper,
vt contrā fatui palmarum dactyli.

תרי קיסי יבשי דחר רטיבא ארקדוה יבשי
: Si fuerint duo ligna arida, & vnum vi-
ride: arida viride illud exurunt. Hoc est, Plures
mali pauciores bonos facilè superant.

זביתא בביתא ביקריא לשמשמי:

Adulterium domi est sicut eruca Sefamo. Vt
enim Sefamum eruca depascitur, sic domum
adulteria labefactant. לפס גמלא שחיבא, κατὰ
τὸν κάμηλον ὁ φόρτος,

Pro Camelo sarcina. Quod est, Versate diu,
quid ferre laborent, quid valeant humeri. Vt pro
Cameli magnitudine & viribus sarcina im-
ponenda est.

טוביה חטא וזיגוד מבגד:

Tobias deliquit, & Zigod plectitur. Zigod quidam Iudæus cum Tobiam in flagitio aliquo deprehendisset, testimonium in eum dixit: sed cum solus testis esset, verberibus vnde quadraginta probè mulctatus est. Ea enim in causis capitalibus leuissima poena erat. Cum ergo nocentes absoluuntur, & puniuntur infontes, hoc dictum vsurpant.

ארבעי לצלא וארבעי לצללא:

Quadra fossori, & quadra occiso.

Quod cum Hesiodi sententia facit, qui panem villici vult esse *πρεσβυτον οκτάβλωμον*.

Hoc adagio indicant naturæ paruo contentæ æquabilitatem.

Alia permulta afferre potuissem, sed ad rem redeundum est.

Christus itaque cum rem *ἀδύνατον* parœmiacè significare vellet, vsus est verbo priscis Iudæis familiarissimo. Nam in Thalmud Pérec haroéh legitur,

ולא פילא דעיל בקמא דמחטא:

Hoc est, non potest *Elephantus ingredi per foramen acus*. Et alio loco,

דילמא מפורמבוריתא את דמעילי פילא בקמא: *Forte è Phomboditha* (ea est vrbs quædam) estu, *ubi immittunt elephantum per foramen acus*.

De quodam agitur, qui rem *ἀδύνατον* effecturum

fecturum se esse pollicebatur, vt est vastissimā belluam per angustissimum acus foramen intrudere velle. Quod vulgari prouerbio facere dicuntur Phomboditani, nempe homines vani & iactatores. Christus tamen pro *elephāto*, quem pauci viderunt, bestiam Syriæ notissimam *Camelum* dixit, quò res planius ab omnibus posset intelligi.

C A P V T X.

De Effathā.

Postulat nunc ratio, vt locutiones quasdam Euangelistis familiares, ac linguæ Syriacæ proprias, quæ in alia nulla reperiuntur, exponamus, earumque vsum doceamus. Ac primùm se offert verbum illud, quo Christus oculos cæco restituens vtitur, ἐφφαθά, effethā, quod Euangelista Mar. optimè interpretatur διανοίχῃτι, *aperire*. Iubebat enim Christus, vt cæcus ille oculorum vsum reciperet, quod Græci dicunt ἀναβλέπειν, vt in suo Pluto ostendit Aristophanes. Hic docendum cur *aperiri* Syriacè id significet, quod nulla alia lingua vsurpat. Nam si Græcè dixeris διανοίχῃναι, & Latinè *aperiri*, nemo vniquam intellecturus est, oculorum aciem restitui. Id eò fit, quòd peculiare sunt in singulis dialectis locutiones, præcipuè tralatitiæ. Quod enim Latini in vitibus *gemmam* vocant, Græci nominant ὀφθαλμοὶ *oculumue*, Galli à trūdendo

quosdam, qui, quod ipsi non intelligunt, statim deprauatum esse clamant. Sed monstremus huius verbi usum. In Vaiicrá Rabbá, vel magno Levítico, c. 18. qui liber Syriacè scriptus est, legimus historiam de duobus viatoribus, è quibus vnus cæcus erat, alter apertus, vel oculorum acie præditus. Quam, cùm mirificè eam locutionem exprimat, huc transcribere non piguit. Verba hæc Syriaca sunt.

עובדא דהה בתרין גברין דהרו עילין לטבריא
 הר סמי דחר פתיח דהה ההוא פתיחא גרש
 לה יתבון למוקטרא בארחה לקטון עשבא
 ואבלון דין דהה פתיחא סמי דין דהה סמיא
 אפתח ולא. עלן מתמן עד זמן דגרש ההוא
 : סמיא לההוא פתיחא: Id est, *res gesta narratur de duobus viris, qui ascendebant in Tiberidem, è quibus vnus erat cæcus, alter phar*
thia apertus, & deridebat ille apertus eum, nempe cæcum. Considerunt, vt rescicerent se in via,
& lectam herbam comederunt: ille qui erat apertus excacatus est, & is qui erat cæcus iffathá,
apertus est, hoc est, oculorum aciem recepit. Nec abierunt illinc, quod ille qui fuerat cæcus derideret eum, qui fuerat apertus.

Hoc afferre volui, vt usum huius verbi atque originem ostenderem, quod hætenus neminè fecisse videbam. Porro an herba vlla extet vel chelidoniū, vel alia, quæ hac vi prædita sit, medici viderint: mihi narrasse satis est.

De Mamona, & alijs locutionibus.

Cætera, quæ in Euangelijis leguntur, hæc sunt. Mamona, Matth. 6. μαμωνᾶ, ממון, pecunia, de hoc suprà egimus in Racá: cap. 7.

Bariona, Matth. 16. βαρ-ιωᾶ, בר-יונה *filius Ioná*, quod columbam significat.

Golgothá, Matth. 27. quanquam corruptè à Græcis detractio altero l scribitur γολγοθᾶ, *cranium*, vel *calua*, mortui præsertim. erat enim cippus Iudæorum.

Geth_semani, Matth. 26. γετσεμανεί. Non est *vallis pinguium*: geth enim Hebraicum nō est: nec *prelum olei*, vt quidam somniat. Sed sunt duo vocabula Syriaca גת שמרי, *pecuaria butyri*. גת geth enim respondet Hebraicæ voci מִקְדָּה, & שמן seman est חמאה *butyrum*. Is enim locus à copia butyri id nomen nactus est.

Elí elí lámá sabachtáni, Matth. 27. quod scribitur Syriacè, אֱלִי אֱלִי לָמָא שַׁבְּכָתָנִי, vel, vt Marcus habet ελ-ηι, אֱלֹהֵי. *Deus mi, Deus mi, cur destituiſti me?* Quæ verba Hebraicè leguntur in principio Pſal. 22. אֱלִי אֱלִי לָמָה עֲזַבְתָּנִי. Sed Chriſtus, qui vernacula Syrorum lingua utebatur, vt ab omnibus intelligi poſſet, verſiculum Pſalmi Hebraici Syriacè pronunciauit. Vox enim El אֱלִי, *Deus*, tam Syris, quàm Hebrais familiaris eſt. Elo-

hi autem, Syriacum est אלהי, quod Hebraicè dicendum erat אלהי elohái. Suspikor tamen Christum *Eli* protulisse, quod propius accedit ad nomen *Elie*, vt indocti homines Christum *Eli* clamantem, *Eliam* inclamare existimarent.

Banc *regés*, Marc. 3. βασιλῆς, בני רגש, non בניא רגש vt habet Munsterus, cum sit syntaxis genitiui: nec בני רעב, vt quidam credunt: cum *raam* Hebraicum sit, *regés* Syriacum, quod *tumultum* & *tonitru* significat. Euangelista rectè interpretatur υἱοὺς βοῶντων, *filios tonitru*. Quanquam scribendum est proculdubio *Banerges* sine o, quod nemo doctus negauerit.

Thalithá cúmi, Mar. 5. θαλιθα κουμι, טליתא, קומי *puella surge*, Hebraicè dicendum erat, עלמא, vt Babylonicè עלמא.

Beth-*esda*, בית עסדא, Ioh. 5. quod librarij errore malè scribitur *Bethsaida*, qui piscinam *Beth-*esda** (nam Græca exemplaria habent βηθ-εσδά) cum oppido *Bethsaida* confudit. Est autem *Bethesda*, *domus effusionis* ab עשדא, verbo Syriaco *effudit*, à sanguine victimarum effuso: hinc Græcè dicitur προβατικὴ, quasi *Victimariam* dixeris. *Bethsaida* autem est בית צידא, *domus piscationis*, ob crebra stagna & lacus.

Gabbatha, Iohan. גבתא, Hebræis quoque *usita*

visitatum esse ait Munsterus, quod nos negamus, cum merè Syriacum sit. גַּבִּיִּיִּיִּי Syriacè est idem quod סֶל Hebraicè, id est, *viam lapidibus sternere*. propterea elegantissime redditur ab Evangelista λιθόστρωτον, quod est *lapidibus stratum, vel tessellatum*. Cuiusmodi multa pavimenta in Hispania visuntur.

Aqel demá, Act. 1. אֶקֶל דְּמָא, *ager sanguinis*, qui Hebraicè diceretur שָׂדֶה הַדָּם *sadéh haddám*.

Tabithá, Act. 9. טַבִּיּוּתָא, Græcè ἡ Δορκὰς, Latinè *Dama*, Hebraicè הַצְּבִיָּה *hazzeviiáh*, vt habes in Cantico.

Beelzebub בעל זבוב, Hebraicè בַּעַל, *Baal*, id est *magister musca*: vt Nicander μύα γρον vocat quendam serpentem.

CAPVT XII.

De Dimitte nobis, & alijs.

MUltæ sunt præterea in nouo Testamento locutiones Syriacæ, quæ cum vel ab Apostolis vel interpretibus mutata non fuerint, obscuram sæpe sententiam efficiunt. Nos aliquot selegimus, quò magis huius linguæ studium ijs, quibus per ætatem & ingenium licet & libet, commendaremus.

Extat in Dominica precatatione illa nobilis phrasis, καὶ ἄφεσις ἡμῶν τὰ ὀφειλήματα ἡμῶν, ὡς καὶ ἡμεῖς ἀφίμεν τοῖς ὀφειλεταῖς ἡμῶν. *Et dimitte nobis debita nostra, sicut & nos dimittimus debitoribus*

toribus nostris. *Dimittere*, vel, vt quidam Latini loquuntur, *remittere debita* Syriaca locutione dictum est, quod est, *delicta condonare*. Vt *debiteres* pro *peccantibus* dicuntur. Quis enim non videt, nec Græcos, nec Latinos hoc modo loqui? Quinetiam Hebræi ipsi similem locutionem non habent. Quod aliquod exemplis explanandum est. *Parcere* quidē & *ignoscere* Hebraicè dicitur, סלח, vel בשא עון, hoc est, *perferre delictum*: Syriacè vero שבק, id est *dimittere* vel *remittere*. Porro qui peccat Hebraicè חטא hattá appellatur, Syriacè חייב haiiab *debitor*, obnoxiusue. Et peccatũ Hebraicè חטא, Syriacè חובה, hoba, *debitũ*. In precatione Salomonis 3. Re. 9. legimus, וסלחת לעמך ישראל.

Et ignoscas populo tuo Israel.

Id à Chaldaeo paraphraste sic redditur, ורשבק לחובי עמך ישראל. *Et dimittes debita populi tui Israel.* idque ter aut quater ibi repetitur. Filij Iacob, Gen. ult. Iosephum in Ægypto supplices alloquuntur, ושא בא בשע אחיך, *parce nunc delicto fratrum tuorum*. Id Chaldaicè versum est, שבק בען לחובי אחך, *Remitte nunc debita fratrum tuorum*.

Ceterum facinorosos vocari חייבין *debiteres*, tam vsitatum est, vt vel mediocriter doctus id facile intelligat, vt Psal. 1. *Et in via peccatorũ non stetit*, Syriace וברחת חייבין לא קם, *Et in via*

in via debitorum non mansit. Hoc videns Lucas, qui Græcè doctus erat, scripsit ἀμαρτίας, peccata, cùm Matthæus habeat ὀφειλήματα. Debitores autem, quod Græcè exprimere non poterat, reliquit. Quid enim, quæso, aliud est peccatum, quàm debitum quoddam, quo nos obstringimus, rationem aliquando, nisi poenitentiae lachrymis tabulas inducamus, reddituri?

Mortuos vocare *dormientes* ob spem resurrectionis, pium est, sed Syriacè tantùm linguæ proprium: quanquam Hebræi dicant, *Et dormiuit cum patribus suis*, mortuos tamen nunquam nominant *dormienteis*. legimus in Thalmud,

Dormientes pro mortuis.

ברה דרב דימי אהילד לה יבוקא ובגו
הלתין ידמין שביב: Filio Rab Demi natus est
infans, & intra dies triginta dormiuit. Tum de
quodam mago sic scriptum est, ההוא אמיגושא
ille magus, qui dormientes
spoliabat. Solus Homerus, poetarum, vt Plato
ait, Deus diuinitus hoc sensit. cum Iliad. ξ. de
virga illa mirifica Mercurij loquens, mortuos
nominat ὑπνώοντες.

Εἶλετο δ' ἐρᾶβδον τῇ τ' ἀνδρῶν ὄμματα θέλγει
ὦν ἐθέλει. τοὺς δ' αὖτε χ' ὑπνώοντας ἐγείρει.

Id Æncid. 4. Virgilius vertit,

Tum virgam capit, hac animas ille euocat orco
Pallentes, alias sub tristia tartara mittit.

Dat somnos, adimūq; & lumina morte resignat.

Quod Homerus mirificè dixerat ὕπνῳ ἔγειραι, quod est dormientes excitare, id obscure & minus aptè vertit Virgilius, *somnos adimere*. Multę enim sunt phrales Homericae Syriacis valde consentaneę ac consonę. Quod, Christo propitio, aliquando à nobis explanabitur. Christiani eam locutionem imitati cippos libitinarios & sepulcra sua

Anto. Ne-
brillen-
sin. Quinqua-
genę c. 12.

Græco verbo κοιμητήρια, cœmeteria, vocitant, quod Latinè veritas licet *dormitoria*.

Deum nomine *cæli* intelligere Syriacum est. Hinc est illud Matth. 21. *Baptismus Iohannis unde erat, à calo, an ab hominibus?* משיחא.

In salutatione angeli legitur, κεχαριτωμένον ἐν γυναιξί. Quod verbum ipse Evangelista fabricatus est, cùm apud Græcum authorem nullum extet. Nec enim vllum erat verbum, quod responderet Syriaco participio רחמימ Rachimtá, quod eam significat, quę gratiosissima atque acceptissima est. Sed iam dicendi finem faciemus, si omniũ Apostolorum nomina cum suis etymis explicauerimus.

Nisi gra-
tiata, quod
in vet. lib.
legitur.

C A P V T X I I I.

De Messia, Maria, & omnium Apostolorum nominibus.

Messias &
Christus.

C Vr Iesus vocetur *Christus*, & *Messias*, omnes intelligunt. משיח masah enim tam

tam Hebraicè quàm Syriacè est *ungere*. Hinc משיח Masiah *unctus*, Græcè χριστός. Sed mirantur multi, cur Euāgelistæ scribant μεσίας, non μασίας, cùm Hebraicè pronuncietur Masiáh. Paulus Ricius vir alioqui diligens scribit *Mosias*, sed ridicula & indocta superstitione. Christus enim Syriacè dicitur משיח Mesihá, sed illa aspiratio Græcè exprimi non potest. rectè ergo Euangelistæ μεσίας scribunt, vt Latini melius scriberent *Mesihias*. Græcè interpretati sunt Apostoli χριστόν, vnde nos *Christiani* nominamur. Porro Iudæi cùm suum *Messiam* tardigradum Græcè appellare vellent, non χριστόν dicebant, ne cum Christianis vel nomine ipso consentire viderentur, sed ἡλειμμένον, hoc est, *delibutum*. Verùm illud obseruandum, quemlibet regem & sacerdotem χριστόν vel משיח vocari posse, Iesum verò κατ' ἐξοχήν propriè τὸν χριστόν, & משיח appellari.

Mariám compositum nomen esse quidam MARIA. putant, & *mare salsum*, vel *stellam maris* interpretantur: sed ridiculè primùm, tum contra Hebraicæ linguæ analogiam. Cùm enim scribatur מרים *miriam*, & bisyllabum sit, omnes Hebraicè docti fatebuntur heemanticum esse ac simplex. Cùm enim præter Mem, tres thematicæ appareant, necessario Mem cum hircæ heemanticum est. Thema itaque est רם

ram, *eminuit*, in quo media quiescit, quæ in deriuato mouetur, vt à קָמָה fit קִמָּה, & Syriacè קִמָּה. *Mariam* ergo, sic enim dicitur Syriacè, vt suprà docuimus, est *excella*, *sublimis* atque *eminens*: quod etymon optimè tam è linguæ ratione, quàm ex merito per gratiam sanctissimæ Virgini conuenit.

Petrus Cephā.

Simō Apostolorū princeps Syriaco nōmine à Christo כֶּפֶה *Cephā* appellatus est: quod Euangelistæ πέτρον rectè interpretantur. Latine autem non tam benè nec propriè redditur *Petrus*. Quod facilè me viris prudentibus probaturum confido, atque interim scrupulum illum exempturum, qui hactenus multos torlit: *Tu es petrus, & super hanc petram ædificabo ecclesiam meam*. Cū enim constet Christum Syriacè fuisse locutum, ex ea lingua rationem petere debemus. Nam cū cognomine aliquo Simonis Ecclesiæ principis futuri, in eoque pastorum aliorum soliditatem atque cōstantiam exprimere vellet, indidit ei Syriacum nomen *Cepha*: quod si Latine reddatur, significat *durum lapidem*, vel *cautem*, cui respondet Hebraicum סֶלֶע. Cuius rei vim in parabola pij hominis qui auditum verbum conseruat, atque opere perficit, Christus exhibuit. Porrò id proprium nomen non est, sed cognomen à tralatione sumptum. Euangelistæ quidem, qui Græcè scripserunt, *Cephā*
elegant.

elegantissimè atque aptissimè interpretantur
 πέτρον, quod *lapidem saxumve* significat. At
 Latini tam commodè reddere non potue-
 runt, ne nescisse dicam, quàm Syri & Græci.
 Nam lingua Syrorum כפא cepha *lapidem* so-
 nat, & nomen Apostoli refert, idque sine vlla
 literarum varietate. Quin etiam Græcè πέ-
 τρος tam pro *lapide* accipitur, quàm pro Apo-
 stolo. Latini hanc felicitatem assequi non po-
 tuerunt. Cùm enim Petrum dicunt, hominē
 tantum intelligunt, lapidem non item. Nisi
 voluissent dicere, *Lapis*, vel *Petra*, quæ cùm
 homini, tum ipsi rei aptè quadraissent. Hinc
 facile solui potest quæstio illa, *Tu es Petrus, &*
super hanc petram ædificabo Ecclesiam meam;
 vel si Syriacè pronunciatur hoc modo,

אנת כפא ועל כפא הדין אבני ית צבורי:

Ant cephá veál chephá hadén ebnè iath
 gibburí (hoc enim modo locutum fuisse
 Christum omnes Syriacæ linguæ docti con-
 cedent) id est, *Tu es lapis, & super hoc lapide*
(super te, tuâque fide, & ceterorū pastorum)
ædificabo Ecclesiam meam. Illi enim Christi o-
 uium cura commissa est: ipse primus Evan-
 gelium annunciare cœpit, & primus in carce-
 rem detrusus, verberibusque propter Christi
 nominis confessionem multatus est. Hic e-
 nim Ecclesia non substructiones atque ædifi-
 cia, sed Christi fidelium multitudinem refert:

E s

quam,

quam, instar cautis solidissimæ, Simon Cepha instituit, confirmavit, atque in fide Christi constabiliuit. Hæc facile rudes contemnent, quorum iudicium nihil moramur.

Andreas.

Andreas Græcum est, vt Philippus: ille virilis & fortis, hic bellicosus, qui equis delectetur, reddi solet.

Iacobus.

Iacobus Hebraicum nomen est, Græcè ἐπισκελιτής, Latine supplantator.

Zebedæus, זבדי, liberalis & munificus.

Iohannes, ירחב, graciosus & misericors.

Bartholomæus.

Bartholomæus non est filius Ptolemæi, sed filius Thalmái, quod nomen in Biblijs legitur multis antè seculis, quam Ptolemæus vllus natus esset. *Telem* Hebraicè sulcus est.

Matthæus, donum dei, Græcè Δωσίθεος, vel Theodorus.

Thomas, Syriacè תאומא, Græcè, vt Evangelista interpretatur, δίδυμος, Latine Geminus.

Nonnus in
Paraphrasi
Euang. lo-
annis.

Vt mirer, quid Nonno in mentem venerit, vt Thomam binominem faceret. Cum idem nomen sit Thomas, δίδυμος, & Geminus, vt *Messias*, *Christus*, & *Unctus*. sed linguarum ignoratio magnis etiam viris errandi aniam præbet.

Alphæus, אלפי, est doctus, vel doctus.

Thadæus, תדי, Syriacè non à confessione, vt quidam putant, alioqui diceretur *Thodæus*: sed

sed à תר voce Syriaca, quæ *mammam* vel *papillam* significat. Est enim Thadæus à *Mamma*, vt Lebbæus לבי à *corde* dictus. D. Hieronymus elegantissimè *Corculum* vertit. Ofiander à *Leone* ductum credit, sed errat. Syriacè enim *Leo* non לביא, sed אריה dicitur.

Simon Cananeus perperam scribitur à Latinis, cùm scribendum proculdubio sit *Cannæus*, vel *Cannita*, vt Græcè quoque κανίτης. Nisi Evangelistis credere nolumus, qui ζηλωτήν *zelotem* vel *emulatorem* interpretantur, Porro *zelator* Hebraicè & Syriacè dicitur קנא *Canná*: scribendum ergo Latinè *Cannæus*, vel *Cannita*, Græcè κανίτης. Nam *Cananeorum* nomen, quod crebrum est in Scripturis, librarijs parum doctis imposuit.

Judas Iscariota, Christi proditor, vnde id nominis nactus sit, nemo hæctenus explicauit. Nam qui à שכר *facár*, *mercede* deducunt, Hebraicè nesciunt. Quid enim faciemus *Iscariota*, quæ ad nomen necessario pertinent? Ea res diu me exercuit, cùm rationem nullam saltem verisimilem inuenirem, & scirem hac ætate, qua literæ omnes bonæ florent, nihil temerè asseuerandum, nisi quis γενναῖα καὶ ἀνδρεία ὀφλισκάνειν cupiat. Sed confido me veram huius nominis rationem inuestigasse, quam alijs quoque vt probem, operam dabo.

Judas Iscariota, à patria sic dictus.

Cùm enim docti omnes, & in lacris literis exerci-

exercitati, Apostolos omnes Iudæos fuisse cō-
sentiant, quod multis argumentis euincere
possemus, eius nominis analogiā ex Hebræo-
rum libris petamus oportet. Omnes itaque
vel à familia, si nobiles fuerint, vel ab aliquo
euentu, aut postremò à patria, præsertim ig-
nobiles, cognomen sumunt. Nos asserimus
Iudam proditorem à patria sua *Iscariotam*
appellatum. Quoniam constat ex libro Io-
hæ, cap. 15. & alijs multis locis, *Carioth* oppi-
dum esse in Tribu Iuda, quod Hebraicè scri-
bitur קריות: & scimus omnes qui à patria
describuntur, vocari *eius loci viros vel filios*, sed
præsertim viros. Quod Ezræ 1. passim legi-
tur. *Filij Beth-lehem centum & vigintitres. Viri*
Netophá quinquaginta sex. Viri Anathoth cen-
tum viginti octo. lege id caput, & Nehe-
miam cum Paralipomenis. Si enim velis vo-
care Romanum, dices איש רומי *Is romé, vi-*
rum Romæ: si Ierosolymitanum, איש ירושלם
Is Ierusaláim, virū Ierusalem. In Pirque aboth
habes, אבטיגנס איש סבב *Antigonos il socó,*
Antigonus vir soco. i. Socæus. Sic, יוסי בן
Iose ben Ioézer is Seréda,
Ioses filius Ioezer vir Sereda, i. Seredæus: quæ
Ieroboami patria fuit. Alia innumera afferre
potuiflem, sed ex his, quod volumus, prudētes
intelligēt. Dicimus itaque nomen proditoris
fuisse, קריות, יהודה איש, *Iehuda Iscarioth*, id
est,

est, *Iudas vir Carioth, vel Cariotensis*. Vbi sunt ergo isti, qui Iudam Gallū natione fuisse non tam malignè, quā indoctè contendunt? Cæterum Evangelistæ, qui libenter nomina Hebraica & Syriaca retinēt, cū præsertim vulgò ab omnibus *Iscarioth* appellaretur, scripserunt *ισκαριώτης*, adiecta Græca forma, quod fecerunt in omnibus proprijs nominibus.

CAPVT XIV.

De Pane quotidiano, in oratione Dominica.

Hic præfationi nostræ eam Coronidem addere statuimus, qua piorum animi delectari possint, nempe eam precationē, quā discipulis suis Christus ac proinde Christianis omnibus Syriacè tradidit. Nos bona fide singulis etiam verbis accuratissimè collatis, Syriacè scriptam pijs ac doctis asserimus. Cæterum, quoniam verbum vnum, quod tanquā scōpulum omnes, præter vnum diuum Hieronymum, præteruecti sunt, diu ac multum nos sollicitos habuit, cū quid esset *panis*: ille *ἰπιούσιος*, non reperiremus: ac ne alium quidem vllum, qui eius originem aperiret, haberemus. Sed hīc illa clausula utar, ne quis me, quod semel Ecclesia recepit, conuellere existimet: cū pro virili parte, quanquam parui parua conamur, Christi Ecclesiam ornatam atque auctam cupiā: cū præsertim hęc doctis, non plebi proponamus: &, quod maximum

mum ducimus, Hieronymum sequamur, & postremo non tanquam dogma obtrudamus, sed Theologorum iudicio relinquamus perpendendum.

Videmus itaque omnes feriè vertere *quodidianum*, quod linguæ Græcæ ratio non patitur. Id eò libentius dicimus doctissimo hoc atque acutissimo seculo, vt omnes intelligant me nihil de meo asfluere aut confingere posse. Nego enim ἐπιούσιον in Græco authore vlllo significare *quodidianum*, ac ne legi quidem apud vllum scriptorem nisi sacrum. Quod si falsum est, conuincat à tot viris eruditissimis manifesti mēdacij. Verùm ea est veritatis vis, vt nullis possit expugnari calumnijs. Quidam interpretantur *substantialem* vel *super substantialem*, sed contra Græcæ linguæ analogiam, quæ postularet ὑπερούσιον, & οὐσιώδη, vel saltem ἐπούσιον: nisi dicere libet ἐπουράνιος; & ἐπὶήμερος, ἀντὶ τῆς ἐπουράνιος & ἐπὶήμερος: quæ nemo Græcè sciens risu nō excipiet. Hæc qui Græcas literas non attigerunt, faciliè contemnent. Sed nos cum doctis agimus, qui id verissimum esse fatebuntur. Solus D. Hieronymus, quem sequimur, huius loci difficultatem sentiens, vt qui Græcè doctissimus esset, & noui vocabuli, quod architectatus fuerat, Matthæi interpres, rationem quærens: Euangelium Hebraicum, quod penes Nazaræos

Ber.

Berrhææ afferuabatur, consuluit: in quo scri-
ptum reperit מחר mahár, quod *cras* significat,
& cum articulo *crastinum*, hoc modo, לחמן,
לן יומנא דמחר הב Panem nostrum *crastinum*
da nobis hodie. Porro cùm Matthæi interpres,
quem multi Iohannem Euangelistam fuisse
aiunt, nullum vnum Græcum nomen vide-
ret, quod responderet Syriaco דמחר Dim-
hár (Græci enim, quod *crastinum* referat, ver-
bum nullum habent, sed *cras* ἄυριον dicunt.)
Cùm igitur hoc videret interpres, & sciret τῇ
ἐπούσῃ pro *postridie* ab omnibus accipi, no-
men nouum, aptum tamen & significans, ser-
uata analogia, formauit ἐπιούσιος, & reddidit
verba illa Syriaca, τὸν ἄρτον ἡμῶν, τὸν ἐπιούσιον
δὸς ἡμῖν σήμερον. Nomina enim, quæ à partici-
pijs deducuntur, à fœminino fiunt, vt οὐσία,
& οὐσιώδης ab οὔσα, non ab ὤν, neque ὄν.

Quauis igitur demas ab οὐσία dici posse
 ἐπιούσιος, vt ἐπίορκος ab ὅρκω, significatus ipse
 verbi Syriaci, quo Christus vltus est, repug-
 nat. Porro Græcos scripturę interpretes noua
 multa excudisse vocabula, nemo, qui eorum
 scripta euoluerit, inficiabitur. Ea enim est vis
 Hebraici & Syriaci sermonis, vt linguę Græ-
 cę vbertas atque felicitas, inopiam suam ag-
 noscere, & noua fingere nomina cogatur. de qua vo-
 ce sup. cap.
 11. extre-
 mo.

Quod fecisse ostēdimus Lucam in κεχαρίω-
 κήν. Quinetiam Septuaginta pleraque inno-
 uarunt,

uarunt, vt illa ἐρωτίζεν, ἀκούτιζεν, & ὀφθαλμιζεν, quæ si Latine vno verbo reddas, dicendum erit, *inauricularē, audificare, & manicare*: quæ durissima essent, cum vltatiora sint, *præbere aureis, nunciare, & manē surgere*: non minus duriter illa Græcas aureis feriunt. Alia multa afferre possem, quæ domi illorum nata sunt. Ceterum quomodo intelligendum sit, *Panem nostrum crastinum da nobis hodie*, Theologis expendendum relinquemus: nos certè sententiam ex antitheto elegantissimam esse cernimus. Verum nostro officio satisfactum esse credimus: si quod intelligere potuimus è ratione linguarum, quarum si cognitionem aliquam nobis tribuamus, iure id nostro facere videamur, cum in ijs totam penè ætatem contriuerimus, id candidè in medium proferamus. Tum magnorum erit Theologorum, sententiam, quæ certè impia non est, cum auctorem habeat Hieronymum, exponere.

Vt enim in Ecclesiæ incunabulis alij, teste Pauli 1. Corinth. 14. *loquebantur linguis*, alij *prophetabant atque interpretabantur*, quod minus longè est præclarius atque vtilius: nec alij alijs inuidebant. Sic cum multis prophetandi & interpretandi sacras literas scientiam cedamus, nemo nostris studijs, quæ ad peregrinarum linguarum illustrationem, & sacrarum literarum aliquod emolumentum spectant,

stant; obloqui aut obstrepere debet. Si quis tamen sententiam nostram audire cupiat, hoc modo intelligi non impiè nec incommode posse existimo.

Iusserat Christus ne quis de crastinis esset sollicitus, cum cuique diei sufficiat malitia sua: tum quòd ea cura animos maximè à pietatis cogitatione auocet atque abducatur. Cùm enim constet auaritiam omnium ferè vitiorum procreatricem atque altricem esse: si quis crastina curare non stultè, sed piè desierit, is profectò paruo contentus, cupiditatibus omnibus ablegatis, totum se pietatis culturæ dedit: quod ardentissimè suis optat Christus. Verùm quoniam humana imbecillitas sibi semper timet, & deteriora auguratur, præcipit Christus vt patrem rogemus, qui nostræ infirmitati prospiciat, nobisque pridie præbeat, quantum sufficere possit postridie. *Panis* enim nomine, cibus omnis necessarius Hebraicè significatur.

Id mirificè cum veteris Testamenti figura consentit. Vt enim Exod. 16. Deus Israëliticum populum in solitudine *Manna* septimò die colligere vetuit: sed ne fame periret, sexto die, qui dicitur *παρασκευὴ*, vel *preparatio*, duplam mensuram, quæ ad biduum satis esset, sumere permisit. Vt etiam Leui. 25. septimò anno, quod est sabbatum sabbathon Dei,

agros feri, & vineas putari, ac denique terram coli vetuit: sextio tamen anno tantam rerum vbertatem pollicitus est, vt toto triennio affatim ali omnes possent. Vt postremo post septimam annorum hebdomadam, cum Iobilæus celebratur, quiescere omnes iussit, terramque coli, ac fructus sua sponte nascentes legi interdixit. Tum eos omnes, qui ob æs alienum nexi ante Iobilæum fuerant, liberari: pauperes & obæratos, qui sua bona vendiderant, in antiquas possessiones redire imperauit.

Sic fideles suos optat Christus, dum mortale corpus circumferunt, quasi sabbatū quietis, & Iobilæum libertatis assidue expectent, in parasceue perpetua esse: vt postridie singulorum dierum quiescendum esse sperent: ne rerum futurarum cura à pietatis continenti meditatione auocentur. Quod etiam Pythagoras suo symbolo præcepit, τὰ σκευὴν οὐκ ἀμείναι ἔχειν: nempe vt semper sarcinulas compositas habeamus. Rogemus igitur omnes quotidie Patrem, vt nostræ imbecillitatis misertus, *panem nostrum crastinum det nobis hodie*: aliâque omnia Dei opt. max. prouidentiz committentes, cum solum speremus, qui Christi filij sui meritis post diuturnam seruitutem, ærumnosamque paupertatem, iam iamque aduentante Iobilæo, liberali nos affe-

rat causa manu, atque in antiquam cælestis Ierusalem mittat possessionem.

F I N I S.

Precatio Dominica, quam Christus suos docuit, lingua Syriaca fideliter expressa.

צלוחא דאלף בה ישוע משיחא מרן לתלמי-
דיו ולכל משיחאי :

אבונן דבשמיא יתקדש שמך תיתי מלכותך
תתעבר דעוחד היכמא בשמיא כן בארעא לחמן
דמחר הב לן יומנא ושבק לן ית חובינן
היכמא דאף אנן בשבק לחובינן ולא תעיל
יתן בבסיונא אלא ברוק יתן מן בישא אדידודך
היא מלכותא וגבורתא ויקרא לעלמין אמן :

Abunán debismaiîá iithcaddés semách the-
thé malchuthách iithaabéd reuthach hech-
má bismaiîá qen bearaá lahmán dimhár háb
lán iomána vřbúc lan iath hobenán hechmá
deuph anán nis búc lehaiiabená, vela theaiîél
iathan benifioná, ellá pherúc iathan min bisá
are didách hi malchuthá vgburthá vicará
lealmín. Amen.

Salutatio Angelica Syriacè.

שלם לך מרנם רחִימֶתָּא יְהוּה עֲמֶיךָ בְּרוּכָתָא
אַת בְּבָשִׁי אֲרִי אַת יִלְדָּת יֵת בְּרוּקָא דְּנַבְשָׁתָן:

Selám lec Mariám rehimthá, Adonái im
méch, berichthá at binlé, aré at ielídh iath
pharocá denaphsathán.

תהלה לאל חי:



ANTONII
NEBRISSENSIS
QUINQVAGENA,

SEV
QUINQVAGINTA

S. Scripturæ locorum explanatio ; ordi-
ne Alphabetico.

CAPVT I.

Arcentina & china ligna quæ sunt.

IN Secundo Paralipomenon volu-
mine Cap. 2. vulgo legitur, *Sed &
ligna cedrina & arcentina & pinea
mitte mihi.* antiqui codices habent,
*sed & ligna cedrina, & cupressina, & archeutina,
& pinea mitte mihi,* sed ei quod est pinea in
hebræo nihil respondet. Pro eo vero quod
in omnib. prope libris latinis legitur *archen-*
rina: suspicamur debere scribi *archeutina,* sed
neutrum quid sit enarratores dicunt. Quicun-
que tamen ille fuit qui dictiones sacræ scrip-
turæ in ordinem alphabetarium redegit: vi-
detur habuisse codicem in quo pro *archeuti-*
na: china tantum legeretur, sed ex eo nihilo
plus intelligas: quam quod ligni genus illud
sit. Nos vero lectionem veram esse asseuera-
mus *archeutina:* id quod in codicibus anti-
quis & recentioribus legitur: vna tantum

78 ANT. NEBRISSENSIS
litera aspirata ex penultima in tertiam à fine
syllabam reiecta : cùm alioqui *archentina* sit
nihili verbum. Sed an *thina* in eo loco pos-
sit legi, postea disputabitur. Nunc verò *arcen-*
thina materia quæ sit inuestigemus: & an tem-
plorum structuris conueniat. A *pneudos* Græ-
cè, Latinè interpretatur *iuniperus*. Inde est *ar-*
cheutinus. a. *um* ea forma qua à cedro *cedri-*
nus: à cypresso *cypressinus* inflectitur. Atqui
iuniperi materia quemadmodum & *cedri* pro-
pterea quod cariem non sentit, nec teredini
obnoxia est: templorum ædificijs accommo-
dari consuevit. Auctor est Theophrastus. Vi-
truius in libris de Architectura. & Plinius
lib. 16. naturalis historiæ: qui narrat duo fuisse
se templa clarissima: alterum Vticæ in A-
phrica sacrum Apollini: vbi cedrorum tra-
bes suo tempore durabant: (ita vt positæ fue-
re à prima vrbis origine annis mille circiter
ducentis.) Alterum in Hispania sacrum Dia-
næ à Zacyntho aduectæ cum conductoribus
anno ducentesimo ante excidium Troiæ: cui
pepercit Hannibal religione inductus, *iun-*
iperi trabibus adhuc sua ætate durantibus.
Iam vero inter excidium Troiæ & Plinij æ-
tatem non multo pauciores quam mille qua-
dringenti anni intercedunt: quibus si ad-
das ducentos fiunt sexcenti supra mille an-
nos. Itaque non sine causa hæc duo potissi-
mum

num genera materie petit Salomon ab Hiram Tyrionum rege ad templi quod Domino edificaturus erat cōstructionem. Sed peculiariter Theophrastus lib. 1. de stirpibus scribit *utiliorem esse iuniperum ad rem edificatoriam, tum subdialem, tum obruendam sub terra.* durat enim, ut dicit, immunis putredine. Sed cum Hieronymus rectè sit interpretatus *אֶרְזִים* arazim in *cedrina*: rectè quoque *בְּרֹשִׁים* berosim in *cypressina*: videamus an rectè verterit in *Archeutina* *אֶלְגֻמִּים* algumim siue almugim: nam vtrumque legitur ex illorum consuetudine: qui plerumque literas & syllabas inuertunt. Quod si rectè interpretatus est hoc in loco: perperam in. 3. Reg. c. 10. trātulit. Sed *Ecclasis* inquit *hiram attulit ex ophir ligna thyina multa nimis: fecitque rex de lignis thyinis fulcra domus domini.* & paulo post. *Non sunt allata huiusmodi ligna thyina neque visa vsque in presentem diem.* Huius quoque materie meminit Ioannes in Apocalypsi capit. 18. *Omne, inquit, lignum thyinum & omnia vasa eboris, &c.* Aut igitur in alterutro loco mendum est librariorum, aut in Paralipomenis speciem pro genere posuit: in tertio Regum ipsum tantum genus lignorum. Sunt autem *ligna thyina*, quæ odorem optimū spirant, qualis est cedrus, cypressus: & de quo nunc agitur *iuniperus*, qua nulla est arbor odoratio-

dicta *Thyina* à *Thúo* verbo græco, quod est odorem emitto. Est tamen quædam ratio quæ nobis persuadere possit *algumum* non esse ἀλγυμῶν hoc est *iuniperum*, quod pro *iunipero* Hebræi vocabulum habent proprium. scilicet *rothem*. ut in 3. Regum volumine cap. 19. Cum venisset inquit *Heliás* & sedisset subter vnam *iuniperum*. & paulo post. Et dormiuit in vmbra *iuniperi*. quibus in locis רותם *rothem* legitur. Eodem nomine fuit vna ex duabus & quadraginta mansionibus: de quibus in libro Numerorum cap. 33. de *Asereth* inquit *venērunt in rethma*: profectique de *rethma*, castra metati sunt in *Rhemonphates*. Nam רותם *rothem* & רתמה *rethma* ex eadem origine idem significant: hoc est *iuniperum*: solaque habitudine differunt. Hieronymus in epistola ad Fabiolam de quintadecima mansionem: *Rethma* inquit *transfertur in iuniperum* hoc est ἀλγυμῶν. Idem quoque author in translatione iuxta hebraicam veritatem in psalmo. 119. pro eo quod nos ex editione Luciani martyris habemus. *Sagittæ potentis acutæ cum carbonibus desolatorijs*: ipse cum carbonibus *iuniperorum* interpretatus est: pro eo quod in Hebræo רתמים *Rethamim* habetur. Sed quod *rethamim* ab eo quod est *rothem* siue *rethma* inclinetur: nemo mirari debet: cum Hebræi huiusmodi inflexionibus plærunque vtantur.

Artemon quid.

LVcas in Apostolica historia describens tempestatem illam qua Paulus Apostolus fuit in mari deprehensus: *Leuato inquit artemone secundum aure flatum tendebat ad litus. Artemonem omnes interpretantur, veli quoddam genus esse: idque videtur ordinis contextus insinuare: sed nullo autore probant.* Vitruuius certe in libro de architectura. 10. trocleam esse dicit ad subleuanda onera excogitatam. Immo vero machinam quæ tres habeat trocleas: quod latinum esse vocabulum his verbis ostendit. *In radice inquit machinæ collocatur tertia troclea. eam græci ἐπὶ δρυὶ α:* nostri artemonem appellant. Ilidorus dictiōnem esse græcam male putat: cum per. th. aspiratum debere scribi præcipit. Nulla enim dictiō latina per th scribi potest: sed neque per aliquam aliam consonantem aspiratam. Nec obstat quod Lucas in græco eo vocabulo utitur: Nam & græci multa vocabula cum ipsis rebus à Romanis acceperunt: neque id tantum nominibus proprijs, sed etiam appellatiuis. quod licet videre in Dioscoride: Galeno: Paulo Ægineta: Plutarcho: Strabone: alijsque Romanarum rerum scriptoribus. Quid quod illi qui cum Paulo vehabantur, magna ex parte Romani erant: atque etiam

navis ipsa forte Romana ut credibile sit illos Romanè fuisse locutos: & Lucam vocabulo Romano usum. Meminit *Artemonis* Iabolenus libro ultimo Digestorum in titulo qui est de verborum signific. l. malum. *Malum* inquit *navis esse partem : artemonem non esse, Labeo ait.*

CAPUT III.

Azotus pro asdod.

Mirantur Hebræi neque possunt reperire quenquā, qui possit causam reddere, cur septuaginta primū interpretes: atque deinceps illi qui sacram scripturam interpretati sunt; quasdam literas in alias quæ videbantur multum dispares, immutarint: ut quod apud illos legitur אַשְׁדּוֹד *asdod* per *sd*. literas, quæ est ciuitas Palæstinæ nobilissima: cuiusque sacra scriptura toties meminit: quid venit in mentem non modo ipsis interpretibus, verum etiam sæcularum literarum scriptoribus, ut pro *asdod* *azoton*, hoc est *sd* in *z* mutarent. Atque è contrario pro eo quod illi habent עֶזְרָא *Ezra*, quo nomine fuit nominatissimus ille scriba legis, per *z* literam, ipsi *Esdras* per *sd* interpretentur. aut quid simile habent *sd* cum *z*, aut *z* cum *sd*: ut alterutræ pro alteris ponerentur. Atqui si reduxerimus ad memoriam, quod in libello de potestate literarum scripsimus, omnis causa dubitandi

bitandi fuerit sublata. Dicebamus ex Græcorum autoritate, quibus z litera cum Hebræis communis est: hanc literam compositam esse ex sd: atque in pronuntiatione tantundem pollere. Quem vero sonum litera per se habeat, illic ostendimus. neque enim is est, quem tempestatis nostræ homines græci & latini putant, & qui à vulgo profertur, sed alius multum dissimilis ad z literæ sonum proxime accedens. Quid igitur mendosi, si eiusdem potestatis literę alię in alias mutatę sunt? Quamquam id non potuisse nec debuisse fieri in eodem opere est à nobis disputatum, cùm de x litera differebamus: quod apud Hebræos quoties duæ consonantes inter duas vocales obuenerint, prior ad præcedentem, ad sequentem posterior pertinet. quare prior apicem seba supponunt, vt illud ipsum ostendant. Atqui si *azotus* per z scribatur, manifestum est totam illius vim sequenti vocali incumbere: cum apud Hebræos diuisa sit. & si rursus *Ezras* per sd scribatur ex ordine consonantium apud græcos & latinos, sd ad syllabam sequentem pertinebunt.

CAPVT IIII.

Aurichalcum.

IN Apocalypsi Ioānis Ca. i. legitur. *Et pedes eius similes Aurichalco sicut in camino ardenti.* Sed antequam de *aurichalco* siue *orichal-*

cho, differatur de translationis puritate disputandum est. Nam in græco non ὀρείχαλκον sed χαλκολιβάνος habetur, quod verbum ex verbo latinè valet æreum siue masculum thus. Sic enim apud græcos χάλκεον pro masculo & forti accipitur, quemadmodum apud latinos æreus siue æneus siue aheneus, vt apud Horatium in 3.ca.

Inclusam Danaen turris ahenea.

Et apud eundem in pri. Epi.

Hic murus aheneus esto:

Nil conjicere sibi, nulla pallefcere culpa.

Quod vero thus sit potius intelligendum quàm orichalcum satis ostendit quod subditur: *sicut in camino ardenti*, ac si dicat quasi thus in igne. Thus autem accipere debemus non hoc nostrum adulterinum quod spirat furdum nescio quid turbidumque: sed quod affertur nunc in Hispaniam ex Arabia, Sabæa atque Carmania. Id enim igni impositum cum sua uiolentia puras atque fumo defæcatas corripit flammæ. Hinc apud Orpheum in hymnis frequens est titulus *chalcolibanos* in Apollinem, in Latonam aliosque deos. i. masculum thus siue masculi thuris sacrificium, quæ admodum apud Verg. in Bucolicis legimus.

Verbenasq; adole pingues, & mascula thura.

Cur vero interpres ex χαλκολιβάνω orichalcum verterit: illam suspicor fuisse causam: quod

quod cum λίβανος duo significet, lachrymam ex virga thurea, & montem Phœnices atque Decapolitanae regionis communem, ex χαλκός quod est æs & ὄρος mons, orichalcum est interpretatus: ac si diceret æs montanum. Nam quod vulgo dicitur *aurichalcum* nulla ratione defendi potest: tum ex illo principio omnium consensu recepto, non solere fieri compositionem ex latino & græco: tum etiam auctoritate & ratione. Ratio autem illa nimirum est quod in carmine semper reperitur prima brevis. Vergilius. 12. *Æneid.*

Alboque orichalco

Circumdat lorica.

Horatius quoque in poetica,

Tibia non ut nunc orichalco innēta tubæque

Æmula.

Aurichalcum vero non posse dici, Sextus Festus Pompeius auctor est. *Aurichalcum* inquit quidam putauerunt compositum ab ære & auro. Sane vero orichalcum dicitur quod in montosis locis inuenitur. mons etenim græce ὄρος appellatur. Quam rationem secutus interpretes orichalcum siue *aurichalcum* posuit pro masculo thure respiciens alteram videlicet libani significationem, hoc est montis Syriae Palaestinae. Post huius observationis nec adnotationem, cum ad curiam regiam profecti ceteri diuersi paululum ab itinere ut Ioannem Fontecam

cam Pallantinum episcopum obiter salutarem, qui eo tempore Pallantiæ morabatur. Cumque more meo illius vrbis bibliothecas excuterem, lustraremque cœnobium diui Pauli, quod à fratribus dominicis habitatur, incidi in vetustatis adorandæ commentarios super Apocalypsim Ioannis, ab incerto quodam auctore scriptos; in quibus huiusmodi erat lectio: *Et pedes eius similes aurichalcolibani*. Quæ verba in ipsius auctoris expositione iterum atque iterum repetuntur. Interpretaturque *libanum* in *albedinem*, cùm à sensu literalì discedit. Sed bone I B S V quanta est veritatis vis: quæ quanquam vndique labefactetur, semper tamen relinquit sui vestigia, & quasi anfas quasdam, per quas ad illius inquisitionem demonstratiōnemque perueniri possit. Nam quis ex lectione illa non videt ab interprete locum illum sic principiò fuisse conuersum. *Et pedes eius similes chalcolibano*, id est, masculo thuri, deinde ab ignorantia librariorum adiectum fuisse *auri* & detractum *libano*, siue *libani*: quod habet lectio codicis vetusti, tametsi vitiose scripta pro *libano*. Nisi quis malit imperitiæ arguere interpretem: qui cùm *libanus* duas, vt diximus, habeat significatiōnes, hoc est thuris lachrymarum, & montem palestinae: relicto sensu quem auctor intelli-

intelligebat : alterum malè cohærentem elegerit in hunc modum vertens. *Et pedes eius similes chalto, id est, æri libani, id est, ex monte illo Palestinæ conflato.* Atqui Græci in ijs commentationibus quas nobis videre contingit omnes exponunt χαλκολίβανον pro ἀρσενολιβάνῳ, siue ἀρσενολιβάνῳ, id est, pro masculo thure.

C A P V T V.

Bethsaida pro Bethesda.

PR O eo quod in Ioanne cap. 5. nos habemus. *Est autem Hierosolymis probatica piscina, quæ cognominatur Hebraicè Bethsaida : in Græco Euangelista sic scripsit. Est autem Hierosolymis in probatica : aut quemadmodum codex Pallantinus, & alij habent super probatica, tunc interpungendo sequitur : piscina quæ cognominatur hebraice bethesda, ut sint apud latinos tria errata. Primum quod in præpositio est detracta. Alterum quod probatica & piscina, perinde videntur esse coniuncta ac si esset adiectivum cum suo substantivo: cū sint, ut diximus, interpungenda. Tertium quod pro Bethesda legitur Bethsaida. Est autem Euangelistæ sensus, quod Hierosolymis in probatica, (hoc est in septo siue ovili siue pecuario, in quo pecudes cogebantur ut inde distraherentur siue ad sacrificiū siue ad lanienā) est piscina, quæ cognominatur hebraice*

braice בית אשרא beth-elsda. Itaq; probatica
 substantiuè accipitur ab eo quod est *probati-*
cus. 1. *vm.* quod πρόβατον est ouis : vt sit *hec*
probatica. 2. mansio ouium: quemadmodum
 dicimus basilicam & regiam domum regis
 citra nominis substantiuì expressionem. *Be-*
thesda vero interpretatur domus effusionis:
 quoniam in eam piscinam confluebant a-
 quæ siue pluuiiales siue ductiles. אשרא *Elda*
 namque & אשרוד *Asdod*: quo nomine prius
 fuit dicta quæ postea sit cognominata *Azo-*
tus ciuitas nobilissima Palæstinæ: interpreta-
 tur *effusio*. Sunt autem, vt Eusebius Cæsarië-
 sis atque diuus Hieronymus scribunt : in ea
 domo duo lacus: quorum vnus hibernis plu-
 uijs adimpleri solet: aliter mirum in modum
 rubens quasi cruentis aquis antiqui in se ope-
 ris signa testatur. Nam vt inquit hostias in
 eo lauari solitas tradunt. Atqui in 2 Paralip.
 libro capit. 4. vbi de templi ædificatione agi-
 tur: non in lacu, sed in conchis æneis lauari
 consueuisse hostias traditur *Fecit inquit Sa-*
lomon conchas decem, & posuit quinque à dex-
tris & quinque à sinistris, vt lauarent in eis om-
nia quæ in holocaustum oblaturi erant. Sed cre-
 dibile est post templi euerzionē non in con-
 chis illis quæ à præfecto regis Assyriorum siue
 alterutro ex illis erant iam Babylonem tran-
 slatę: sed in piscina illa lauari solitas esse ho-
 stias.

stias. Neque enim in eo nūc laboramus, an in piscina lauari consuetum fuerit hostias immolandas, sed vt vindicetur restituaturque in pristinam atque proinde veram scriptionem locus ab incuria librariorum vitiatuſ, qui nominis vicinitate decepti, pro *Bethesda* scriptitarūt *Bethsaida*. Cū sit בית צידה *Bethsaida* Galilææ ciuitas prope Genesareth stagnum, Petri, Andreæ, & Philippi apostolorum patria: interpreteturque *domus venationis*. *Bethesda* vero vt diximus, *domus effusionis*, aquarum videlicet eo influentium. Quare illi qui piscinam *Bethsaidam* domum venationis interpretantur, dupliciter peccant: & quod vitiatam lectionem non agnoscunt: & quod alieni nominis interpretationem sensui accommodāt quem ipsi fingunt: non qui lectioni debetur.

CAPVT VI.

Bethdagon.

IN primo Reg. volumine. c. 5. legimus his verbis. *Tulerunt Philistym arcā Dei: & intulerunt eam in templū Dagon, & statuerunt eā iuxta Dagon, & quæ sequuntur. Cecidit autem Bethdagon in sortē tribus Iuda, vt colligitur ex libro Iosue. Fuitque in collimitio duarum tribuum, Isaschar videlicet & Zabulon: vt in eodem volumine habetur. In primo præterea Machabæorū. Intrauerunt inquit in Bethdagon idolum suū vt ibi se liberarent. & sequitur. Tem-*

G

plum

plum dagon & omnes qui fugerant ad illud, Iona-
 than succendit igni. Qui hunc locum enarraue-
 re: nihil aliud dicunt quā דגון dagon ex lingua
 Syriaca interpretari piscem. & בית דגון berth-
 dagon esse domum siue tēplum piscis: sed quis sit
 deorū apud indigenas ignorant. Sed nos dici-
 mus Dagon esse quæ sit alio nomine Dercetus.
 Strabo, Plinius & Macrobius tum Ἀθάραν, tū
 Ἀτέρπατον eādem vocant. Quantumque cō-
 iectura possumus assequi eadem est cogno-
 minata Astarte. de qua in 3. Regum volumine
 Cap. 11. Colebat (inquit) Salomon Astartem
 deam Sidoniorum. Sed de Astarte aliās. Nunc
 de Dercero. Narrat Diodorus Siculus in 3. Bi-
 bliotheces libro: fuisse non longe ab Ascalo-
 ne vrbe Syriæ clarissima, stagnum piscibus
 refertum: atque iuxta illud insigne templum
 Dercetus facie hominis ac reliqua corporis
 parte piscis effigie. Cuius figuræ causam hanc
 fuisse dicunt. Venerem vt adolescenti sacrifi-
 canti sibi gratificaretur, iniecisse animum De-
 certo, vt illius voto ac precibus acquiesceret.
 Atque deinde ex eorum cōgressu natam esse
 puellam, quæ postea sit cognominata Semi-
 ramis, quæ fuit coniux Nini assyriorum regis
 nominatissima: Nympham vero & pudore
 admissi concubitus, iuuenem abegisse, & in-
 fantem in loca deuia atque aspera exponen-
 dam curasse: se vero in stagnum illud dedisse
 præci-

præcipitem: atque ita in piscem (quali figura diximus) transformatam . Vnde & Syrii piscibus non vescuntur quin potius illos quasi deos colunt. Templum vero quod illi deæ dicatum est, cuiusque Diodorus meminit, id est, quod in sacris litteris appellatur *Bethdagon*. de quo Eusebius atque Hieronymus in lib. de Topographia sacrae scripturæ, dicunt fuisse prope Ascalonem inter Iamnam & Lida quæ postea sit cognominata *Diospolis*, nō longe ab Azoto. Nam hæ quattuor vrbes Palestinae intra Iudeæ ambitum quadraginta millium passuum continentur . Quod cum ex multis alijs sacrae scripturæ locis : tum ex primo Machabæorum libro manifeste colligi potest. *Succendit* (inquit) *Ionathas Azotum*, & *mouit inde castra* & *applicuit ea ad Ascalonem*. Transmutationis autem *Dercetus* in piscem, & illius filia *Semiramidis* in columbam, *Ouidius* in 4. *Metamorphoseos* meminit.

Incipit & dubitat de te Babylonia narret
Derceti: quā versam squāmis velantibus artus,
Stagna palestini credunt mutasse figuram:
Aut magis ut sumptis illius filia pennis,
Extremos altis in turribus egerit annos.

CAPVT VII.

A Bimatu & infra. *Matthæi 2.*

Iacobi Constantij Fanensis error reprehensus.

CUm ex mea consuetudine bibliopolia,
 quæ Salmanticę cōplura sunt, excuterē,
 forte fortuna incidi in obseruationes quasdā
 Iacobi Constantij viri plane literatissimi: sed
 quem antea nomine tantum nouerā. Fuerunt
 autē obseruationes illæ numero cētum: quas
 idcirco voluit gręce hecatostyn potius quam
 centuriam latine cognominare. harum duæ
 priores, ac totidem posteriores pertinent ad
 quosdam locos diuinę scripturę. Sed cū re-
 liquæ omnes multū eruditionis rerū sæcula-
 riū contineant; atque vt ingenuè fatear, om-
 nes illas mihi facile persuaferit; in quatuor
 tantum quas dixi, hominis prudentiam desi-
 deraui: qui in ipso statim initio, ac deinde in
 operis clausula, vbi ex artis rhetoricę præcepto
 consuetū est optima quęque disponi, frigidiora
 & pene puerilia collocarit; vt quod in pri-
 ma obseruatione quasi in re magna ac perdis-
 ficili cōmoratur ostendēs eos aberrare, qui in
 Matthæi Euangelio c. 2. legunt quod *Herodes*
occidit omnes pueros ab imatu & infra: putantes
 non *bimatu* sed *imatu* esse legendum: ita vt b.
 litera non ad præpositionē præcedentē sed ad
 dictionē sequentē pertineat: quod nec pueri
 quidē ignorant qui nondum ære lauantur.
 Aut ostendat mihi Constantius oportet quis
 hoc vnquam dixerit, aut si harum rerū tā cu-
 riosus est, illud potius ex Lauren. Valla debuit
 adno-

adnotare in verbis illis non intra sed intra debere legi: propterea quod infra conditionem & locum designat, vt infra omnes homines, infra tectum: intra vero numerum & spatium, vt intra octo dies, intra vrbis muros.

C A P V T V I I I.

Camelopardalis.

IN secunda lege hoc est Deuteron. cap. 14. Inter animalia quorū esus Hebræis permittitur Camelopardalim numerat, *hoc est animal* inquit *quod comedere debetis, bouem, ouem, capram,* & subdit *Camelopardalim.* Sed cum inter animalia immunda *camelus* & *pardus* reponantur etiam ex genere: tum etiā nominatim *camelopardalis* quasi munda quadrupes esitanda illis proponitur, cum præsertim paulo post dicturi simus quod cornua gestet: bifidā vngulā habeat, atque ex consequenti altera parte detata sit ruminetque & sæuo pinguescat: quæ omnia adesse debent quadrupedi quæ sit hebræis vescēda. Quod vero dicitur *Camelopardalis* nō ita accipiendū est quod ex cōmistiōne duorū animalium diuersi generis sit propagata vt quidam male interpretantur illud Horatij ex 2. epistolarum volumine.

Diuersum confusa genus Panthera camelo:
Sed quod capite camelum, varietate colorum pardum siue pantheram præferat. Plinius l. 7. c. 18. *Camelorum* inquit *similitudo in duo transfertur*

fertur animalia. Nabim *Æthiopes* vocant collo- similem equo; pedibus & cruribus boui, camelocapite, albis maculis rutilum colorem distingu- entibus: Unde camelopardalis dictatoris Cæsa- rus Circensibus ludis primum visa Romæ. Ex eo subinde cernitur aspectu magis quam feritate con- spicua, quare & ouis feræ nomen inuenit, hæc Pli- nius. Varro quoque de lingua latina. Camelus (inquit) suo nomine Syriaco in latinum venit ut Alexandria camelopardalis nuper adducta: quæ erat figura ut camelus; maculis ut panthera, hoc est, pardalis; quam enim nos pantheram Græci pardalim vocant. Panther vero apud Aristotelem aliud est à panthera siue par- dali. Panther namque (Theodoro inter- prete) hoc est, lupus canarius, cecos parit catulos luparum ritu numero cū plurimum quat- tuor. Galenus quoque; quidam (inquit) adeo bestiales sunt, ut leonum & pantherarum, item canum & pantherum & vulpium carnibus ves- cantur. Pardus vero quod sit animal, aliubi dicetur. Nunc ad Camelopardalim redeamus. Heliodorus libro *Æthiopicon*. 10. scribit æthiopum regi ab Auxomitarum legatis hæc feram dono datam. Postremo (inquit) acces- sere Auxomitarum legati: & cum alia munera obtulerunt, tum in primis animantem quampiam inusitata specie, naturaque, cuius ad magnitudi- nem cameli proceritas, color pellisque pantheris maculis

maculis veluti florentibus variegata, postremæ
infra aluum partes humi subsidebant sicuti in leo-
nibus videmus: humeri pedesque priores atque
item pectus præter cæterorum membrorum ratio-
nem procera: tenuis cernix & quæ de reliqua cor-
poris mole in olorium collum se extenderet. Ca-
melo caput simile, maior ipso pene duplo, quam
Libyssæ struthi. Substrictosque velut oculos tor-
ue motans conuiebat, incessus autem longè ani-
mantium cæterarum terrestrium, vel aquatiliū
dissimilis. Neque enim vicissitatim crura simul,
sed dextra pariter dehinc sinistra utraque agi-
tabat: cumque his suspensa proferebat latera tra-
ctu motuque tam facili, ut eam quo vellet tenui
capistro vertice deuincto, veluti fortissimo vin-
culo magister perduceret. Hæc (ut est conspecta
animans) omnem continuò multitudinem obstu-
pescit, speciesque nomen inuenit ex ijs, quæ
præcipua in corpore sit, ut ex tempore eam po-
pulus Camelopardalim appellaret. Dion quo-
que & ipse autor Græcus. 43. Romanæ hi-
storiæ libro consentanea verbis Plinij scri-
bit. Camelopardalim (inquit) primus Cæsar Ro-
mam adduxit & populo ostendit. Id animal cæ-
tera camelus, crura autem inæqualia habet, poste-
riora prioribus magis breuia, ut à clunibus attolli
sensim quasi ascendenti simile incipiat, corpusque
reliquum sublime admodum cruribus prioribus
sustentatur: sed cernix in altitudinem pene pecu-
liarem

liarem se tollit: colore ipso maculoso ceu panthera: quo fit vt amborum promiscuo vocabulo censeatur. Solinus præterea vbi de Æthiopib. eadem propemodū quæ Plinius de camelopardali tradit. Iulius Capitolinus in Gordianorum vita scribit Philippum Cæsarem qui primus omnium Christianus fuit imperator, in ludis sæcularibus cum millesimum ab vrbe cōdita annum celebrauit, decem camelopardalos populo spectandos exhibuisse. Idē quoq; tradit Gordianum seniore inter cætera quæ in Quæstura sua populo rapienda concessit centū oues feras exhibuisse. Cornua veto hanc belluam habere, quod Plinius, Varro, Heliodorus, Dion atque alij siluerūt, animaduertit Angelus Politianus in *Girafa*, sic enim vulgus *camelopardalim* appellat, quam Sultanus, id est, Ægypti rex misit dono Laurentio Medicæ Florentinorum principi. Quod si cornua gestat, bifidaque est vt Plinius scribit, merito ex genere mundarum quadrupedum Moses Hebræis mandendam esse permittit.

CAP V T I X.

Castores.

N Auigaturus Paulus apostolus ex insula Melite in Siciliā: id quod in Apostolorū actibus c. 28. legitur, conscendit nauē Alexandrinam cui erat insigne Castorum siue Iouis filiorum. nam vtraque litera inuenitur, & vtraque

que respōdet ei quod in græco legitur *παπα-
σῆμα διοσκύποις*. Quod vero Hugo Cardinalis
legit castrorū, mendū est manifestariū ab in-
scitia librariorū profectum : qui pro Castorū
interiecta castrorū scriptitarunt. Quare illius
friuiolas expositiones omittamus. Fuerūt au-
tē Dioscori Castor & Pollux, dicti à *Ζεὺς διὸς*
quod est *Iuppiter iouis* : & *κόρος* puer siue filius.
de quorū nomine Mensis quoque apud Græ-
cos est cognominatus, qui est fere apud nos
Iunius. de quo in lib. Machab. 2. c. 11. anno in-
quit centesimo quadagesimo octauo mēsis Dios-
coron die 24. Recta igitur interpretatio & quæ
sit verbum ex verbo, quamque venerabilis
Beda agnoscit legitque, est *Iouis filiorum*.
Sed cū Dioscori duo sint, hoc est *Castor & Pol-
lux*, videamus an recte sit interpretatus qui
διοσκύπος vertit in *Castores*. Videtur autem ex
cōsuetudine loquendi sumpsisse interpretes, vt
vtriusque dei nomen sub vno cōplecteretur.
Nam templum quod fuit Romę ex cōsortio
Castori & Polluci dedicatū, vnius tantū *Casto-
ris* dicebatur. Vnde facetè M. Bibulus C. Cæ-
saris in Ædilitate collega euenisse sibi dixit,
quod *Polluci*. Vt enim geminis fratribus ædes
in foro constituta tantum *Castoris* vocaretur;
ita suam Cæsarisque munificentia vnius Cæ-
saris dici. Refert præterea Seneca in 1. libro
Natural. quæstionum : quod si in media tempe-

state apparent, quasi stellæ velo insidentes, adiuvare se tunc periclitantes existiment Castoris & Pollucis numina credentes. Atqui Plinius illas non Castorem & Pollucem, sed vno nomine Castores vocat libro 2. Naturalis histor. cap. de Castoribus. Has hodie in tempestate deprehensi nautæ sancti Thermi lampadas vocant: quas cum viderint pro certo habent frangi è vestigio tempestatem. Beda hunc locum exponens; Gemini inquit Castores sunt Castor & Pollux; quos ideo gentiles in mari deos vocant: quia in tempestate si solæ apparuerint in navi vel in antennis periculosi, si vero geminæ prosperi cursus sunt nuncia. Ego vero quemadmodum de geminis Castoribus simul apparentibus Bedæ astipulor: ita de solitarijs dissentio. tunc enim non Castor neque Pollux: sed Helens vocatur. De qua Plinius libro 2. Diram illam ac minacem appellatam Helenam ferunt. Et Pappinius in 7. Thebaidis.

Non aliter, cæco nocturni turbine cori

Scit peritura ratis, cum iam damnata sororis

Ignem Teraphnai fugerunt carbasa fratres.

Insigne igitur navis Alexandrinæ erant Castores siue filij Iouis: in quorum tutela nautæ esse putabantur, quemadmodum apud Virgilium in 5. Æneid. sunt Centaurus, Scylla, Pylæis, Chimæra.

CAPVT X.

Charadrius quid.

IN Leuitico cap. 11. & in Deuteronomio ca. 14. prohibet Deus per Moſen Hebræos veſci auibus immundis, inter quas numerat *charadrium*. Sed quæ auis, aut qualis *charadrius* ſit, non Hebræi quos conſului, non illorum locorum enarratores, non illi qui vocabula in ordinem Alphabetarium redegerunt, mihi ſatisfaciunt. Ariſtoteles libro de hiſtoria animal. 8. inter aues lacuſtres ſiue marinas illum nominat: *gauia*, inquit, *alba* & *fulica mergus* & *charadrius*. *rupex iuxta mare viſtitant*. Idem lib. 9. *Colunt*, inquit, & *aliæ aues fragoſa*, & *saxa*, & *cauernas*: *vt quem à præruptis torrentium alueis charadrium appellamus*. *Praua hac auis*, & *colore*, & *voce*, *noctu apparet*, *luce auſugit*. Theodorus Gaza *hiaticolam* interpreta- tur, quod in hiatibus & ſpeluncis habitet; nā *χαράδρα* tum torrens, tum alueus, tum vallis, tum ſpelunca ex Græco vertitur. Alio in loco *χαράδριον* in *rupicem* tranſtulit, quod in rupium cauernis habitet.

CAPVT XI.

Cynus pro Chino.

IN Daniele Propheta cap. 13. vbi hiſtoria Suſannæ ex translatione Theodotionis inſerta ſcribitur, omnes codices vulgo habent: *Si vidifti eam, dic ſub qua arbore videris*. Qui ait, *ſub*

sub cyno, pro eo quod esse debuit *sub schino*. Iacobus Constantius contra Nicolaum Lyram, corruptam lectionem defendit: asseueratque non *schinum*, sed *cinum* eo in loco debere legi: inuehiturq; acerrimè in Nicolaum, quod eo in loco legat *schino*, quam interpretatur *lentiscum*: contenditque debere legi, *cino*, quam ipse somniat esse ex lauri generibus vnũ. Excutiamus igitur, diiudicemusque, vter illorum stet à causâ potiori: constituatur inter eos causa, citentur partis vtriusque testes. Constantius affert in testimonium contra veritatem locos deprauatos duos. Alterum ex calce quindecimi voluminis Pliniani: vbi numerantur lauri genera tredecim. *Accessere inquit genera: Cuius hanc syluestrem laurum aliqui intelligunt.* vbi pro eo quod est *cuius* ipse contendit debere legi, *cinus*: quod non Hermolaus eo in loco adnotauit: non Theophrastus scripsit: non Cato in libris de re rustica, qui tria tantum genera lauri numerat. Non alius quispiam, qui dicat *cinum* esse lauri speciem aut arboris per se genus. Alterũ affert ex Ouidio testimoniũ, qui libro Metamorphoseos. 10. inter arbores quæ Orpheo astiterunt, enumerat *cinum*. Sic enim ipse legit,

Et bicolor myrthus & bacchus cerula cinus.

Cum omnes libri tã inemendati quã emendati habeant *ficus*. Sed cõtra duos testes deprauatos

uatos atque aduersarij malignitate corruptos,
vnum Hieronymum, atque ipsam veritatem
quę valet pro mille testibus producimus. Scri-
bit enim in ipsius Danielis proœmio & in ca-
talogo Ecclesiasticorū scriptorū, Africanum
qui vt sacrę scripturę falsitatem conuinceret,
multa contra Origenem argumenta cōgessit,
inter cetera opposuisse Susannę historiam
ab aliquo gręculo nugatore confictam: idque
ex verborum etymologia probasse: quod vbi
legitur apud nos sub *schino*; quod sequitur sta-
tim, *angelus Dei scindet te medium*, totū illud ex
græco sermone descēdere. *σχίω* enim latine
est lentiscus. *σχίζω* vero interpretatur scindo.
& subdit Hieronymus, cuius rei nos intelligen-
tiam nostris hanc possumus dare: à lentisco in len-
tem te comminuat angelus: aut lente pereas, aut
lentus id est flexibilis ducaris ad mortem. Emen-
demus obiter locum superiori coniunctum,
vbi pro primo legitur *pruno*. Est autem *πρίω*
græce quę sit latinis *ilex*. ad quod nomen al-
ludens Daniel subiungit. *Manet enim angelus*
Dei gladium habens, vt secet te medium. *πρίω*
enim græce *feco* interpretatur. Vnde subdit
Hieronymus, de arbore ilice Daniele dixisse,
ilico pereas. A *πρίω* igitur *πρίωαι* fecit sicut à
σχίζω *σχίσαι*. Non debuit itaque Constātius
ea quorum ignoratione tenebatur, attingere:
nec violare naturę legem, de qua Persius.

*Publica lex hominum, naturæ, continet hoc fas,
Ut teneat vetitos inscitia debilis actus.*

CAPUT XII.

Cæmeterium non Cimiterion.

V Surpatur crebro in sacris literis dormire pro eo quod est mortem obire siue mori. Quale est illud ex euangelio. *Non est mortua puella sed dormit.* Illud quoque. *Lazarus amicus noster dormit.* Sumptum est autem verbum ex eo quod quemadmodum is qui dormit quandoque expergiscetur: ita ex eo, quod in religione nostra credimus & speramus: qui diem suum obire, aliquando ex mortuis resurgent. Significantius itaque nostri mortuos dormire dicunt: quam Latine elegantiae studiosi, mortem oppetere, siue diem obire, siue agere aut efflare animam, siue mori, siue perire, siue interire. Hinc factum est, ut locus in quo mortui sepeliuntur: quod latine tum sepulchretum: tum conditorium appellatur, à Græcis πολυάνδριον ut est, in Ezechiele, dicitur in nostra religione κοιμητήριον Græcè: Latine *dormitorium*, non *cimiterium*, ut homines indocti somniant, dictum quasi *cinis teritum*: quia ibi defunctorum cinis teritur. Neque à *cimis*, quod ipsi interpretantur *dulce & sterni statio*: sed potius per æ diphthongon *cæmeterium* dictum: à κοιμάμαι quod est *dormio*: ut sit quemadmodum

dum diximus, *cæmiterium*, *dormitorium*.

CAPVT XIII.

Collirida.

Libro Regum secundo. cap. 6. *Partitus est inquit tam viro quam mulieri singulis colliridam panis vnam.* & in Levitico cap. 6. *Colliridas olei admixtione conspersas offerent.* Sed quid collirida sit plane nescitur. nam cū græcum nomen videatur, græci non agnoscunt esse suum. Latini diuinant, cum dicunt esse triangulum siue tortam panis. Nos pro eo quod legitur collirida suspicamur vna litera immutata debere legi *collicida*. Est namque apud Græcos *κόλλιξ, ικος*, panis subcinericius: hoc est non in furno sed in foco super lapide concalesfacto deinde cineribus super ingestis decoctus: quo genere coquendi panes, etiam nunc quidam ex Cantabris & Asturibus vtuntur; putanturque huiusmodi panes ad augendas vires plurimum conducere. Ab eo igitur quod est *κόλλιξ*, Aristophanes Comicus nomen finxit *κολλιχοφάγας*: id est *collicis voratoris*. Hinc etiam in forma diminutiva *colliphium*, & *collicium* dicta. Iuuenal.

Luſtantur pauci: comedunt colliphia pauci.

Martialis.
Et colliphia cum decem comedit.

Plautus quoque *colliphia* inquit mihi. A *collicio* iterum fit *collicida*: quod significat etiam
panem

panem subcinericium. Itaque apud authores sacrarum literarum ubi crebra fit mentio huiusmodi panis, indifferenter alterum pro altero ponitur. unde pro eo quod in 4. Regum cap. 19. Hieronymo interprete legimus *Respexit Helias, & ecce ad caput suum subcinericius panis & vas aquæ*. Ambrosius in epistola ad Vercellenses. *Helias inquit quem Dominus erudiebat ad virtutis profectiorem, ad caput suum collicidam & vas aquæ repperit*. Idem quoque Hieronymus in quadam epistola ad Eustochium pro eo quod interpretans dixit *subcinericius panis, Respexit inquit Helias & ecce ad caput eius panis collicida*. sic enim legendum est, aut ostendant mihi ubi apud Græcos & Latinos *collirida* reperiatur, aut quid significet.

CAPUT XIIII.

Daphne quid in libro Numerorum.

QUod in libro Numerorum cap. 34. legitur *de sephama descendit termini in Reblata contra fontem Daphnen*, nemo ex ijs qui hunc locum enarrauerunt, quid sit daphne, aut cur ab interprete adiectum exposuit. Nicolaus Lira ociose dictum putat: dicitque in libris castigatis non haberi daphnen: cum e diuerso libri potius inemendati sint, ubi daphne non habetur. Hieronymus certe in Ezechielem cap. 4. exponens obiter locum illum *de sephama* inquit *id est de apamia descendit termini*

termini in Reblatha, quæ nunc Syriæ notatur Antiochia. & subdit: *Vt scias* (inquit) *reblam* siue *reblatham* hanc significare urbem dicit contra fontem quem perspicuum est significare daphnen: de quo fonte lucus aquis abundantissimis fruitur. Quod si Hieronymo non credis, at ipsi sacræ lectioni credas necesse est, quæ in secundo Machabæorum volumine c. 3. hæc verba continet. *Onias*, inquit, *Sacerdos continebat se in loco tuto Antiochiæ secus daphnen*: Nam cū sint plures Antiochiæ; vna est ad Cragum flumen in Cilicia, altera iuxta Meandrum amnem in Caria, tertia Pisidiæ in Cappadocia, de qua Lucas in Apostolica historia c. 13. ad quarum differentiam hæc cognominata est Antiochia *ad daphnen*; quæ etiam aliarū cōparatione Antiochia magna dicitur, & Antiochia quoque ad Orontem, quia ab Oronte fluuio secatur media. Ad *daphnen* siue ἐπὶ δάφνῃ cognominata est, vt sunt auctores, Eusebius in locis sacræ scripturæ, Hieronymus in Ezechiel. à luco quem Cn. Pōpeius lauris & cupressis cōstitutum dedicauit. Continebatur autē lucus ille ambitu octoginta stadiorū: quo in loco Antiocheniū cōuentus agitabatur, vt auctor est Strabo. *Cupressorum daphnensium* meminit Iustinianus Imperator li. 11. Cod. ti. de cupressis ex luco daphnēsi. Capitolinus quoq; in Veri cæsaris vita. *Verus* inquit *Cæsar* posteaquam in

*Syriam venit in delitijs apud Antiochiam ad
 daphnen vixit. Amianus præterea tunc ait
 apud daphnen amœnum illud & ambitiosum An-
 tiochiæ suburbanum. Meminerunt præterea
 eiusdem luci Volcatius & Lampridius. Fuit
 quoque Antiochię porta qua ibatur ad daph-
 nen: de qua Hieronymus in vita beati Igna-
 tij. Reliquiæ inquit corporis eius Antiochiæ is-
 cent extra portam daphniticam in cœmiterio.
 Quod vero Eusebius & Hieronymus dicunt
 cognominatam ad daphnen hoc est ad laurum
 siue lauretum propter lauros & cupressos à
 Pompeio dedicatas in eo loco: ad superiora
 potius tempora referendum est. Constat nã-
 que urbem illam fuisse conditam vel potius
 instauratam à Seleuco rege Syriæ, indito etiã
 illi nomine ex patre suo Antiocho qui fuit
 ex ducibus Philippi Regis Macedonum au-
 ctore Trogø libro. 15. & quod ad daphnen sit
 cognominata indigenæ causam afferunt: quod
 daphnen quam poetę fluminis patrij appellant
 ipsi suam atque Ladonis sui filiam fuisse di-
 cunt. Philostratus lib. 1. Apollonius inquit An-
 tiochiam quæ magna cognominatur: & Apolli-
 nis Daphnei templum intrauit: cui Arcadiæ sa-
 bulam Assyrij tribuerunt Daphnen Ladonis fi-
 liam illic natam fluminis asserentes. Et fuit qui-
 dam apud ipsos fluuius quem Ladonem appellant
 & maxime omnium arborum laurum colunt ob
 memo-*

memoriam virginis Daphnes. Arrianus prætere-
rea à Daphne Ladonis fluminis filia dictam
Antiochiam ad Daphnen putat: quibus in me-
morato loco Hieronymus astipulatur dicēs.
Hic lucus à magno Pompeio: qui primus Romano
imperio subiecit Iudæam confitus est & ab eo in-
tra fabulam poetarum Daphnes nomen accepit
ob lauros & cyparissos: quæ arbores in ipso frequē-
tissimæ sunt. Ex quibus infertur non frustra
ab interprete fuisse adiectum Daphnē id quod
Nicolaus putauit: sed dictum per figuram
prolepsim non modo poetis sed etiam litera-
rum sacrarum auctoribus vsitatissimā. Quod
vero ille dicit hunc locum esse qui apud Mat-
rheum c. 15. sit magedan: & apud Marc. c. 8.
Dalmanutha: & quod inde oriatur Iordanes:
totum hoc commentitium est & pro libidine
sua confictum: Id quod suo in loco dispu-
tabitur.

CAPVT XV.

Debora non delbora.

DVē reperiuntur in sacra scriptura fœmi-
 næ cognomines: vtraque vocata est De-
 bora. Altera Rebecca vxoris Isaac nutrix, de
 qua Genes. c. 35. Eodem inquit tempore mor-
 tua est Debora nutrix Rebecca, & sepulta est ad
 radices Bethel subter quercu. Altera prophetis
 vxor Lapidoth quæ post Aioth iudicauit po-
 pulum Israel cum Barach: de qua in Iudicum

libro multa scribuntur. Sed in libris recentioribus utrobique l. interiecta Delbora legitur, quod nulla ratione defendi potest. Tum quod apud Hebræos in hac particula l. nusquam est: quibus astipulantur omnes codices græci, aut qui ex translatione græca ad nos venerunt, atque etiam antiqui omnes libri Latinis, Logobardis, Gothicisque inter Pœnos scripti. Tū quod omnes Ecclesiastici authores דלבורא debora, in apem interpretantur: cum *Delbora* per l. litteram interiectam nihil tale, sed neque aliud quicquam apud Hebræos significet. Est & alia ratio, cui nemo inuenire potest quid respondere queat. Remigius in Hebraicorum nominum interpretatione, in quibus disponendis alphabetarium ordinem exactissime prosequitur: post particulam *debon gad* euestigio subiungit *debora*. tum subdit *decla*. hoc est post nomina habentia b post e, apponit habentia c post e; ut nullus relinquatur locus ei quod *delbora* per l. litterā, quod est quemadmodum diximus, nihili verbum. Quare dispungendum est l. ex hac particula, velint nolint, qui vitiosa lectione tantopere delectantur.

CAPVT XVI.

Dextera.

S Alomon Prouerbior. c. 3. enumerans praeemia quæ comitantur sapientiā, *Longitudo* inquit, *dierum in dextera eius*, & *in sinistra illius*,

lius diuitiæ & gloria. In quibus verbis præter illum sensum qui est in promptu, subest recondita quædam per digitos computandi ratio, qua omnis antiquitas utebatur. Quamuis enim per *longitudinem dierum* intelligatur interminabilis vitæ iucunda possessio, respicit tamen ad illud quod qui pertingebat annum vitæ centesimū, incipiebat in *dextra* manu cōputare, cū in *sinistra* superiores numerasset. Vt de Nestore, qui apud Ouidiū dixerat;

Vixi annos bis centū, nunc tertia viuitur ætas.

Iuuenalis ait.

Rex Pilius magno si quicquam credis Homero,

Exemplum vitæ fuit à cormice secunda,

Felix nimirum qui per tot secula mortem

Distulit, atque suos iam dextera cōputat annos.

Qui per digitos computandi modus cū apud authores frequens sit, neque adhuc ars ipsa vulgata est, pauca nobis ex Isidoro atque Beda mutuanda sunt, atq; graphice demonstrandū qua digitorum figura apud maiores nostros numeri designabantur. *Minimus* itaque digitus mediæ volæ appressus *vnū* mōstrat. *Medicus* hoc est minimo proximus in eadē vola affixus *duo*. *Medius* qui infamis & impudicus appellatur, eidē volæ impressus *tria*. *Minimus* sublatu reliquis duobus affixus, *quatuor*. *Medicus* sublat^o quoq; medio impresso, *quinque*. *Medicus* appressus medio & minimo sublati, *sex*. *Minimus*

nimus brachiali hoc est radici manus applici-
tus, *septem*. *Medicus* eidem etiam radici appli-
citus, *nouem*. Quemadmodum vero per tres
digitos superiores, numerum citra denarium
ostendimus: ita duobus reliquis hoc est pol-
lice atque indite decuplationes simplicium
numerorum designabimus. *Indicis* igitur
summitas nodo pollicis medio admota, *decem*
monstrat. *Pollex* in partem manus domesti-
cam inflexus, *viginti*. *Pollicis* atque *indicis*
summitates coniunctæ, *triginta*. *Pollicis* me-
dius nodus medio *indicis* condylo impres-
sus, *quadraginta*. *Index* super summitatem
pollicis circumductus, *sexaginta*. *Pollex* atque
index diuaticati atque distenti, *septuaginta*.
Pollex *indici* ac medio insertus *octoginta*. *In-*
dicis apex radici pollicis admotus, *nonaginta*.
Atque ita possumus tam numeros simplices
quam compositos citra centum monstrare
alios alijs non impredientibus. Transfrentes
deinde supputationem in manum dexteram,
centum designabimus, ubi fuerant *decem* in si-
nistra. *Ducenta* ubi *viginti*. *Trecenta* ubi *tri-*
ginta. *Quadringenta* ubi *quadraginta*. *Quin-*
genta ubi *quingenta*. *Sexcenta* ubi *sexagin-*
ta. *Septingenta* ubi *septuaginta*. *Octingenta* ubi
octoginta. *Nongenta* ubi *nonaginta*. Deinde
mille ubi monstrabatur in sinistra vnum: *bis*
mille ubi duo: *ter mille* ubi tria. & ita deinceps
vsque

vsque ad nouem millia. Vteriores numeri circunferendo manus per alias corporis partes, effingebantur. Ex hac graphica numerorum descriptione, possumus enodare complures authorum locos: qui videbantur inextricabiles. vt quod paulo ante Iuuenalis de Nestore dicebat:

Sua dextra computat annos.

Quodque Salomon innuebat: *Longitudo dierum in dextra eius.* Quodque Plinius scribit: antiquissimi deorum Iani effigiem ita consueuisse pingi, aut ex aliqua materia excudi, quasi digitis significaret *tercentum sexaginta quinque*, qui numerus est dierum totius anni: quod Ianus idem deus habitus est qui sit Sol: cuius annum cursum totidem dies conficiunt. Quodque in Apologia secunda pro Magia scribit Apuleius. *Si triginta inquit annos pro decem dixisses, posses videri pro computationis gestu errasse & quos circulare debueris digitos aperuisse &c.* Et quod Hieronymus primo in Iouinianum libro ex Euangelio scribit dicens. *Centesimus & sexagesimus & trigessimus fructus quanquam de vna terra & vna semente nascatur, tamen multum differunt numero. Triginta referuntur ad nupcias. nam & ipsa digitorum coniunctio quasi molli osculo se amplectens ac foderans maritum pingit & coniugem.* Diximus namque triginta pollicis ac indicis sum-

mitatibus in orbē circumductis designari, ut sit pollex quasi maritus, index vxor, se inuicē molli osculo foederantes. Et subdit Hieronymus. *Sexaginta vero ad viduas, eo quod in angustia & tribulatione sunt positæ: unde & superiore digito deprimuntur, quantoque maior est difficultas expertæ quondam voluptatis illecebris abstinere, tanto maius & præmium.* Nā diximus indice super mediam pollicis vertebam sexaginta formari. Tū idem Hieronymus subiungit. Porro centesimus numerus (diligenter quæso lector attēde) de sinistra transfertur ad dextrā, & iisdem quidem digitis, sed non in eadem manu quibus in leua nuptæ significantur & viduæ, circuli faciens exprimit virginitatis coronam. Diximus nāque centum in dextra manu designari eodem in loco vbi decem in sinistra, & iisdem in digitis quibus triginta & sexaginta. Fitque ex circūductione illa orbis, quā Hieronymus coronam interpretatur, quæ sit debita virginibus. Ambrosius præterea in sermone quodā qui legitur in celebritatibus vnius confessoris pontificis, ex cōsuetudine rituque Romanæ ecclesiæ: cuius initium est, *Ad sancti patris nostri, ad hanc numerandi rationem alludēs: Quis huic mundo inquit, crucifixus & mortuus, quicquid laborauit de hac vita ad illam transtulit, & quasi bonus ratiocinator velut ad centuplum manum porrigens, semper de sinistra aliquid trans-*

transmisit ad dextram. Sic quoque illud Iuuenalis exponendum est, in quo plerique herēt,

Sua inquit, dextra computat annos.

De Nestore videlicet loquens qui apud Ovidium dixerat,

Vixi annos bis centū, nunc tertia vivitur ætas.

Quia diximus, quod ultra centum numeri in dextra manu formabantur. Sic etiā facile possumus intelligere illud ex Macrobio in Saturnalibus, quod de Iano scribit, qua manuū digitorumque chironomia designare posset *tercentum illos & sexaginta quinque dies* quibus annuū spatium conficitur. Sic quod Cicero cōpluribus in locis scribit: *Ad digitos rem redire.* Sic denique quod ab initio diximus, Salomonis illud: *Longitudo dierum in dextra illius & in sinistra eius divitiæ & gloria.*

C A P V T X V I I .

Drama, atis.

QUærent à me quotidie multi non solū ex Sacerdotum turba, sed ex illorū numero, qui se sciolos putāt: quid sibi vult *drama* illud, quod in celebritate virginis Deiparæ, ac proinde in festis aliarum virginū ecclesia Romana canit. *Ante thorum huius virginis frequentate nobis dulcia cantica dramatis.* Scribendū nāque est non per ch, non per g, nō per duplex m, vt in quibusdā deprauatis codicibus legitur, sed simpliciter *dramatis.* Atque vt

semel me ab hac questione absoluā, volui hoc in loco scribere aliquid, quo deinceps percontaturos remittam. Est itaque *drachma* per ch, atque per primam declinationem inflexa genus monetæ quod appendit fere nostri temporis argenteum nummum siue denariū, hoc est vnciæ partem octauam: nam quod Hispani vocant *adareme*, dimidium est *drachma*. in quo significatu accipienda est *drachma* illa quam in Euangelio mulier amisit. Est & *dragma*, atis per g, manipulus ab eo quod est græce δρᾶξ, ἀξός, id est *pugnus*. vnde & δρᾶγματεύω, id est, *manipulas colligo*, in quo sensu legitur Psalmo. 125. *Portantes manipulos suos*: pro quo in græco δρᾶγματα habetur. Est & *dramma* per duplex m *cursus*: ab eo quod est græce δραμεῖν *currere*, & δρασμός *cursus* siue *fuga*. Sed *drama*, atis simpliciter scriptum, est *repræsentatio fabularū*, in quibus introducuntur variæ personæ, vt in Comædijs & Tragœdijs, & in poematis diuersorum generum. Vnde & Seruius in Bucolicis illud dicit *dramaticum dicendi genus*, in quo *variæ inducuntur personæ*, dictum à δραω, quod est *ago* in ea significatione qua Iuuenalis ait.

Exorem Comædus agit vel Dorida.

In quo sensu accipitur drama in versu quem Ecclesia canit: *dulcia cantica dramatis*. Repræsentat namque ecclesia Christi nuptias cum
matre

matre virgine, aut cum aliqua ex virginibus
 quas Euangelista vocat sapientes, aut cum de-
 facatissima aliqua fidelium anima, aut cum
 ipsa denique Ecclesia. in quibus quidem nu-
 ptijs canendum esse *epithalamium*, hoc est,
 carmen nuptiale admonemur: quale est illud
 Salomonis in Canticis Canticorum, in quo
 introducuntur personæ representantes tum
 sponsam, tum sponsum, tum vtriusq; matrem,
 tum vtriusque comites. Quem deinceps
 imitati sunt Poetæ Latini & Græci, qui *epitha-
 lamia* quoque scripserunt in nuptijs deorum
 atque hominum. Primus qui *epithalamium*
 cecinit apud Græcos authores fuisse dicitur
 Apollo in nuptijs Thetidis & Pelei; & dein-
 cept alij quos & Latini sunt subsecuti Catul-
 lus, Ovidius, Claudianus, Ausonius. Talia
 igitur carmina in spiritualibus nuptijs esse ca-
 nenda nobis monemur: qualia sunt illa ex
 Canticis Salomonis; *Dum esset Rex in accubitu
 suo: & Læva eius sub capite meo: & Nigra sum,
 sed formosa: & Iam hyems transiit & recessit:*
 quæ sunt verba sponsi & sponsæ, quæ personæ
 introducuntur ab authore; & hoc est quod
 Origenes in expositione illius operis dicit:
*Epithalamium, inquit, Salomonis, quod in morē
 dramatis compositum est, id est, actionis vel repræ-
 sentationis diuersarum personarum.*

Electrum.

Q Værebat à me nuper religiosus, vita & moribus diuū Franciscū referens, qui & ipse coenobij Murgitani pręsul erat: quid sibi vellet *electrum*, id quod in Ezech. propheta c.1. legitur. *Splendor inquit in circuitu eius: & de medio eius quasi species electri.* & rursus. ca.8. *Et à lumbis & sursum quasi aspectus splendoris vt visio electri.* Erasmus tunc in aula perquàm reuerēdi atq; proinde clemētissimi Domini Frācis̃ci Ximenez Archiepiscopi Toletani & Hispaniarū Protomyſtæ, cui iam pridē inuestigandæ antiquitatis sacrarum literarū cura vel præcipua incumbit, & conquirendorū voluminū ad eam rem non minor diligentia. Antea igitur quā quidpiam quęstioni responderem, videamus inquā, quando nos fortunati in loco iunxit vbi adest tāta copia eruditi res abstrusas atque difficiles, quid authores Hebræorū de *electro* sentiant. Euoluimus itaque Hebræorū Lexica atq; glossemata: nihilque offēdimus præter mera somnia esse, videlicet animalis siue angeli cuiusdā nomē, siue lapidē preciosum. Alij cōfitentur ingenue se nescire quid sit *חשמל* hasmal: id enim apud Hebręos nostro *electro* respondet: inter quos est Rabbi Salomō vir non minus rerū quam verborū diligēs indagator. Nicolaus Lira putat

rat Hieron. immo cum Hieronymo septuaginta interpretes non assecutos vim hhasmal, cum *electrum* interpretatur, quasi in eruditione linguarum non debeant preferri septuaginta, quos Hieronymus in hac parte sequitur, quibuscunque alijs, nedum Salomoni homini in re literaria nouitio, neque minus in significato verborum quam in eruendis sensibus frequenter hallucinati. Itaque ego longe magis assentior septuaginta, qui ut inquit Augustinus in 2. de doctrina Christiana libro, tanta spiritus sancti praesentia interpretati esse dicuntur, ut os vnum tot hominum fuerit: magis Hieronymo trium linguarum peritissimo quam Nicolao cum suo Salomone, quam omnibus Hebraice linguae recentioribus magistris. Sed cum *electri* apud Graecos & Latinos duo sint genera, alterum *naturale*, quod a Latinis *succinum*, a Germanis *glessum*, ab Hispanis dicitur *ambar*: Alterum *factitium*, quod ex auro & argento constat, in utro sensu apud Ezechielem accipi debeat, disputandum nunc mihi est. Est autem *electrum* in priori significato lachryma defluens ex arbore glessaria in insulis Germaniae Septentrionalibus quas *electridas* siue glessarias vocant: quae deinde congelascens ad lapidis duriciem peruenit. Virgilius in Bucolicis.

Pingua corticibus sudent electra mirica.
Et Ouidius. 2. Metamor.

Stilla-

Stillataque sole rigescunt

De lachrymis electra nouis.

Plinius lib. 37. his verbis scripsit: *Phaetontis, inquit, fulmine icti sorores fletu mutatas in arbores populos lachrymis electrum omnibus annis fundere iuxta Eridanum amnem, quem Padum vocamus, & est electrum appellatum, quia Sol vocitatus est elector sine electros: additque multa de errore Græcorum circa electri originem. Electrum factitium dicitur, quod ex auro & argēto constat: ita tamen, ut quinta pars argenti auro misceatur: qualis est massa unde aurei Ioannini excuduntur: duplas Hispani appellant. Plinius libro. 33. Vbicunque pars quinta argenti portio est in auro, electrum vocatur. Silius lib. 1. Punicorum.*

Electri gemino pallent de semine Venæ.

Martialis.

Vera minus flavo radiant electra metallo.

Vergilius.

Tum leues ocreas electro auroque recocto.

Accursius in electri expositione, plurimum aberrat, exponens enim illud Iureconsulti quod habetur de legatis tertio in lege Pediculus. *Vasis electrinus legatis nihil interest, quantum ea vasa de quibus quaeritur argenti atque electri habeant: sed utrum argentum electro, an electrum argento cedat. illud quoque de legatis primo. Si quis putat auri appellatione electrum*

vel

Vel aurichalcum contineri. & illud ex Iustiniani Institutionibus in titulo de rerum diuisione. Si diuersæ materiæ sint & inde propria species facta, vt ex auro & argento electrum. Videtur autem electrum hoc metallicum; & ex eo appellatum, quod referat ac repræsentet succini colorem splendoremque, vt sit vero simile factitium electrū, quod est posterius, à naturali quod est prius fuisse cognominatum. Seruius Grammaticus in illud Vergilij: Est electrum inquit, triplex, vnum ex arboribus quod succinum dicitur, aliud quod naturaliter inuenitur, tertium quod fit de tribus partibus auri & vna argenti, quas partes si naturale resoluas inuenies. Sed de vtro electro Propheta intellexerit, dubitari potest. Mihi vero credibilius sit de succino intellexisse, quam de metallico vel ex eo quod sit materia translucens & perspicua, & per quam similitudo illa poterat transparenere: quod aureæ materiæ non contingit. Vel quod Hebræi suum hhasmal ad genus quoddam lapidum reducunt. Vel quod Hieronymus quodam in loco insinuare videtur esse sapphirum.

CAPVT XIX.

Euro aquilo.

N Arrat Lucas in actibus Apostolorum. c. 27. de laboriosissima illa nauigatione Pauli circa Cretam, quod ingruit ventus Typhonicus,

phonicus, qui vocatur *Euroaquilo*. Quis *ventus Typhonicus* sit, Aristoteles in tertio Meteorologicorum libro, pulchre ostendit esse, videlicet spiritum ex nube detrusum: qui à parte posteriori impulsus ab anteriori repulsus in orbem circumagatur necesse est: rapitque secum nō modo res tenues, verum etiam magnas moles, inter quas lapides, arbores, animaliaque grandiora: dictus à τύφω quod est *incendo* siue *inflammo* & *insumigo*. Vnde conuincitur error Nicolai, Mamotrecti, Hugonis & omnium prope hunc locum exponentium, qui pro *inflammatione* quod in aliquo probato authore erat, ipsi *inflationem* transcripsere. Sed aduertendum quod σκηπτὸς nomen est generale omnibus ijs quæ de nubibus cadunt. Nam si flamma illa quam nubium conflictus expressit, robustior fuerit incendio deferiturque in terras, *fulminis* habet nomen. Præterea nominamus cum flammarum minus in illis fuerit: sed si ignitum non fuerit fulmen, *typhon* vocatur: quæ adhuc differt ab *ecnephia*, & *exhydria*, quod *typhon* in orbem circumagitur, *ecnephas* rectus propellitur vterque ex sicca exhalatione decisus. *exhydria* vero cum imbribus nubem repente frangit. Ex Aristotele in Meteor. Apuleio in libro de mundo. Seneca quinto Naturalium quæstionum. Plinio. 2. Naturalis hist. Quid vero sit *euroaquilo* aut

aut quare *typhon* cognominetur, non puto
 quenquam mortaliū scire, quin potius suspi-
 cor mendum fuisse librariorum, qui pro *euro-
 clydon* quod in græco legitur, *euroaquilo* nihi-
 li verbum supposuere. Nā cum sit *aquilo* vox
 latina, *eurus* autem græca, quis talem composi-
 tionem ausus esset facere? Cū præterea sit *a-
 quilo* ventus spirās media regione inter exor-
 tum æstiuū & septentrionē, *eurus* vero perflat
 ab ortu hyemali, quæ cōpositio potuit ex vē-
 tis tam disparibus coagmentari? Quid quod
 Aristoteles negat *typhonem* posse fieri spirante
aquilone? *Borealibus* inquit *non fit typhon, nec
 vinosis ecnephas*. quomodo igitur *typhon* po-
 tuit *euroaquilo* cognominari? Cū igitur κλύ-
 δων apud græcos *procellam* siue *tempestatē* sig-
 nificet, *εὐροκλύδων* putat Lucam scripsisse
 cogominari vētum qui sit *typho*, hoc est spiri-
 tum ex nube expressum, siue ut Plinius inter-
 pretatur vibratū ab oriente hyemali vnde per-
 flat *eurus*. Interpres vero cum nequiret latinē
 vim græcæ compositionis assequi, *euroclydon*
 reliquit, quod in *euroaquilonem* librariorum
 negligentia inuertit.

C A P V T X X .

Git siue melanthium quid.

A Vdio viros triū linguarū peritos hebra-
 icam dico græcā & latinā, nā ceteras ni-
 hil moror, in discussione illa quæ sub Præfatis
 I nostri

nostri Cardinalis Hispani censura propemodum cotidie fit : in pensitandis interpretum varijs translationibus hæsitasse nuper in illud Esaiæ. cap. 28. *Seret git & cuminum sparget. & paulo post. Sed in virga excutietur git & cuminum in baculo*, quod genus feminis esset illud, quod à Propheta dicitur קֶטֶשׁ qetsach ab interprete græco μελάγχθιον, à latino git. Medicorum vulgus ignorare videtur quid sit *melanthion* siue *git*, cum in *nigellam* vertunt: non paruo generis humani detrimento, si alterum pro altero in medicamentis adhibeatur, sitque tanta inter vtrumque semen distantia, quanta potest esse inter duas res diuersorum generum: cum *nigella* sit in genere zizaniorum, *neguilla* Hispanè dicitur, quæ plærunque aëris vitio tritico innalcitur, & nescio quid fatuum insulsūque sapiat, *git* vero inter fruges numeretur, cuius semen piperis saporem reddat, de quo Ausonius in monosyllabis.

Est inter fruges morsu piper æquiparans git.

A Græcis tum μελάγχθιον vt diximus, tum *melaspermion* Plinio auctore cognominatur, atque si Theodoro Gazæ in Theophrasto credimus, ἀνθήμερον etiam dicitur, quando quibusdam in locis ex *anthémone* *git* interpretatur. Sed nihil mirum vulgo ignorari *git*, cum Ioannes Baptista Pius, cui hodie Bononienses priusmas deferunt, deceptus literarum similitudine pu-

ne putauerit eandem esse rem *git* & *zithum*.
 Est enim *git* semen quod Hispani vocant *axen-
 nuz*. *Zithum* vero poculum quod ex frugibus
 vt inquit Strabo, Ægyptus excogitauit. שֵׁכָר
 Secar Hebraice, *serueza* vulgo dicitur. de qua
 Lucas in Euangelio de Ioanne Baptista, *Vi-
 num* inquit & *siceram non biber*. Quod si per
nigellam ipsi *git* intelligunt, velim mihi mon-
 strent, quo authore id asserant. Sed quæro nō
 iam ab interpretibus linguarum peritis, sed
 ab ijs sacrarum literarum enarratoribus, qui
 reconditos sensus ex lectione Prophetica ri-
 mari conantur, quid sibi vult Propheta cum
 duo hæc semina tam diuersa & quidem bis
 subiungit hoc est *git* cum *cymino*. Neque e-
 nim fortuito sed ex certa quadam ratione id
 factum videri debet. Tradunt namque qui
 rerum naturalium historiam scripsere esse
 οὐ φιλόφρονες & ἀντιπάθοντες hoc est *amicitiam*
 & *inimicitias* quasdam non solum inter ani-
 malia sentiendi quid iuuat aut quid noceat
 facultate prædita, sed etiam inter res surdas
 omnique sensu cassas, cuiusmodi sunt herba-
 rum genera inter se concordiam siue discor-
 diam agentium, vt *tritico* & *tipha*, *hordeo* &
auenæ, quæ simul sata foecundius proueniunt,
 aut certe non se inuicem enecant. Ediuerso
linos & *ostus* *linū* *orobanche* eruum stragulat. *Lupi-*
nus præterea *saba*, *vicia*, *lens*, *cicerula* pro ster-

core sunt aruis. Sed è cōtrario Virg. 1. Georg.

Vrit-- lini campum seges, vrit auena,

Vrunt lethæo perfusa papauera somno.

Atque vt ex Tremelij autoritate ait Varro, Solo virus ciceris obest, quia falsum est. Natura igitur inter git & cyminum tanta est concordia vt simul lata mirum in modum coalescāt, seque inuicē foecundiora reddant, quod eleganter Columella in horto suo describit. *Famosaeque tunc coriandra nascuntur, gracilique melanthia grata cymino.* Non igitur sine causa vt diximus propheta git cymino adnexuit, quādo alterum altero lætatur pinguiusque adolescit, atque in bonam frugem perducitur.

C A P V T X X I.

Gaius pro Cuius.

INter c. & g. literas tāta est in prolatione infinitas & similitudo vt non alia inter se distent quam exilitate & aspiratione, quæ quidem affectiones, quemadmodū in libello quē de vi & potestate literarum edidimus disputatū est, non possunt literas propriè in diuersas species collocare. C. nāque tenuior atque exilior est. G vero spissior aspiratioq; Ex quo fit, vt nonnūquam altera pro altera poni possit. Nō id quidem temere, sed aut per deuinationem, aut per interpretationem. Per deuinationem inquā vt quod *clades* dicatur à *gladio*. Per interpretationem vt pro eo quod *grece* dic

cè dicitur Κωβίος, κίωσος, κίδος per κ. litteram in principio & κύκνος in medio dictionis, latini per g. dicunt *gobio, gnosus, gnidos, cygnus*. Atque è contrario pro eo quod illi dicunt γορτύνη & γορτύνιος, nos *cortyno & cortinius* per c. litteram scribimus & enunciamus. Nihil igitur mirandum est si pro eo quod Latini dicunt *Caius*, quod aliquando est prænomen, aliquando nomen propriū, Paulus in calce Epistolæ quā scripsit ad Romanos, & in 1. Epist. ad Corinth. c. 1. & Lucas in historia Apostolica. c. 19. & 20. & Ioannes in Epist. 4. *Gaius* per g. litteram scriptitarint. Causa autem in hoc nomine vertendi. C. in G. illa nimirum fuit, quod quemadmodū scribit Seruius in primū Georgicorum Virgilij librū, tria sunt nomina apud latinos quæ scribuntur per. C. & proferuntur per g. hoc est *Cneius, Caius, Amurca*. pro *Gneius, Gaius, Amurga*. In hoc ergo nomine vertendo græci potius voluerunt transferre vocē quā litteram, hoc est *Gaius* per Gāma, quā *Caius* per Cappa. Quod vero *Caius* nomen sit latinū nemini dubiū est, significatque dominum, vnde extant adhuc verba illa puellarū ad viros in sponalibus contrahendis, *ubi tu Caius ibi ego Caia*. hoc est *ubi tu dominus, ibi ego domina*. Sed esto græci *Gaius* per g. literā scribant, quæ ratio poterit excusare Latinos cum suam dictionem ex græco rursus interpretantur,

tur, quin per c. literam repræsentent tametsi quemadmodum diximus per. g. proferunt.

CAPVT XXII.

Herba fullenum siue Borith.

IN Malachia propheta Cap. 3. legimus. *Ipsse enim quasi ignis conflans: & quasi herba fullonum, & sedebit conflans & emundans argentum, & purgabit filios Levi. Quæ sit hæc herba, nemo adhuc quod ego sciam explicauit. Hebræi hoc in loco & in Hieremia c. 2. habent בורית borith. Si laueris inquit te nitro & multiplicaueris tibi herbam Borith. Vtrobique illi per Borith saponem intelligunt, quibus & narratores nostri omnes propemodum alitulantur. Interpretes tamen quia herbam utrobique adiiciunt, suspicamur Borith non simpliciter esse saponem, quod fere ex cinere calce vino oleoque conficitur, sed herbam quæ sit in sermone Hispano xabonera, & cuius cineres in pastillos redacti siue lixiuio ipsius cineres adhibiti maculas linteorumque sordes abstergunt. Siue igitur Borith sit saponis siue herba saponaria, siue simpliciter smegma quoddam quod vim purgandi sordes habeat, recte cohæret vtriusque prophetæ sensus. Quare non sunt audiendi, qui herbam fullonum interpretantur illa carduorum capitula, quibus ad pectendas vestes vtuntur lanarii, ex eo fortasse decepti quod putarunt fullones esse*

esse qui lanicium ad vestes conficiendas exercent, *perailes* Hispani vocant; cum sint potius qui vestes laneas siue lintheas abluunt. maculasque & illarum sordes abstergunt. Martialis in disticho cuius index est Strigiles.

Pergamus has misit, curuo distringere ferro.

Non tam sepe teret linthea fullo tibi.

Vulpianus in titulo de furtis. l. itaque fullo. Fullo inquit vel sarcinator, qui polienda vel sarcienda vestimenta accipit. In Marco Evangelista Cap. 9. *Vestimenta inquit eius facta sunt splendentia & candida nimis velut nix, qualia fullo non potest super terram candida facere.* Apologus est præterea phrygij fabulatoris Æsopi de carbonario & fullone, quibus in locis manifestum est fullonem non eum significare qui lanicium exercet aut lanam carminans, aut ad telam perducens aut textam inficiens, sed eum potius qui vestes siue lintheas siue laneas abluit. Ex quo fit vt *γῡαφεία* per *γ* in lingua græcorum communi siue *κῡαφεία* per *κ* in Attica perperam verterint interpretes in fullonem; nectam eum significat qui instrumento illi senticoso atque ex carduorum capitibus cōpacto floccos ex lanea tela decutit, quam eum qui nitro aut cymolia creta aut aqua ex saluato, aut herba saponaria, aut alio quouis medicamento quod vim smegticam hoc est purgatiuam habeat, maculas sordesque vestium abluit.

abluit. Quod si quispiam est tam pertinax
 ut positionem defendens afferat γναφεός ety-
 mon, à γνάφω, hoc est *carduo*, quoniā ea her-
 ba utitur in decutiendis ex lanea tela floccis,
 vnde etiam sit herba Plinio *Gnaphalion* à to-
 menti similitudine, & quod eius villis pro to-
 mēto vtuntur: ut me semel ab hac quēstione
 absoluiam, permittam illi γναφεός siue *fullo*
 sit etiam ille lanearum telarum depexor, dū-
 modo sciat in locis quos supra memorauim-
 us longe aliud significare.

C A P V T X X I I I.

Iesus.

QUOD Hebręi יהושע Ichosuah vocāt Grę-
 ci in *Iesum*, Latini in *Iosue* verterunt. Ra-
 tio autem tātæ in eodem nomine diuersitatis
 illa nimirum est, quod qui dictiones Hebrai-
 cas in aliam linguam interpretati sunt, ad
 molliendam barbarę vocis duriciem, alij aliā
 rationem secuti quasdam literas penitus ex-
 punxerunt, quasdam adiecerunt, alias non-
 nūquam in alias commutarunt. Septuaginta
 namque interpretes qui primi sacras literas
 ex Hebræo in gręcum sermonē vertere sunt
 ausi, ex Ichosua יְהוֹשֻׁעַ fecere, expuncta vide-
 licet he litera cū apice holē, quod & alijs cō-
 pluribus in locis fecerunt, præcipuē in tri-
 bus illis literis, quæ sunt Græcis & Latinis
 omnino incognitæ, hoc est, ע. ה. ו. he, *heh,*
hain:

hain : quas aliquando retentis apicibus, aliquando cum suis apicibus dispunxerunt : id quod discurrentibus per nomina Sacrae Scripturae licet videre. Sed cur Græci huic particulæ terminationem in *us* syllabam per *ou* diphthongon dederint : atque in eadem accentum circumflexum collocarint, non potui reperire quenquam qui mihi diceret. Sed cum Græci nunquam circumflectant ultimas dictionum syllabas, nisi sint contractæ ex synæresi, neque ex quacunque synæresi, sed ex ea tantum quæ sit ex acuta & graui, cæpi inquirere an eiusmodi essent in Hebræo syllabæ, quæ possent per synæresim in vnam syllabam coagmentari, id quod manifestè deprehensum est, cum in יהושע *Iehosua* in penultima sit accentus acutus, & in ultima grauis, ex quibus contractis coalescit syllabâ, in qua desiderat circumflexus accentus collocari. Latini vero in interpretanda hac particula aliam rationem secuti sunt: Nam in יהושע *Iehosuah* ex prima syllaba apicem seba extriuerunt, & ex secunda aspirationē, & sic ex Iod & holē fecerūt יו.י *Io. e.* *hain* vero quod in fine erat cum subiecto patha verterunt in *e.* quod alijs quoque multis in locis factitarunt, ut in בתשבע *bathsabah*, *bethsabe.* בארשבע *beer-sabah*, *bersabe.* שוה *suahh*, *sue.* בלע *balah*, *bale* חושע *hoscah*, *osec.* Atq; ita conflatū est *Iosue*

nomen accentu acuto in penultima. Cum itaque Iesûs meram habeat græcam literaturam, necesse est per omnes casus vltimam circumflectat eandemque ex consequenti producat, atque accusatiuum per n literam non per m finiat, & in summa ad proportionem græcorum similiter cadentium declinetur. Cunque idem sit Ἰησοῦς græce quod *Iosue* apud latinos, obseruatum est, vt in omnibus codicibus qui ex græco venerunt in sermonem latinum, nunquam dicatur *Iosue* sed *Iesus*. In ijs vero quæ venerunt ex Hebræo tum *Iesus* tum *Iosue* sit in vsu. Quare in toto nouo Testamento quia ex græco sermone ad nos venit, nunquam *Iosue* sed *Iesus* semper reperitur. Ecclesiasticus quoque atque duo Machabæorum libri quia omnino græci sunt, nunquam nominant *Iosue* sed *Iesum*. In alijs veteris Instrumenti libris prope semper *Iosue* nominatur, præterquam in Abbacuc & Aggæo & Zacharia & Ezra & Neemia. Illud quoque non est dissimulandum, auctores qui sequuntur Hebræos *Iesus* protulisse bisyllabum, qui vero græcos trisyllabum, quoniam apud hos, i. semper vocalis est, apud illos vero in hac particula semper consonans reperitur.

CAPVT XXIIII.

Ioannes pro Iona.

Pro

Pro eo quod Matthæus scribit de Petro Apostolo *Beatus es Simon Bariona*, apud Ioannem legimus, *Simon Ioannis diligis me plus his*. Ex qua lectionis diuersitate necesse est alterum è duobus fateri, aut patrem Petri fuisse binominem, hoc est cognominatum *Ionam & Ioannem*, aut in alterutro Euangelista scripturam esse vitiatam. Fuit tempus quo ego existimabam illud quod Matthæus dicit *Bariona* hoc est *fili Iona*, *Iona* abscissum esse ab eo quod est *Iohana*, idque mihi persuadebam tum auctoritate Chrysostomi qui lectionem illam agnoscit, tum ex eo quod græci & latini transferentes nomina Hebræa in suas linguas aliquando abijciunt aspirationem simplicem siue duplicem retento apice, aliquando dispungunt vtrumque, hoc est litteram simul & apicem, quemadmodum pro eo quod Hebræi dicunt *Iehosuah*. græci extrita he littera cum suo holem dicunt *Iesus*. Latini vero Seba dispuncta cum aspiratione sequentis syllabæ scripserunt *Iosue*. Atque pari modo ex *Iohanna* expuncta aspiratione cum suo apice potuisse fieri *Iona*, id quod Augustinus videtur significare de concordia Evangelistarū. Cumque in ea essem opinione idque asseueratè defenderem, perfudit os meū rubore perquam Reuerendus in Christo pater ac clementissimus Dominus & patronus meus

meus Cardinalis Hispanus, qui mihi ex codice græco monstraui in Euangelio Ioan. non esse legendū *Simon Iōānis*, sed *Simon Iona*, subaudi filius, quod est consentaneum ei quod Matth. scripsit *Simon Bariona*: æquē *Iona filius*.

C A P V T X X V.

Lustrum.

EST ille publicus error, in quē video omnes quos vnquam legerim aut audierim turpiter lapsos, de recentioribus loquor: nam cū his tantum mihi certamen est, qui dicūt *lustrum* constare spatio quinq; annorū. Citantque stultitiæ suæ testes non infirmæ auctoritatis Lucanum imprimis de bello decemnali Cæsar in Gallia: qui inquit,

Pugnantem geminis tenuit te Gallia lustris.

Ouidium, qui bellum Troianū quod per totidem annos durauerat, *bilustre* quoq; appellauit. Illud quoque Ecclesiasticum: *Lustra sex qui iam peracta Tempus implens corporis*. Afferunt præterea Varronis testimonium de origine linguę latinæ; *Tempus*, inquit, *nominatum tēpus quinquennale à luendo, id est, soluendo, quod quinto quoque anno vectigalia & tributa per censores soluebantur*. Difficile est tantorum virorū auctoritati repugnare, sed multo difficilius reclamanti obsistere veritati. Quis enim ignorat bisextilem diem quarto quoque anno intercalari? Plinius lib. 2. *Naturalis historiae*; per
sing.

singulas, inquit, intercalationes vno die antecedentibus rursusque lustra sequenti ordine seruantibus. & paulo post; Redire, inquit, easdem vices quadriennio exacto Euxodus putat, & est principium lustri eius semper intercalari anno caniculæ exortu. Intercalationem quoque eam lustro, id est, quadriennio fieri, Ouidius in. 3. fastorum volumine scribit in hunc modum,

Is decies senos trecentum & quinque diebus,

Iungit, & è pleno tempora quarta die.

Hic anni modus est, in lustrum accedere debet,

Quæ consumatur paribus vna dies.

Quid quod omnes docti simul & indocti fassentur lustrū latine dici, quam græci vocant ὀλυμπιάδα. Nā & Papinius pro olympiade lustrum posuit dicens. Nō aliter cum piseo sua lustrum tonanti cum redeunt. Sed quod olympias tantum quatuor annos complectatur, licet animaduertere cum alijs in locis, tum in Eusebij chronico, vbi per quaternos annos olympiades digerit. Vnde igitur ortus est tantus error, vt pro quatuor quinque accipiantur? Ex eo nimirum quod termini accipiuntur pro interuallis. Sic dicimus quia Diapason consonantia constat ex octo vocibus, cum interualla sint tantū septē, hoc est quinq; toni & duo semitonía, sic quod ab octauo in octauū est dies dominicus, cū tamē in Hebdomade sint tantū dies

dies septem. Pari quoque ratione cūm dicimus à quinto in quintum annum debere diē bisextilem intercalari : illud nimirū intelligimus, quod ea intercalatio, exactio quadriēnio quolibet debeat fieri in eo qui est quadriēnij præteriti finis & initium sequentis. Quam differentiam nescio an satis Latine isti solent facere per hæc aduerbia exclusiue & inclusiue, vt sint in *lustro* quinque anni exclusiue, quatuor verò inclusiue. Sic febres tertianas quartanasque vocamus, non quod illas tertio aut quarto quoque die contingat accedere: sed quod à tertio in tertium, aut à quarto in quartum ægrotañtes corripiant. Hinc est quinta illa Tychonij regula, quam Augustinus in 3. de doctrina Christiana volum. adducit ad intelligendum complures ex scriptura locos; cūm per tropum Synechdochen, aut à parte totum intelligimus, aut ē cōtrario à toto partem, vt quod in transfiguratione Domini alter Euangelista scribit: quod *post dies octo assumpsit Petrum, Iacobum, & Ioannem*. Alter vero *post dies sex* factum fuisse dicit. Vtrumque verum esse non posset, quod de numero dierum dictum est; nisi alter dies primum & vltimum imperfectos, alter sex medios integros accepisset. Hinc etiam soluitur illa de Christi resurrectione quæstio, cum non fuerit in sepulchro, nisi *horis sex & triginta, adiectis tribus*

*bus, ex quo expiravit, quomodo dicimus quod
resurrexit die tertio. Nisi enim ultima diei pars
in qua passus est, & prima in qua resurrexit,
pro integris accipiantur, nō esset verum quod
die tertio resurrexit à mortuis. Sed esto lu-
strum pro quinque annis, hoc est quatuor an-
nis exactis & quinto inchoato accipiatur, esto
bellum gallicum sit à Casare duobus lustris
exactis & tertio vertente peractum, aut octo
medijs annis peractis primo & nouissimo im-
perfectis: nonne ex regula Tychonij vtrum-
que verum esse potest, & quod *lustrum* conti-
net annos quatuor & annos quinque & *duo*
lustra annos octo & annos decem? Quod ve-
ro sex lustris exactis Christus ad passionem
venerit, nulla Tychonij regula defendi, nulla
ratione excusari potest. Sex namque *lustra*
quatuor & viginti annos complectuntur. At-
qui ecclesiastici auctores partim anno tertio,
& trigesimo, partim quarto & trigesimo æta-
tis passum affirmant. hoc est lustris octo pera-
ctis & nono inchoato. Quod si *lustrum* idem
est quod *olympias* id quod omnes fatentur, à
Christi die natali ad eius passionem octo in-
tegræ *olympiades* supputantur. Natus est enim
anno tertio centesimæ nonagesimæ quartæ
olympiadis, passus verò tertio anno ducentesi-
mæ secundæ *olympiadis*, hoc est anno duodeui-
gesimo principatus Tiberij Cæsaris.*

CAP.

Moses an Moyses.

Sæpe mihi dubiam traxit sententia mentem in eo quod idētidem à viris doctissimis percontatus sum, vnde y. litera Hebræis atque latinis incognita in hoc nomen *Moyses* irrepsit. Nam cum apud Hebræos *Moses* scribatur atque legatur per mem imposito apice holem, deinde per sin subiecto Segol & in fine cum simplici aspiratione משה moseh, mirum vnde potuerit in hanc particulam y. conflare. Atqui apud latinos auctores nusquam *Moyes* sed semper *Moses* legitur. Plinius libro. 30. est inquit & alia magicæ factio à Mose etiamnum & latopea iudeis pendens. Iustinus quoque ex Trogo Pompeio libro. 36. Post Damascum inquit Abram & Israel & Moyses, reges fuerunt. & paulo post filius Iosephi Moyses fuit: Neque enim de fide historiæ nunc agitur, sed de puritate sermonis, & ne quis cavillari possit, literam libratorum vitio fuisse dispunctam, Iuuenalis satyra. 14. versum hexametron Ipondeo claudens dixit.

*Iudaicum ediscunt & servant ac metunt ins,
Tradidit arcano quodcumq; volumine Moses.*
Observatum quoque est apud Iuuenicum in Evangelica historia, & apud Aratorem cardinalem in actibus Apostolorum, & apud Prudentium in varijs operibus semper *Moses* & nun.

numquam *Moyſes* legi. Apud auctores tamē
græcos vtrumque indifferenter legitur. Cum
itaque in eo eſſem articulo vt putarem in hac
dictione *υψιλόν* fuiſſe interiectum, venit mi-
hi in mentē legiſſe apud non contemnendæ
auctoritatis ſcriptores fuiſſe apud Iones diph-
thongon ex *ω* & *υ* coagmentatā, in qua *υ* tali
modo proferretur qualis ſonat in *αυ* & *ευ*
diphthongis, vt ſi ab hac particula *ouis* detra-
has *is*. Vnde fieri potuit vt in principio à græ-
cis *μωυσῆς* per *ωυ* diphthongon ſcriberetur,
deinde ſoluta diphthongo *μωύσῆς* triſyllabi-
cōs proferrent, ſicut econtrario in *Εφραιμ*
& *Ἰεσαϊ* vocales ſolutas in diphthongon
commutarunt *Εφραιμ* & *Ἰεσαϊ* enuncian-
tes. Declinatur autem hoc nomē apud sacra-
rum literarum auctores græcos varijs modis,
Μωσεὺς & *Μωύσεὺς* per *ευς* diphthongō, & *Μω-
σῆς* ſiue *Μωύσῆς* per *η*. Ab eo quod eſt *Μωσεὺς*
& *Μωύσεὺς* fit in genitiuo *Μωσέως* & *Μωύσέως*
in datiuo *Μωσει* per *ει* diphthongō & *Μωύσει*,
in accuſat. *Μωσέα* & *Μωύσέα*, in vocat. *Μωσεῦ*
& *Μωύσεῦ*. Ab eo quod eſt *Μωσῆς* & *Μωύσῆς*
genit. facit *Μωσῆ* & *Μωύσῆ*, Dat. *Μωσῇ* &
Μωύσῃ per *η*, accuſat. *Μωσῆν* & *Μωύσῆν*, vo-
cat. *ὦ Μωσῆ* vel *Μωσῆς*, *ὦ Μωύσῃ* vel *Μωύ-
σῆς*. Ab eo quod eſt *Μωσεὺς* vel *Μωύσεὺς* La-
tini doctiſſimi *Moles* & *Moyſes* *Moyſis* & in
Dat. *Moſi* & *Moyſi* & in accuſ. *Moſen* & *Moyſen*
K facere

facere potuerunt, quemadmodum à Τυδῆυς
Tydes, ab Ἀχιλλεύς *Achilles*, ab Οὐδυσσεύς
Ulysses, à Περσεύς *Perfes*. Ab eo quod est Μο-
seus Iuuenius lib. 4. de Euangelica historia fa-
 cit in accusatiuo *Mosea*. cum dixit.

Mosca qui legum potuit præcepta iubere.

Nam quod in Pentatheuco legitur frequen-
 ter, *Locutus est Dominus ad Moysen* ab eo dica-
 tur quod est Μωυσῆς Μωϋσῃ. Quodque fre-
 quenter in sacris literis usurpatur *Moyse* in
 genitiuo, datiuus est pro genitiuo, nam dati-
 uus est Μωϋσῃ per eta in fine ab eo quod est
 Μωϋσῆς, Μωϋσῃ, Μωϋσῃ. Iam vero datiuum
 poni pro genitiuo figura frequens est apud
 poetas, quod & Priscianus testatur de his no-
 minibus quæ ad tertiam declinationem lati-
 nam reducuntur. Quemadmodum vero ab
Achilleus, dicimus doctores secuti *Achilles*
Achillis Achilli. & in Virg. prim. *Ænei*.

Troas reliquias Danaū atque immitis *Achilli*.
 pro *Achillis*, & ab *Ulyssæus Ulysses Ulyssi*, & inde
 idem auctor in 2. eiusdem operis,

Aut duri miles Ulyssi.

pro *Ulyssis*, ita ab eo quod est *Moyseus* latini
 potuerunt facere *Moyes Moyses Moysi*, & in
 genitiuo *Moyse*, pro *Moyse*. Hæc idcirco sunt
 à me tam multis ut quodam modo excusare
 tur quod in introductionibus meis proposui
 declinationem barbaram, per quam dixi hoc
 nomen

nomen declinari. Illud quoque aduertendum est omnes casus huius nominis circumflectere vltimam apud græcos & qui illorum declinatione vtimur etiam apud latinos. Sed quod in recto vltima circumflectatur nondum mihi liquet, cum apud græcos nunquam id contingat, nisi ex acuta & graui fiat syneresis, id quod in nomine *Iesus* diximus.

C A P V T X X V I I.

Mænianum quid est.

IN Ezra volumine in cap 6. legimus quod Cyrus rex iussit extrui Mænianum in domo domini. Sed quid Mænianum sit, aut vnde sit appellatum dubitabit fortasse quispiam. Sextus Festus Pompeius *Mæniana* inquit *edificia à Menio sunt appellata, qui primus in foro ultra columnas tigna proiecit, quo ampliarentur superiora spectacula.* Hic est ille Mænius qui post bona patris absumpta columnam sibi seruauit vnde ludos spectaret. De quo Horatius in 1. epistolarum.

Mænius vt rebus maternis atque paternis.
Atque alio in loco.

Mænius absentem Nonium cum carperet,
Quem locum enarrans Porphyrio *Mænius* inquit *scurrilitate notissimus post abrosum patrimonium vendidisse domum aiunt, quam habuerat ad domum spectantem vna sibi exempta columna vnde gladiatores spectaret, quæ ex eo Mæ-*

menij columna vocabatur. De qua Lucilius, Menius inquit cum columnam peteret. Asconius quoque Pedianus in Ciceronis diuinatione actionum Verrinarum exponens illud ad columnam meniam, Menius inquit cum domum suam venderet Catoni & Flacco censoribus ut ibi Basilica edificaretur, exceperat ius sibi unius columnæ super quam tectum proijceret, & prouolantibus tabulatis ipse & posterius eius spectare munus gladiatorum possent, quod etiam tum in foro dabatur. & subdit. Ex illo igitur columna menia vocitata est. Meniani meminit Valerius Maximus in tit. de mortibus non vulgaribus. C. Lucinius inquit dum sententiæ dicerentur in menianum conscendit. Vitruuius quoque libro. 5. in principio. Meniana inquit in superioribus coassationibus collocantur. Hieronymus in Epistola ad Suniam & Fretelam exponens illud psalmographi. Factus sum sicut passer solitarius in tecto (doma in orientalibus prouincijs dicitur ipsum quod apud nos tectum) In Aegypto inquit & in Palestina ubi vel scripti sunt diuini libri vel interpretati non habent in rectis culmina, sed domata, quæ Romæ solaria vel meniana vocantur, id est, palatia tecta quæ transuersis trabibus sustentantur. denique & in actibus Apostolorum, Ascendit inquit in doma. Iabolenus in tit. de verborum significatione. l. malū, quale genus edificiij sit ostendit

dit dicens. *Interproiectum* inquit & *immissum* hoc interesse Labeo ait, quod *proiectum* esset in quo ita proueberetur ut nusquam requiesceret qualia *mæniana* subgrundaria essent, id est, recti partes impendentes ad parietum munitiones. Vulpianus quoque in titulo, ne quid in loco publico l. 2. c. Cum quidam, inquit, in *mæniano* velum *immissum* haberet, quod vicini luminibus officiebat. In codice præterea Iustiani tit. de ædificijs priuatis. l. *Mæniana*. *Mæniana* inquit siue olim cōstruēta siue imposterum cōstruēda. Accursius quemadmodū & Hieronymus *mæniana* solaria interpretatur, sed quod à *mænibus* dicantur nemo præter ipsum dixit.

CAPVT XXVIII.

Meditor pro exerceor.

MEditor, aris nō modo significat id quod habet in promptu, hoc est, cogitare, sed plerūque pro eo quod est exercere accipitur, ut apud Iuuenalem;

Fuscus marmorea meditatus prælia villa.

Idem,

Et statua meditatus prælia lusca.

Plautus in sticho. *Simul ad cursuram meditabor me ad ludos olympiæ.* Virg. quoque 2. Geor.

Iuno pestem meditata iuuenæ.

In hac significatione accipitur illud ex Genesi c. 24. vbi legimus Isaac exisse ut *meditare.*

tur in agro. Nam quod Nicolaus exponit ad *orandum*, rectius dixisset ad *arandum*, nam eo in loco potius actum corporis quam mentis cogitationem intelligit. Quale est illud Proverbiorum cap. 8. *Sicut pullus hirundinis clamabo, meditabor ut columba*, & illud Esaiæ 48. *Veritatem meditabitur guttur meum*, quod utrumque cum voce siue cantu quodam fit, ut non male intelligatur quod in psalmo legitur, *In lege eius meditabitur die ac nocte*, & quod hymnographus scribit, *semper in psalmis meditemur*, pro eo quod est ad cantum siue in cantu exerceri. quemadmodum apud Virgilium in Bucolicis.

Sylvestrem tenui musam meditaris auena.

Atque,

Agrestem tenui meditabor arundine musam,

Et illud.

Omniaque phæbo quondam meditante beatus

Audyt euros:as insitque ediscere lauros.

Ille canit.

In græco quoque in illo loco egressus fuerat ad meditandum in agro, habetur ἀδολέσχισαι, id est, ad exercendum.

C A P V T X X I X.

Melita.

ENatanti Paulo Apostolo ex illa tempore state quam describit Lucas in Apostolica Historia cap. 27. occurrit insula Melita, & cum euasissimus hunc cognouimus quod insula Melita

Melita vocabatur. Hæc namque est vera lectio, atque sic ex græco venit interpres, non quod in quibusdam codicibus latinis legitur tum *Mirylene*, tum *Miletus*, tum *Melitenæ*. Nam *Mirylene* non est insula, sed ciuitas est Lesbi insulæ contra Troadem positæ, distans à *Melita* non minus octingentis milibus passuum. *Miletus* quoque non est insula sed oppidum in Ionia insigne, patria Thaletis illius qui fuit vnus idemque primus ex septem sapientibus, ac præterea Timothei Musici & Anaxymandri physici. distatque à *Melita* nostra passibus aliquanto pluribus quam *Mirylene*. *Melylene* vero ciuitas est Cappadociæ, quā præterfluit Euphrates fluuius. Ex Plinio, Strabone, Martiano cæterisque. Distat autem *Melitenæ* à *Melita* duplo amplius quam *Miletus* & *Mirylene*. Est autem *Melita* insula inter Siciliam & Africam distans à Syracusis quo ex *Melita* Paulus adnauigauit passus circiter cētum mille. hodie appellatur *Maltha* Sicilię regno contributa. de qua Ptolomæus. *pelagie inquit insule inter Africam & Siciliam hæ sunt. Cosyra & glauconis insula & Melita in qua ciuitas eiusdem nominis.* Strabo præterea lib. 6. in descriptione insularum Siciliæ adiacentium. Imminet autem *Pachino* *Melita* de qua catelli portantur quos *Melitreos* vocant. Plinius quoque lib. 3. in *Siculo* inquit *freto sunt insule in*

Africam verſe Gaulos & Melitā à Camarina octoginta quatuor millibus paſſuum diſtans. Atque vt omnis de nomine huius inſulæ tollatur ambiguitas: Arator cardinalis cuius auctoritatē eccleſia Romana præfert, non modo Hugoni cōcardinali Mametrecto & Nicolao qui dicit Mytylene eſſe literam correctam cū nihil ſit corruptius, ſed reliquis omnibus neotericis, qui ſacræ ſcripturæ locos conati ſunt enarrare. Is namque in 2. volum. Apoſtol. hiſtorię, vbi hanc partem Euangelifta proſequitur, heroicis carminibus ſic ait:

*His dictis ruit ira maris, ſublataque dudum
Lux reuocata micat: velamine noctis aperto.
Pandere viſa ſolū, quod præbuit hospita nautis:
Sicanio lateri remis vicina Melite.*

Sed aduertenda eſt varietas inter duos egregios auctores in ſyllabæ quantitate. Arator namque ſecutus accentum Græcum penultimam produxit, quod & in alijs locis fecit, nam vltima longa exiſtens apud Græcos non vult accentum acutum in antepenultima collocari. Ouidius tamen in 3. Faſtorum eandē breuiavit dicens:

*Fertilis eſt Melite ſterili vicina Coſyræ
Inſula, quam Libyci verberat vnda freti.*

C A P V T X X X.

Nicol pro Merob.

IN Testamento Nouo quosdam esse locos in quibus aliæ personæ pro alijs leguntur, nesciri verò causas tantæ varietatis identidem diximus: sed & nunc dicimus in Veteri quoque tale aliquid reperiri, vt quod in secundo Regum volumine cap. 21. legitur *Micol* pro *Merob*. Tullit, inquit, *Dauid Rex duos filios Respha* quos peperit *Saul Admoni & Miphiboseth*; & *quinque filios Micol filiæ Saul* quos genuerat *Adrieli filio Berzellai*: & dedit eos in manus *Gabaonitarum*, qui crucifixerunt eos in monte coram Domino. Hic manifestum est *Micol* pro *Merob* positam esse. Nam constat *Saul* duas genuisse filias, *Merob* primam & alteram *Micol* ex 1. Reg. c. 14. Deinde dedisse *Merob* filiã maiorem *Adrieli molathite*, & *Micol* filiam minorem *Dauid* pactam preputijs centũ philistæorum ex 1. Reg. c. 18. quam postea abduxit à *Dauid* & tradidit *Phalti filio Lais*, ex 1. Reg. c. 15. Quam rursus *Dauid* abstractam à *Phalti* domũ reduxit ex 2. Re. c. 3. Quomodo igitur fieri potuit vt *Micol* filios generare potuerit *Adrieli*, qui traderentur *Gabaonitis*? Quod si quispiam dixerit *Micol* repudiatam rursus à *Dauid*, quod non est credibile, & susceptam ab *Adriele*, tempora videntur obstare, sed illud imprimis quod scribitur in 2. Reg. c. 6. *Micol filiæ Saul non est natus filius usque in diem mortis suæ*. Hebræus quidam legis

atque antiquitatis hebraicæ satis peritus dicebat mihi. *Merob* illos quinque viros genuisse phalti, sed *Nichol* adoptasse sibi. Sed hoc est violentiam inferre lectioni, quæ dicit quod illos genuerit Adrieli. In vtriusque igitur codicibus hebræis & latinis, nam græcos nobis videre non contigit: mendum est *Nicol* pro *Merob*.

CAPVT XXXI.

Myzale quid.

INter immunda animalia legislator in Leuitico cap. 11. *Myzalem* numerat. hæc inquit inter polluta reputabuntur de ijs quæ mouentur in terra, *mustela*, & *mus*, & *crocodilus*, *Myzale*, *chamæleon*, & *stellio*. Sed cum *Myzalem* omnes interpretantur *murem arachneum* non possumus vti aiunt digito monstrare, quæ nã bestiola sit cum raro inueniatur. Plinius libro 8. scribit, *muribus arachneis venenatum esse morsum*, eosdemque vltiorem regionem apocynam non habere, eosdemque ubicumque sint si transierint orbitam interire. Iulius Firmicus libro matheseon. 7. in arietis inquit parte. 18. qui habuerit horoscopus à modica *bestiola*, id est aut à *phalangio* aut à *mure Arachneo* aut à *scorpione* morietur. *Myzale* vero dicitur græce à *μῦς* quod est *mus*, & *γὰλῆ* quod est *mustela*, quod muris magnitudine sit, *mustelina* specie, rostro oblōgo, cauda gracili, ordine den-

ne dentium quadruplici: vt auctor est Aëtius. Frequens in Britannia insula, sicque ab insularis hodie appellatur. Galenus lib. 11. de medicina simplici cap. 25. & in libello de centaurea, quasi de venenatae bestiolæ morsu meminit: nisi quod illius interpretes *mygalem* in *mustelam* vertit, cum *mustela* longè aliud sit à *mustela*. Scribit præterea Herodotus lib. 2. de rebus Ægyptijs: quod cum *Mygale* moriuntur, ab illis in Buthon urbem humandi gratia asportantur: vt meritò Moses huius bestiolæ meminerit: quippe qui octoginta annos fuerit in Ægypto. nam ea ætate dux itineris factus ab Ægyptia seruitute Israeliticum populum asseruit.

CAPVT XXXII.

Non, adiecta aut detracta.

Non particula negatiua in plarisque locis *adiecta* siue *detracta* non modo perturbat sensum, verum etiam lectorem in contrariam sententiam transuersum rapit. Cuiusmodi est illud quod Moses scribit Geneseos cap. 8. *Aperuit inquit Noe fenestram arcæ quam fecerat & dimisit coruum, qui ibat & non reuertebatur.* Atqui in Hebræo & in codicibus vetustis longobardis goticis inter Pœnos & latinis non particula detracta est, *qui ibat inquit & reuertebatur.* qui est sensus manifestus & lectioni consentaneus, quia videlicet

cum

cum terra esset aquis vndique obruta, non inueniens vbi consisteret, ibat & reuertebatur ad arcam, idque identidem fecisse, ostendit tempus præteritum imperfectum. Nam si coruus reuersus non fuisset, potius diceret per præteritum perfectum *iuuit & non est reuersus*. Quid quod post coruum colūba dimissa quoquo versus volitans nusquam vbi conquiesceret inueniens ad arcam rediens, & post septem dies iterum remissa surculum oliuę detulit, vt credibile sit tantum arborum cacumina coepisse comparere. Quod si coruo aliqua consistendi causa fuit, non potuit esse alia quam cadauer aliquod iuuentum innatans super aquas. Itaque non in eo laboramus nunc vtrum coruus redierit, an non redierit, sed vt veritatem hebraicam defendamus, cui astipulantur codices peruersti, refragantur noui. Sed quemadmodum in lexico Iuris Civilis scripsimus *non quoque particula adiecta mentem legislatoris in contrarium vertit*. Iurisconsultus namque scribens in titulo de officio proconsulis. *legatus inquit mandata sibi iurisdictione iudicis dandi ius non habet*. Cæterum in pandectis florentinorum archetypis *non particula non habetur*, adnotante Angelo Politiano, cui sæpe data est copia librorum illos prototypos inspiciendi. Sed an iudex delegatus habeat facultatem subdelegandi, vide-


viderint iuris periti, nos veterem lectionem tuemur. Ediuerso quoque *eadem particula*, non minus in contrarium legis æquitatem mutat. vt libro digestorum vnde uigesimo, in titulo qui est de præscriptis verbis. l. non solent, sic enim legendum est non vt omnes codices vulgo habent, *solent*. *Non solent* inquit qui nouerunt seruos fugitiuos alicubi celari, indicare eos Dominis ubi celentur, quæ res non facit eos fures. Quod si legas *solent* qui nouerunt. &c. erit sensus legis non modo iniquus & inciuilis, verum etiam falsus & à mente iurisconsulti alienus. Quis enim furem appellauerit eum qui scit seruum alicuius apud fugitiuarium delitescere? Quid quod Innocentius in titulo de furtis cap. qui cum fure partitur, in calce commentationis citat hanc legem sub hac lectione, *non solent* qui nouerunt. quod ipsum argumento est suo tempore digestorum libros nondum fuisse vitiatos, quales nunc reperiuntur.

C A P V T XXXIII.

Onocrotalus.

PR O eo quod apud Hebræos Leuitici c. 11. legitur *אֶתְּ* caath, Septuaginta primū atque deinceps reliqui interpretes Græci & Latini *Onocrotalum* transtulerunt. Inter aues namque quibus vesci per Mosen Deus prohibet Hebræos, caath, hoc est, *Onocrotalum* nominat.

minat. De auibus inquit, comedere non debetis
Onocrotalum & Porphyryonem & herodionem.
 Atque iterum in Deuteronomio cap. 14. Im-
 mundas aues non comedetis, porphyryonem scilicet
 & nycticoracem, Onocrotalum & charadrium.
 Onocrotali quoque meminit Esaias cap. 34.
 Non erit, inquit, transiens per eam, & possidebit
 illam Onocrotalus & Ericius. Plinius libro 10,
 Naturalis historiæ, cuiusmodi auis illa sit his
 verbis ostendit: Olorum similitudinem Onocro-
 tali habent, nec distare existimarentur omnino, nisi
 faucibus ipsis inesset alterius vteri genus, huc om-
 nia inexplabile animal congerit: mira ut sit cap-
 citas, mox perfecta rapina sensim inde os reddit
 inferam in aluum ruminantis modo defert. Hæc
 pulcherrima dictu sunt, sed nihilo plus affe-
 runt vtilitatis quam si nihil diceretur. Neque
 enim satis est audire quod sit auis cygno simi-
 lis, cum sit nostratibus cygnis duplo maior,
 tametsi illis aliquo modo sit persimilis. Nam
 quod Plinius scribit nihil ab oloribus distare
 nisi faucibus ipsis inesset alterius vteri genus:
 quid per vterum ipse intelligat satis liquet, nō
 tamen per nomen designatur quod ipse vult,
 hoc est *ingluuiem*, quæ à græcis πρόλεβος dici-
 tur. Est autem ingluuiem quemadmodum ab
 Aristotele in 3. de historia animalium defini-
 tur, cutis in amplum sinuata, qua primum ci-
 bus ingestus continetur incoctus, hæc qua
 parte



parte iungitur gulæ angustior est mox amplior: tum qua desinit in ventriculum iterum arctior. de qua Virgilius in 3. Geor.

Improbis ingluviem ramisq; loquacibus explet.
Hæc inquam in *Onocrotalo* mirum in modum est ampla, quippe quæ amphoræ mensurâ aut non multo minus capiat. de qua Martialis:

Turpe rauenatis guttur Onocrotali.
nam turpe guttur pro magna ingluvie posuit. Turpe enim pro magno aliquâdo accipi notavit Seruius Grammaticus in illud Virgilij 3. Georgicorum:

Optima toræ

Forma bouis, cui turpe caput, cui plurima cexuix.
& illud ex 4. eiusdem:

Armenta & turpes pascit sub gurgite phocas.
utrobique exponens turpe pro magno. Hanc *Onocrotalus* aqua explet, atque ore aperto pisculis se obiectat; quos cum sentit deprehensos intra ingluviem, aquam per oris spiramenta euomit, atque ita præda vescitur: ab hoc aque vomitu ego suspicor ab Hebræis auem cognominatam caath, quod caath vomitus interpretatur, & ne quasi de re incognita pluribus disputem: duos *Onocrotalos* contigit mihi videre, alterum comminus in foro Bononiensi, ad vulgi spectaculum publicè expositum; alterum eminus ad anæ fluminis ripam, ad cuius volantis monstrolam magnitudinem visendam

sendam multi mortales concurerunt. Equi-
parabat sane mole sua agnum anniculum.
Sed cum nemo sciret avis nomen, quan-
quam alij dicerent se alias consimiles vidisse,
ego illis dixi croton in Italia vocari, & reue-
ra ita appellabant Bononienses. Sed cum
Onocrotalus interpretetur asinus crepitans,
quoniam ὄνος est *asinus* & κροτάω *crepito*, vide-
tur nomen impositum à voce quam avis illa
edat. quam mihi audire non licuit, propterea
quod quemadmodum dixi alterum commi-
nus extinctum, alterum eminus volantem
conspicatus sum.

C A P V T X X X I I I I.

Phase Pascha pefach.

Q Vid interpreti venerit in mentem, vt
quod ab Hebræis dicitur פסח *Pefach*
per sameh in exodo atque alijs in locis instru-
menti veteris interpretatus sit in *Phase*, in te-
stamento Nouo græcè & latinè dicatur *pas-
cha*, aut quid simile inter se habeant hæc tria
pefach, *phase*, *pascha*, vt ausus sit latinus inter-
pres vertere *Pefach* in *Phase*, aut græcus in
πάσχα, vellē differeret mihi quispiam trium
linguarum peritus. Interim vero dicam ego
quod sentio, quoad alius afferat aliquid me-
lius. Sed de *Phase* in primis p. exile in aspira-
tum verti frequens est apud eos qui de He-
bræo sermone transferunt in græcum aut la-
tinum,

tipū, ut pro eo quod hebrei dicunt פֶּרַע Paro
 פִּסְגָּה Pisga פִּסְגֻר Pasgur. per p. exile, græ-
 ci primū deinde latini transtulerunt Pha-
 raon, phasga. phasur per ph. aspiratum & mille
 alia. seba vero apex qui subiicitur p. literę cū
 ab illis prope semper per e. vocalem profera-
 tur, græci & latini plærumque vertunt in a,
 ut pro eo quod illi dicunt per seba שְׂמוּאֵל
 Semuel זְבֻלוֹן Zebulon רֵפְאִים rephaim, nos
 per a. proferimus. Quod illi præterea זֵרָה
 Zerah, גֵּבֶר Geber עֶקְרוֹן Ecron per segol
 nos Zara, Gader, Acarō pronunciamus per a.
 vocalem. סָמָא Sama quoque in s. vertendū esse
 nō est dubium, quæ litera quanquā non mul-
 tum distet in prolatione à zeta, s. nostro & sig-
 ma græco respondet, cum שׁ sin & צ tsade vio-
 lenter in illas transferantur, quemadmodum
 in libello de potestate literarum ex auctori-
 tate Hieronymi demonstrauimus. Illud mi-
 rabile quid placuerit interpretibus græcis
 & latinis הֵת literam, quam Hieronymus du-
 plicem aspirationem vocat subiecto patha
 siue comes vertere semper in e. literam, ut
 נֹחַ Noah Noe תֵּרָח Therah Thare קֹרַח Co-
 rah, כּוֹרֵה Core יִפְתָּה Iiphtah Iephthe, atque eadem
 ratione פֶּסַח Pesah, Phase: p. subtili in aspira-
 tum e. in a. sama in s. heth subiecto patha in
 e. Atqui græci literis inuersis in πᾶσα ver-
 terunt. Nam heth literam in χ suum plæ-
 rumque

rumque mutant . latini quia talem vocem ^{pō}
 agnoscunt nisi tantum in dictionibus græcis,
 illam prope semper expungunt, aut in simpli-
 cem aspirationem vertunt . vt pro eo quod
 Hebræi per heth dicunt חָרָן charan חֹרֵרִי cho-
 ri חֶבְרֹן choreb חֶבְרוֹן chebron græci per suum
 χ χαρὰ χαρρῶν χαρρῶν χαρρῶν dicunt, at lati-
 ni expuncta ח littera. Aran, Ori siue horri, E-
 bron siue Hebron proferunt . De nominis
 huius interpretatione nihilo magis est silen-
 dum, in quo maximi auctores aberrarunt pu-
 tantes πᾶσχα dictum à πᾶσχα quod est pa-
 tior perinde ac si dictio Hebraica patiatur ety-
 mologiam græcam aut græca latinam . De
 quo in repetitione quadam nostra disputau-
 mus, monstrauiusque non posse fieri. hi
 sunt non de media plebe, sed ex prima nota.
 Lactantius, Ambrosius, & ætate nostra Ioan-
 nes tortellius alijque plures. Atqui Hierony-
 mus cui magis quam reliquis omnibus in li-
 teratura credendum est, in sermone de cele-
 bratione paschatos, pascha inquit non est græ-
 cum, sicut vulgo videri solet, sed Hebræum esse
 dicunt, qui linguam vtramque nouerunt, neque e-
 nim à passione quoniam πᾶσχα græcè, latine di-
 citur pati, sed ab eo quod transitur . Idem apud
 Mattheum, pascha inquit hebraice dicitur phase
 non à passione, vt plerique arbitrantur, sed neque
 dicitur phase à transitu maris rubri, id quod eccle-
 sia ca-

sia canit, post transitum maris rubri Christo canamus principi, sed quod exterminator videns sanguinem in foribus Israelitarum pertransierit, neque percusserit illos, ait namque scriptura. est enim phasē, id est, transitus domini, & transibo per terram Aegypti nocte illa, percutiamque omne primogenitum. & sequitur. Cunque viderit Dominus sanguinem in superliminari in utroque posite, transcendet hostium domus, & non sinet percussorem ingredi domos vestras. atque iterum. & cum dixerint vobis filij vestri, quæ est ista religio, diceris eis. V ictima transitus domini est, quando transiit super domos filiorum Israel in AEGYPTO. Habet autem phasē accentum in prima, non ut vulgus putat in vltima syllaba.

C A P V T X X X V .

Phiton pro Pythone.

ESt in sacris literis apud hebræos verbum frequens. אִיִּת. Ob. quod græci interpretes in Εὐγασπίμυθος, latini in *pythona* verterunt, non in *Phitonem*, ut omnes latini codices habent, cum sit *Phiton* nihili verbum, aut si pro *Pythone* sit positum, erunt in vna dictione tria errata, quæ nulla ratione defendi possunt. Primum quod additur aspiratio p. litteræ exili. alterum quod detrahitur aspiratio th. litteræ aspiratæ. tertio quod ponitur, i. iota pro philo, quæ vitia inter quadraginta Barbarismi species à grammaticis numerantur. Atqui

mirum est tantum errorem nō fuisse animad-
uersum à tanta doctissimorum virorum mul-
titudine, qui diuinę lectioni operas suas de-
dicarunt, cū præsertim tam crebra huius
verbi mentio fiat. vt Leuitici cap. 20. *Vir in-
quit siue mulier in quibus phitonicus vel diuina-
tionis fuerit spiritus, morte moriatur.* In Deu-
teronomio quoque cap. 23. *Non sit maleficus
neque incantator, nec Phitones consulatis.* & in
1. Regum volumine capit. 28. *Saul inquit in-
terfecit eos, qui Phitones habebant in ventre, &
paulo post dixit Saul seruis, querite mihi mu-
lierem habentem Phitonem, & dixerunt ei. Est
mulier habens phitonem in endor, & subdit
Saul verba ad mulierem. Diuina mihi in phi-
tone, & suscita mihi quem dixero tibi, & de
eodem in 1. Paralipom. cap. 10. *Mortuus est
inquit Saul, eo quod Phitonissam consuluerit.*
In 4. quoque regum cap. 21. de Manasse fi-
lio Ezechia Regis Iuda. *Observauit inquit
auguria & fecit Phitones.* In Esaia quoque
cap. 8. *Querite à Phitonibus & à diuinis qui
strident in incantationibus suis. Idem cap. 19.
Interrogabunt simulachra sua & diuinos &
Phitones, quibus in locis omnibus pro Phito-
& Phitonicus, & phitonissa. in græco vt dixi-
mus legitur Εὐχατρίμυθος, quod verbum ex
verbo interpretari potest ventriloquus, quod
ὑατῆρ interpretatur venter & μῦθος siue**

siue *verbum*, quod in 1. Regum libro expressit
 interpretes, cum dixit qui *Phitones* habebat in
 ventre. Hos *Pythonas* à quibusdam vocatos
 Suidas auctor est. *Engastrimythos* inquit, quem
 nonnulli *Pythona* vocant. A Sophocle vero
 eundem appellari dicit *τερόματις*, hoc est
 expectore diuinantem. A Platone vero *Eury-*
clea ab *Eurycleo* quodam vaticinatore, cuius
 Aristophanes quoque meminit in comoedia
 cuius index est *σφῆξ*. hoc est vespa. Quid?
 non & Lucas in Apostolica Historia cap. 16.
 hunc græce *πύθωνα* vocat, quamquã refragan-
 tibus omnibus latinis codicibus, qui pro *Py-*
thone *Phitonem* habent. Puellam inquit quan-
 dam habentem *Phitonem*, pro quo in græco est
 non habentem *Phitonem*, sed spiritum *Pytho-*
nis, neque admittendi qui dictiones hebrai-
 cas in ordinem alphabetarium rede gere, scri-
 bentes *Phitonem* per *f* literam. Neque audiẽ-
 dus Sipontinus, qui *phitonicos entheatos* siue
 diuinos interpretatur. nisi forte *phytonicos*
 per *ypsilon* legit, nomine à *φύτον* planta
 deducto. sed nihil ad rem de qua agitur plan-
 tæ significatio pertinet. Sed videamus nunc
 unde diuini siue necromantici dicantur *py-*
thones siue *pythonis* spiritum habere, Est apud
 Poetas fabula celebris, quod post diluuium
 sub Deucalione terra madefacta genuit im-
 mensæ magnitudinis serpentem, quem dixe-

re *Pythonem*, dictum à τὸ ὕδωρ quod est putrescere, ex eo quod ex terra putri sit ortus aut in putredinem solutus. Hunc Apollo traditur sagittis confecisse, de quo narratur ab Ouidio fabula perlonga in. 1. *Metamorph.* & *Lucanus* in 5.

*Matris adhuc rudibus Pæan pythona sagittis
Explicuit.* Hinc Apollo victor

*Instituit sacros celebri certamine ludos,
Pythia perdomitæ serpentis nomine dictos.*

Hinc *Pythius* Apollo, & *pythiæ* Apollinis vates, quæ illius spiritu raptæ, futura aut occulta dicebant, sedentes in tripode ex corio eiusdem serpentis inducto. Hic nimirum est serpens ille de quo scriptura dicit, quod erat callidior cunctis animalibus terræ. & de quo scribit Suidas his verbis, *Quod pythonis demonij diuini accessu mulieres entheatæ prædicebant futura.* De *Pythia* sacerdote Strabo libro de situ orbis. 9. ubi de Phocide regione, vrbe Delphis, Parnaso monte. *Autores inquit, certi memorant diuinum ipsum domicilium profundam esse speluncam, non admodum ore lato patentem, inde auram quidem referri sacro esslante nomine, excelsum autem ostio imminere tripodem, quem cum Pythia conscenderit, hausto diuinationis spiritu, dei responsa referre & metro & oratione soluta. Eadem propemodum & Iustinus lib. 24. narrat. & Lucanus in 5.*

*Ut vidit Pæan vastos telluris hiatus,
 Diuinam spirare fidem ventosque loquaces
 Exhalare solum, sacris se condidit antris,
 Incubuitque adito ; vates ubi factus Apollo.*

Et non solum vates, sed vatum quoque numen. Nam quatuor res maximæ decernuntur illi, diuination, sagittandi peritia, musica, & ars medicamentaria. & quemadmodum Pythiæ ab Apolline Pythio sunt cognominatæ, ita & Phæbades à Phæbo. Lucanus.

Non inquam plenior artus

Phæbados irrupit pæan.

Fœminas vero has diuinatrices quas diximus *ἱερατισσίδες* à Græcis appellari Philochorus in 3. de Diuinatione libro scribit, solitas quoque fuisse carminibus mortuorum animas ex inferis excitare. Suidas quoque ubi de *Engastrimytho* affert illud ex 1. Reg. de *Pythoniſſa* quæ Samuelis animam defuncti elicit. Hieronymus quoque in illud *Esaïæ*. cap. 19. *Per hæc inquit, verba significat Magorum necromantiam, per quam animas euocare dicuntur, & tenues umbrarum, imo demonum audire voces.* Denique pro pythone *Aquila* magum interpretatus est, qui Hebraice dicitur *אב* ob, pro quo septuaginta de terra loquentes transtulerunt. Hæc Hieronymus.

CAP V T XXXVI.

Porphyrio,

L 4

Inter

Inter aues quibus per Mosen Deus prohibet Hebræos vesci רַחַח Rachâ enumerat, quæ Interpp. Græci & Latini in porphyrio-
nem verterunt. Scribit namque in Leuitico.
cap. II. *Hæc sunt quæ de auibz comedere non de-
betis, & vitanda sunt vobis.* & posteaquam ali-
quot enumerauit, subdit. *Cygnum & onocrota-
lum & porphyrio-
nem.* Atque iterum in Deute-
ronomio, hoc est secūda lege, vbi eadē verba,
sed alio ordine repetuntur. *Aues inquit, im-
mundas ne comedatis, aquilam scilicet & gryphen.*
& subdit, *ibin & mergulum, porphyrio-
nem & ny-
ctioracem.* Sed neque Hebræi hodie sciunt
quid sit rachan, neque aliquis ex Græcis, aut
Latinis authoribus, quos mihi contigit aut
legere aut audire, mihi quod aiūt, ad manum
monstrare potuit, quæ auis aut cuiusmodi sit
porphyrio. Meminit illius Martial. in disti-
cho cuius index est porphyrio. meminit Ari-
stoteles in 3. de historia animalium volumine,
sed neuter illum ante oculos ponit. Plinius
certe luculentissime libro Natura. hist. 10. his
verbis porphyrio-
nem describit. *Bibunt aues
suctu ceteræ, porphyrio solus morfu bibit. Idem
ex proprio genere omnem cibum aqua subinde
tingens, deinde pede ad rostrum veluti manu
porrigens, rostra ijs & prælonga crura rubent.*
Satis aperte Plinius porphyrio-
nem nobis
ante oculos ponit, sed nihil mirum est igno-
rari

ignorari auem quæ sit paucis cognita. Sed cū in Bætica mea Turdetania maximè in qua est patria mea Nebrissa, hæc auis sit familiarissima, atque in singulis prope domibus habeatur in delicijs, quæ me ratio ab ignoratione rei notissimæ, ac sese oculis omnium Nebrissensium quotidie ingerentis excusare potest, aut quæ dari venia in plano solo cespitanti? Nam in eo opere in quo dictiones græcas & latinas in voces Hispanas atque Hispanienses interpretatus sum, *porphyrionem* esse dixi *auem alas rubras habentem*, atque rursus *phænicopterum alas quoque rubras habentem* dixi, quasi idem esset *porphyrion* quod *phænicopterus*. Sed in utroque me etymon decepit: In altero quod *πορφύρα* est *purpura*, in altero quod *φινίκεος* est *puniceus*. Postea tamen longa experientia didici *porphyrionem* esse quem vocant in Bætica mea *calamon*. *Phænicopterum* vero quem appellant *flamenco*, vtrumque sæpe videram atque sæpe nominari audieram, sed quemadmodum Arius Barbosa meus in quodam epigrammate de me testatus est ex verbis Plinij in procemio Naturalis historie. *Arduum est nomina rebus & res nominibus reddere*, idque non modo in ijs quæ sunt à nobis remotiora, verum etiam ex ijs quæ inter manus oculosque versantur.

Scruta quæ sunt.

Angelus Politianus pace aliorum dixerim, nostro sæculo vir omnium eruditissimus in prima quam vnicam vidimus centuria obseruatione tricesima his verbis scribit. Vocabula quæpiam sunt ita rara inuentu, vt si iterum in ea incidamus, ob id fecisse operæ præcium videamur, quoniam singularia credebantur. sicut inquit *scruta* dixit Horatius in hoc versiculo ex 1. Epist.

Vilia vendentem tunicato scruta popello.

Dixit iterum Sidonius Apollinaris libro epistolarum 7, per hæc verba. *Nunc quædam friuola, nunc ludo apta virgineo scruta donabat.* Sed hominis diligentiam admiror, qui neque dixit scrutum quid esset, & quod putauerit post Horatium Sidonium modo Apollinarem eo verbo vsum. Nam & Hieronymus bis id vocabulum posuit, primo in 3. Regum libro ca. 10. *Negotiatores inquit, vniuersique scruta vendentes.* Atque iterum in Neemia. cap. 3. *Post Mesollam adificauit Melchias filius aurificis vsque ad domum Nathinaeorum & scruta vendentium.* pro quo mendose in recentioribus libris scruta vendentium vtroque legitur. Hinc *ars scrutaria*, eorum, qui *scruta* vendunt. vt apud Apuleium in 4. de asino aureo. *Eos inquit, per balneas & aniles cellulas reptantes*

tes scrutariam facitis. Quid vero scrutum significet, non possumus vno verbo monstrare, sed quantum ex varia lectione colligimus, scruta sunt merces viles, minutæ, aptæque potius ludis quam serijs rebus. & scrutarij huiusmodi res vendentes, quos Hebræi רבלים rochelîm vocant, Hieronymus in scruta vendentes vertit. vulgus buboneros appellat, ipsasque res baratias nominat. hinc est verbum scrutor, aris. pro eo quod est scruta, & huiusmodi res implicitas & cōfusas explicare, ea forma qua à rima hoc est fissura inclinatur rimor. aris. pro eo quod est quasi per rimas aliquid inquirere.

C A P V T X X X V I I I.

Scutulata.

IN psalmo. 44. qui est apud Hebræos quintus & quadragesimus, pro eo quod hebraice legimus לירקמות lircamoth, Hieronymus interpretatur in scutulatis. in editione vulgari habetur, *circumamicta varietatib.* in quo duplex est diuersitas ab Hebræo, altera in versuum distinctione, altera in verbis. Ordo nāque in hebræo hic est. *Omnis gloria filiae regis intrinsecus, fasceis aureis vestita est. & sequitur alter versus. In scutulatis ducetur ad regem, virgines sequentur eam, amicae eius ducentur illuc.* In editione communi aliter. *Omnis gloria eius filiae regis ab intus in fimbrijs aureis circumamicta*
Varieta-

Varietatibus. Hic interpungendo subditur alius versus. *Adducentur regi virgines post eam, proximæ eius afferentur tibi*. Omitto nunc alias diuersitates in verbis & in sententijs, venio ad illam quod pro circumamicta varietatibus, Hieronymus ex hebraica veritate interpretatus est, *in scutularis*. Pro varietatibus namque non est qui non intelligat vestes diuersicolores, aut polymitas, aut segmentatas, quæ tamen vestes sint *scutulata* pauci nouerunt. *Scutulatarum* quoque vestium fit mentio in Iezechiele. cap. 27. *Propter multitudinem inquit operum tuorum guttam, purpuram, scutulata, byssum & sericum proposuerunt in mercatu tuo*. *Scutulatorum* quoque meminit Iuuenalis, dicens.

Cerulea indutus scutulata & galbana rasi.

Cumque ex *lircamoth* verbū ex verbo interpretetur in *vacuitatibus*, quod genus vestis intelligendum sit hoc in loco, videamus. *Scutulata vestis* ut inquit Varro, *dicta est quasi sit velut scutulis quibusdam distincta*. Plinius quoque libro 8. *ubi de tetrina plurimis licijs texere, quæ polymita appellant, Alexandria instituit, scutulis Gallia diuidere*. & paulo ante. *Quam soli ars ait scutulato textu commendat*. Sed *scutula* illa quemadmodum sint effigiata nondum liquet, an videlicet colorum varietate, an liciorum permutatione, nunc expressa.

expressa, nunc depressa, ut in mappis fieri videmus. Ego vero quantum assequi possum coniectura, sic existimo, *Scuta* illa ex inanitate filamentis in maculas esse formata, idque ex liciorum subductione fieri, quemadmodum etiam nunc videmus ex filorum incisione sindones & mantilia in varias picturas foraminari. Cur vero id existimem, mouet me id quod Plinius lib. 11. scribit, agēs de generibus arachneorum, inter quos *scutulatorem* quoque enumerat. *Texere inquit, à medio incipit circinato orbe subtegmina adnectens, maculasque semper paribus intervallis sed subinde crescentibus ex angusto dilatans insolubili nodo implicat, quanta arte celant pedicas scutulato rete ad capiendas muscas circa grassantes.* Vides à Plinio retis maculas appellari scutula. Accedit sermo hebræus qui eiusmodi foraminulentas vestes רקמות *recamoth*, id est, vacuitates siue inanitates vocat.

CAPVT XXXIX.

Sedere ad dexteram.

CUm apud omnes nationes vsitatissima sit consuetudo, ut qui sedet siue incedit ad dexteram alicuius, obtineat locum priorem, Quid sibi vult quod in psalmo 109. legimus. *Dixit dominus domino meo, sede à dextris meis.* Nam cum psalmus ille in sensu etiam literalis de Christo intelligatur, sintque verba

verba patris ad filium, quid incongruentius dici potest, aut quid magis indecorum, quam quod filius priorem occupet locum? Neque solum hic sed mille alijs in locis scriptura sacra testatur Christum ad dexteram patris sedere, qui tametsi natura patri est æqualis, qua tamen filius, & qua homo est, cedere debuit patri primam sedem. Scio hunc locum à Theologis exponi solere, à *dextris*, id est, in *bonis potioribus*, expositio certe nimis violenta atque male cohærens. Quod si ad dexteram sedere honorificentius est, cur in eodem psalmo subiungitur, *Dominus à dextris tuis*? aut quid sibi vult hæc dexterarum permutatio, quod & Augustinus subdubitavit. Legimus præterea in 3. Regum libro cap. 2. de Bethsabe, cum venisset ad Salomonem filium nuper regno potitum, quod sedit rex super thronum suum & quod positus est thronus matri regis & *sedit ad dexteram illius*. Illud quoque ex psalmo 4. & 40. *Astitit regina à dextris in vestitu deaurato*. Neque enim tantum reuerentiæ filius, debet matri aut sponsæ sponfus, ut si ad publicum magistratum pervenerint, matri aut sponsæ in aliorum maxime conspectu priores sedendi partes concedant. Iure igitur factum est, quod Qu. Fabius Maximus Consul, cum pater Proconsul equo vehens illi obviam processisset imperavit Licitori, ut iube-

ret patrem ex equo descendere, qui iussus paruit, filiumque collaudauit, quod dignitatē imperij retinuiſſet. Ego vero cum hanc ordinis ſedendi indignitatem mecum ſæpius reputarem, ſubiit mihi quædam ſuſpicio, alium fuiſſe apud antiquos ſedendi ordinem, quam qui ſit noſtris temporibus, vt videlicet, qui ſederet ad ſiniſtram eſſet potior eo qui ſederet ad dexteram: id quod poſtea multis argumentis fuit mihi exploratum atque compertum. Sed qua via in eam cogitationem peruenerim, paucis mihi enarrandum eſt. Principio quod illi qui potentiores aſſectabantur ſiue armati, ſiue inermes, tum ſatellites, tum ſtipatores, tum laterones ſiue latrones fuiſſe dictos, eoſdemque apud auctores dici aut *tegere latus*, aut *claudere latus*, aut *cingere latus*. Horatius in 2. Sermonum.

Vt ne tegam ſpurco Dama latus?
Iuuenalis.

Dimitis hic ſerui claudit latus ingenuorum
Filius.

Ouidius 4. de Ponto.

Dumque latus ſancti cingit tibi turba ſenatus.
Latus quoque inteſtum ſiue nudum dicebatur
illius, quem nemo comitaretur. Ambroſius in ſermone de obitu fratris ſui. *Quod ſi quando ſine altero prodeundum fuit, inteſtum latus*
putares. Seneca libro 3. Epistoſarum. *Nudum*
erit

erit latus, in comitata letitia. Is præterea qui alium comitabatur, dictus erat *ire exterior*. Cui vero præstaretur comitatus, *ire interior*. Horatius ubi supra.

Ne tamen illi

Tu comes exterior si postulet ire recuses.

Et subdit verba quæ supra retulimus.

*Vt ne te gæ spurco Damæ latus: haud ita Troia
Me gessi.*

Ovidius libro 5. Fastorum.

Et medius iuvenum non indignantibus ipsis

Ibat, & interior si comes unus erat.

De sene loquitur, cui debetur honos à iuuenibus. Atqui restat probandum, quod *exterior* is dicatur qui sit ad dexteram alicuius, & *interior*, qui ad sinistram. Seruius Grammaticus enarrans illud Virgilij ex 5. Æneid.

Radit iter lævum interior,

Exponit pro *sinisterior*, citatque Ciceronem dicentem, *In quem omnia intus.* & Sallustium in 2. histor. *Introrsus prima Asia Bithynia est.* ubi Cicero *intus*, & Sallustius *introrsus*, pro *sinistrorsus* acceperunt. Horat. quoque in 2. Sermonum.

Interiore diem gyro trahit, ire necesse est.

Ubi *interiore* pro *sinisteriore* ponitur, quod meridies mundi pars sinistra est, quemadmodum septentrio dextera. Lucanus in 3. Pharsaliæ.

ignotum

Ignotum vobis Arabes venistis in orbem,

Vmbras mirati nemorum non ire sinistras.

Id est, meridionales etiam in astate. Ovidius quoque in 2. Metamorph.

Ne te dexterior tortum declinet ad anguem,

Neue sinisterior pressum rota ducat ad aram.

Atqui anguem inter duas arctos in morē fluminis labi, & arā ad meridiem sitam esse, nulus Poetarum, sed neque Astrologorum ignorat. Colligamus igitur ex ijs quæ diximus cum qui sit alterius comes, claudere aut cingere aut tegere latus, atque eidem ire exteriorē hoc est ad dexteram illius. Cuius vero latus clauditur, cingitur, tegitur ire interiorē hoc est ad sinistram, qui locus erat dignitate præstantior. Est præterea non contemnenda quædam ratio sumpta ex eo, quod legimus Paulum Apostolum datum comitē ad dexteram Petri, quod in illorum imaginibus disponendis pictores observant, & in diplomaticis Pontificum sigillo munitis animaduerimus, ut Paulus semper sit Petro dexter. Nūquid tanquam in potiori loco? Absit ut Apostolorum principi alter quiuis præferatur. Nam quid sibi vult gladius ille quem Paulus habet strictum, nisi quod est Petri comes stipator atque satelles? Huius antiquitatis ignarus Thomas in illud Apostoli ad Galatas. c. i. *Qui suscitavit eum à mortuis,* commētum illud

opposuit. quia *præsens* inquit *vita* significatur *per sinistram*, *futura vero per dexteram*, in quantum *istæ est cælestis & spiritualis*, *illa vero temporalis*; ideo *Petrus* qui *vocatus à Christo adhuc in carne mortali posito*, *ponitur in bullæ Papæ in sinistra parte*, *Paulus vero quia vocatus à Christo iam glorificato*, *ponitur in dextra parte*. Reliquum est, ut ad quæstionem Augustini de permutatione dexterarum respondeamus. Ille namque ut est in rebus quæ ad nostram religionem pertinent, nihil affirmantis Academia imitator, videtur illam non penitus explicasse. Nos vero ex ijs quæ in superioribus dicta sunt respondemus, quod aut pater sedet in throno maiestatis suæ, & ita iubet filium sibi à dextris hoc est in secundo loco sedere, aut præstat se filio tanquam stipatorem protectoremque, & tunc reponit filium in primo, hoc est in tutiori loco; & sic dictum est *Dominus à dextris tuis*. unde subdit. *Confregit in die iræ sue reges*. Atque iterum in psalmo 15. *Prouidebam domino in conspectu meo semper, quoniam à dextris est mihi ne commouear*.

CAPVT XL.

. *Symbolum quid.*

EX falsa nominum etymologia multi etiam ex viris doctissimis in miserandos errores lapsi sunt, ut in verbo *symbolum*, putantes quod dicere.

diceretur à *σὺν* quod est *cum* & *βόλος*, quem-
admodum ipsi interpretantur, *bucella*, finxe-
runt nescio quæ somnia, & quæ nusquam a-
pud authores leguntur idoneos, Post ascen-
sionem domini, siue post spiritus sancti mis-
sionem, Apostolos in vnum locum congre-
gatos composuisse *symbolum*, ita vt quisque il-
lorum singulos fidei articulos contulerit, vt
Petrus primum, alter secundum, alius tertium,
& deinceps alij suos bolos dederint, quo ni-
hil ineptius, sed neque puerilius excogitari
potest. Ego namque nō diffiteor ex commu-
ni Apostolorum consensu siue illorum cen-
tum viginti, quos suo aduentu spiritus sanctus
afflauit, *symbolum* fuisse compositum, illud
vero quod suam quisque particulam contu-
lerit, neque est credibile, neque verisimile. In
ijs enim quæ multorum decreto constituun-
tur, non vnusquisque suum verbum siue ora-
tionem dicit, vt inde quasi senatusconsultum
conficiatur, sed omnes eandem rem sentiunt,
aut vno sententiam dicente, ceteri pedibus
manibusque in eandem sententiam eunt. Sed
decepit illos etymologia, quod *βόλος* esset *bu-*
cella putantes, non minus ridicule quā in ver-
bo *diabolus*, quod dicatur à *dia* quod est duo
& *bolus*, cum potius interpretetur *calumniator*
à *διαβαλεῖν*, quemadmodum *symbolum* colla-
tio à *διαβάλλω*, quod est *confero*. Sed qua de

causa Apostolorum *symbolum* sit vocatū, Rufinus presbyter Aquileiensis in expositione *Symboli* ad Laurentium Papam multis verbis exponit, quæ libuit hoc in loco apponere, ut autoritate tanti viri permoti, desinant somniare ijs de rebus, quæ ad historiæ fidem pertinent. Tradunt inquit, maiores nostri quod post ascensionem domini cum per aduentum spiritus sancti supra singulos quosque Apostolos igneæ linguæ sedissent, ut diuersis variisque linguis loquerentur, per quod eis nulla gens extranea, nulla linguæ barbaries inaccessa videretur & inuia, præceptum eis à domino datum ad prædicandum Dei verbum ad singulas quemque proficisci nationes. Omnes igitur in vno loco positi, & spiritu sancto repleti, breue istud futuræ sibi prædicationis indicium in vnum conferendo, quod sentiebat vnusquisque componunt, atque hanc credentibus dandam esse regulam statuunt. *Symbolum* autem hoc multis & iustissimis ex causis appellari voluerunt, *symbolum* enim græce & indicium dici potest & collatio, hoc est, quod plures in vnum conferunt. Id enim fecerunt Apostoli in his sermonibus in vnum conferendo quod vnusquisque sensit. Indicium autem vel signum idcirco dicitur, quia in illo tempore sicut Apostolus Paulus dicit, & in actibus Apostolorum refertur, multi ex circumnudentibus Iudæis simu-

labant

labant se esse Apostolos Christi, & lucri alicuius, vel ventris gratia ad prædicandum proficerebantur. Idcirco istud indicium posuerunt, per quod agnosceretur is, qui Christum vere secundum Apostolicas regulas prædicaret. Denique & in bellis civilibus hoc obseruari ferunt, quoniam & armorum habitus par, & mos vnus est, atque eadem instituta bellandi, ne qua belli subreptio fiat. symbola distincta vnusquisque dux suis militibus tradit, quæ latine signa vel indicia nuncupantur, vt si forte occurrerent, quis de quo dubitetur, symbolum prodat si sit hostis vel socius. Ex his Ruffini verbis satis colligitur & vnde dicatur symbolum, & quod à pluribus constituatur simul, & in quos vsus ordinetur, hoc est, sit quasi belli tessera.

CAPVT XLI.

Simila & similago.

INueniuntur in sacris literis frequenter hæc duo verba Simila & similago, vt in Leuitico c.2. Cum obruterit oblationem sacrificij domino, simila erit eius oblatio. & ibidem cap.6. Hæc erit lex sacrificij, tollet sacerdos pugillum simile. & centum alijs in locis. Hinc similago dicitur ea forma qua à farre farrago, à plumbis plumbago, cū idem sit simila quod similago. vt Ecclesiast. cap. 35. Retribuet gratiam, qui offeret similaginem. & ibidem. ca. 33. Da suauitatem & memoriã similaginis. Sed quid

ea verba significant, non vocabulorum interpretes, non sacrarum literarum enarratores, non denique medici quorum scire hæc maxime intererat : at diuinarunt omnes ad vnum dicentes esse *florem purgatæ farinae*, hoc est, *polinam* illam subtilissimam quæ ex setaceorum concussione resoluitur atque euolat, aut farinam per seticea cribra purgatissimam. Georgius Merula *delicias triticeæ farinae* dixit esse, quod & ego fateor, sed non quas ipse putauit. ille namque reliquis omnibus videtur subscribere dicentibus esse *farinam illam purgatissimam delicatissimamque*. Ioannes Baptista qui ex nostræ tempestatis scriptoribus vult videri diligentissimus, plurimum aberrat, putans esse genus leguminis. Sed nos quid *simila* sit breuiter dicamus. Granum tritici molitum in tres partes resoluitur. In cutem illam tenuem quam *furfures* medici, Plinius & Columella *saluiatum* appellant, reliqui farinae purgamenta. In *nucleum* hoc est semen illud dulce & glutinosum in medio sinu grani, quod est genitale semen vnde erumpit radix atque tritici herba primum, ac deinceps calamus. In *corpus* denique quod defendendi seminis gratia est à natura excogitatum, & quod cadens in terra moritur. vt dicit Saluator, Ioan. cap. 12. hoc friabile est atque in farinam resolubile, cum semen lentore suo vix resolui possit. Farina

rina igitur ex tritico his tribus constat, *saluiato, semine, corpore*, quæ cum setaceo excernitur, ut dicit Virg. in Moreto.

Subsidit sincera foraminibusque liquatur

Emendata ceres.

Reliqua duo eminent, quæ rursus in eodem setaceo concussa, supernatat saluiatum, semen vero suo pondere it pessum. atque ita ex crebra setacei concussione secernitur saluiatum à semine. & hoc est quod nos asseueramus dici *similam* illam ex qua sibi offerri sacrificij oblationem Deus in scriptura toties exigit, & ad multos mortalium usus accommodatam, ut dicit Martialis,

Non poteris simile dotes numerare nec usus,

Pistori toties cum sit & apta coco.

Ex ea namque conficiuntur panes non modo gustui iucundissimi, sed quod ad alimentirationem pertinet firmissimi. Nam qui ex polli ne conficitur, ut inquit Celsus libro 2. infirmissimus est, unde panis *αυτόπυρος* à quo *simila* non est excreta, quemadmodum *secundarius*, quem Trāquillus dicit Augustum appetisse, in quo saluiatum à *simila* non est secretum. Astipulantur huic meæ assertioni Hebrææ literæ, quæ ubicunque nos habemus *similam*, illi habent סלת *soleth* per sama literam. Interrogati vero Hebræi, quid *soleth* sibi velit, acemit, dicunt. atqui in Betica mea ac-

mit vocant, id quod ego *similam* dico, ex qua in festorum celebritatibus faciunt delicatissimos panes, quales sibi deus offerri vult Leuitici cap. 23. & 24. & Mauri atque Æthiopes qui apud nos degunt, suum illum peculiarem cibum concinnant, quem sine honoris præfatione nominare non licet, *alcuzcuz* appellant. Astipulantur quoque Terraconenses quos opici Arragonenses dicunt, paucis literis mutatis *semola* pro *simila* vocant. Temperatur autem cibus ille oleo, melle, aromatisque, cuius saporis sacræ literæ assimulant panem illum angelicum qui de coelo cadebat. Exodi. 16. *Erat inquit, manna quasi semen coriandri album, gustusque eius quasi similes cum melle.* Frigebatur autem & oleo. vt in 2. Reg. c. 6. & in Paralipo. *Dedit Dauid vniuersæ multitudini similam frictam oleo.* Sidonius quoq; Apollinaris. *Similam frictam in quadam continentia sartagine.* De *similagine* quod idē est Serenus.

Additur excussus dulci similagine fursur.

Et Cato de re rustica. *Selibram similaginis indito.* Illud tamen aduertendum quod cum sint multa tritici genera, quæ Plinius & Columella ad tria reducunt, *robum*, *siliginem*, & *trimestre*, in duobus vltimis vix posse dignosci *similam*, in *robo* vero *ruuion* Hispani vocant, non vbique facile posse discerni, in Beticavero mea quam facillime.

Sin pro sed si.

LAurentius Valla libro Eleg. 2. *Sin inquit pro si nunquam in prima parte collocatur, sed in secunda, vbi fere est duorum oppositio, affertque in testimonium illud Terent. ex Andria. Si illum inquit relinquo, eius vitæ timeo, sin opitutor, huius minas. Illud quoque ex eodem. Si hoc celetur in metu, sin patefit in probro siem. Virg. quoque i. Georg.*

At si Virgineum suffuderit ore ruborem

Ventus erit, vento semper rubet aurea phœbe:

Sin quarto exortu.

Nāque is certissimus author, & fere apud authores semper eodem modo hanc particulam inuenies positam. In sacris quoque literis frequenter idē est illius vsus. vt Gen. c. 4. *Nonne si bene egeris recipies, sin autem male, statim in foribus peccatum tuum aderit. Exodi quoque cap. 21. Si seruus habens uxorem fuerit & vxor egredietur simul, sin autem & Dominus dederit illi uxorem &c. Leuitici præterea. 14. Si creuerit in cute lepra, contaminabit eam, sin autem in loco suo candor steterit. & quæ sequuntur. In eodem quoque volumine, & Num. & Deut. semper in eadem significatione reperies. In 3. quoque Reg. c. 1. Si fuerit inquit vir bonus, non cadet nec vnus quidem capillus eius in terram, sin autem malum inuentum fuerit in eo, morietur.*

M 5

Est

Est etiam vt ait Valla quando *sin* vnum reperitur, sed quod secundi loci vim obtineat, neque tamen superiori *si* respondeat. vt apud Virgil. 2. Georg.

*Me verò primùm dulces ante omnia musæ,
Quarum sacra fero ingenti perculsus amore
Accipiant, cælique vias & sidera monstrent.*
Et sequitur.

Sin has ne possim natura attingere partes. Sallustius quoque. Imperat & precio insidiatōres Massinissæ arceant ac maxime occulte, *sin* id parum procedat quouis modo Numidam interficiant. In sacris præterea literis eodem modo Genes. 24. Accipies inquit, uxorem filio meo Isaac. Respondit seruus. *sin* noluerit mulier venire mecum in terram hanc, nunquid reducere habeo filium tuum ad locum de quo tu egressus es? subintelligitur namque si voluerit mulier venire mecum, & tunc sequitur, *sin* noluerit venire. Exo. quoque cap. 10. Dimitte populum meum vt sacrificet mihi. & tunc subintelligendum, quod si teceris nihil tibi inferam, mali. & tunc sequitur. *Sin* autem resistis & non vis dimittere eum, ecce ego inducam locustam &c. Et infra cap. 12. Tollat vnusquisque agnum per familias & domos suas, *sin* autem minor est numerus quam sufficere possit &c. subauditur namque si familia est tanta quæ possit agnum absumere. Et infra cap. 17. Cumque leuaret Moyses

ses manus, vincebat Israel, sin autem paululum remississet, superabat Amelech. tantum enim valet cum leuaret manus, quantum si leuaret manus. Item Levi. cap. 5. Offerat de gregibus agnum siue capram, subaudi si habuerit. deinde infertur, sin autem non poterit offerre pecus. atque pari modo alijs cōpluribus in locis. Quare sin utrobique pro sed si est accipiendum. nam particula autē cōpletive ponitur, cū in voce sin contineatur. Quod vero sin pro si nō accipi aliquando possit, nusquam apud aucthores legitur, id quod frequenter in sacris literis reperias. Sed recte an perperam, alterius loci est disputatio. Ecclesiastici. cap. 5. Si est tibi intellectus responde proximo, sin autem sit manus tua super os tuum. sin posuit pro sed si non. Primo quoque Machabæo. cap. 15. Tradite inquit ciuitates quas occupastis, sin autem venimus & expugnabimus vos. Lucæ. 13. Et si quidem fecerit fructum, subaudi excoletur ficus illa. & tunc infertur. Sin autem, in futurum succides eam. & Apocalyp. cap. 2. Pœnitentiam age & prima opera fac, sin autem, venio tibi & amouebo candelabrum de loco suo. quibus in locis omnibus sin pro sed si non nimis violentè accipitur.

CAPVT XLIII.

Striatu.

Legi.

LEgimus libro Regum 4. cap. 6. de cratere
 siue concha illa ænea quam præcepit fieri
 Salomon. *Fecit mare fusile decem cubitorum.*
 & paulo post. *Duo ordines sculpturarum histria-*
tarum erant fusiles. Omnes quos ego vnquam
 vidi exponunt *histriatarum* pro *historiatarum*,
 quasi in ipsis ordinibus essent historiæ ali-
 quæ sculptæ, quod non longe est à verisimili-
 tudine. Sed quod *histriatarum* pro *historiata-*
rum interpretes posuerit, est quidem nouum
 atque inauditum, cum præsertim in hebræo
 nihil tale contineatur. Ex quo fit vt suspicer
 non *histriatarum*, sed *striatarum* debere legi.
 Est quidem *stria* apud Vitruuium in sculptu-
 ris partes quæ prominent, & quasi quædam
 foemora, siue illa sint columnarum siue forni-
 cum, has Græci ἐξοχὰς vocant. Contra vero
 partes cauæ quibus *stria* prominent, *strigiles*
 dicuntur à Vitruvio. vt libro 4. Circa *strigi-*
lium inquit *caua & angulos striarum*. Idem li-
 bro 7. *Canaliculas earum quæ strigiles appellan-*
tur, vtrumque ductum à stringendo siue stri-
 gando hoc est poliendo. Plinius de fungis
 libro 22. *Rimosi* inquit *stria*. nam fungos ne-
 mo ignorat esse striatos & in ipsa *stria* rimo-
 sos. Hinc *striata* dicuntur canaliculata & tu-
 morem mediarum partiū quas diximus *strias*
 appellari. Apuleius 10. Meta. *Striatam* inquit
gerens frontem pro rugis sulcatam. Plinius li-
 bro

bro 21. *Cander lilio eximius folijs foris striatis.* habent enim lilia venas prominentes in modum striarum. Idem libro 9. de generibus concharum, quasdam striatas appellat, id est à parte exteriori canaliculatas quales plærasque videmus. De quibus Plautus in Rudente. *Captamus conchas plagustias striatas.* Sidorius quoque Appollinaris. *Latus utrumque senis cauatur striaturis.*

C A P V T X L I I I I.

Stibium.

IN 4. Reg. libro c. 9. legitur quod Iezabel vxor Acab regis depinxit oculos suos *stibio*. Itē in Hieremia c. 4. *Cum vestieris inquit, te coccino, cum ornata fueris monili aureo, & pinxeris stibio oculos tuos, frustra componeris.* Ex ijs qui hæc loca exposuerunt, nemo intellexit, sed nec suspicatus est quid *stibium* sit. Nicolaus Mamotrectus & Catholicus *cerusam* interpretantur. Cantor Parisiensis esse instrumentum putat quo mulieres pilos superciliorum trahunt, *voljellas* id Latini appellant. Archiepiscopus Cantuariensis, quod est color, sed non contrahit illum ad speciem ut dicat qui color sit. Hugo Cardinalis quod est *vuguenti genus* quo tincta facies efficitur rubra, volens opinor purpurillum significare. Quis vero sanæ mentis diceret quod sit *cerusa*: aut quæ vnquam foemina ornatus causa medi-

medicamento albo circa oculos vſa eſt : niſi forte neque ipſum *ceruſæ* nomen quid eſſet intellexerūt, cum ſit albor ille ex plumbo derafus, quem Græci *ψιμύθιον* vocant, dictum à *ψιμυθίω* quod eſt colore albo linire ſiue fricare. Sed neque *purpurifſum* poteſt intelligi, cum nihil minus ad oculorum pulchritudinem faciat quam vllum rubricæ genus. Nā qui *volſellam* dixit eſſe *ſtibium* hallucinans dixit, quia oculorum facta fuit mentio. Quid igitur *ſtibium* ſit Plinius libro 33 manifeſte oſtendit. In metallis inquit argenti inuenitur *ſpumæ lapidis candidæ* nō tamen tranſlucentis, *ſtimmin* appellant, alij *ſtibium*, alij *alabaſtrum*, aliqui *larbaſon*, vis eius reſtringere ac refrigerare, principalis autem circa oculos. Namque ideo & *πλατυόφθαλμοι* id appellant, quoniam dilatet oculos & fluxiones inhibeat. Quod vero Plinius dixit *lapis ſpumæ candidæ*, id eſt, albicantis, illud eſt antequam teratur. nam tritus in nigrorē vertitur fuligini ſimilem. Hieronymus ad Furiam. Non habuit criſpantes mitras neque oculorum orbes *ſtibio* fuliginatos. Non dum fortasſe expreſſimus quid *ſtibium* ſit, eſt quod vulgus medicorum appellat *antimonium* quod Hiſpani *alcohol*. Quod vero *ſtibiū* ſit antimonium teſtatur Galeni interpres, qui ſemper *ψιμύθιον* *antimonium* interpretatur. Iā vero *ſtimmin* & *ſtibium* & *alabaſtrum* & *larbaſon*

son & πλατύφθαλμοι synonyma esse satis ex Plinio colligitur. Decipiuntur ergo tempestatis nostræ Medici accipientes *stibium* pro χαλκοκαυμένω, id est, pro ære combusto, hoc est *alhadida*, ex eo fortasse decepti quod æs combustum & *stibium* commune sit medicamentum oculorum. Lufit diuus Gregorius in calce commentariorum quos scripsit in librū Iob, exponēs nomē tertiæ & illius filiæ, hoc est *cornustibium* quasi esset compositum à *cornu* & *tibia* instrumentis musicis, cum sit à *cornu* & *stibio* hoc est gutto corneo in quo reponitur *stibium*, vt sit *cornustibium*, Hispanè *alcoholera*. Nam & in libro Regum, & in Paralip. & Hierem. apud Hebræos פִּיך Puch, hoc est *stibium* legitur: & in Iob קֶרֶן הַפִּיך קeren happuch, id est *cornu stibij*. nec minus in hoc Hebræi decipiuntur, qui pro *hapuch* per p exile habent *haphuc* per ph aspiratum: itaque pro *stibio* interpretatur *intortum*, sed ego magis credo interpreti Hieronymo, atque adeo rationi, quam Hebræorū literaturę.

C A P V T X L V.

Talitha & tabitha.

Scribit Marcus Euang. cap. 5. quo pacto saluator noster suscitaturus Iairi filiam archisynagogi, præsens puellę manum dixit, קוּמִי תַלִּיתָה talitha cumi. & subdit Euangelista, quod interpretatur *puella tibi dico surge.*
Scri-

Scribit præterea Lucas in Apostolica historia cap. 9. quod in Ioppe Phœnices oppido fuit quædam fœmina nomine *Tabitha*, quæ interpretata dicitur *δορδάς*. Cùm igitur utrobique eadem sit literatura, necesse est in alterutro loco esse mendum, aut vocabulum apud Aramæos utrumque, hoc est, *puellam* & *δορδάδα* significare. Consulto itaque magistro Paulo viro utriusque linguæ, Aramæam dico atque Hebraicam, erudito, & qui Hebræis codicibus perquàm reuerendi Patris Protomyſtæ Toletani præest, hoc ab eo responsum accepi, aliud esse apud Aramæos *טליתא* talitha per litteram in secunda; quodque in Marco legitur: aliud *טביתה* tabitha per b, de qua in Actibus Apostolorum. illud namque significare *puellam*, hoc verò *capream* siue *dorcāda*. Quare rectè utrobique interpretati sunt Euangelistæ. Euoluimus deinde græcos codices, atque offendimus verum esse quod magister Paulus enunciauerat apud Marcum scriptum esse talitha, apud Lucam verò tabitha. Sed ne mihi hac de re scrupulus ullus relinqueretur, excussi Remigij atque Hieronymi interpretationes ex Hebræo in sermonem latinum, offendique utrumque nomen interpretatum, *Tabitha* cùm ageretur de nominibus post primæ syllabæ a finalem incipientibus secundā a. b. litera. *Talitha* verò in puellam cùm ageretur

retur de nominibus habētibus l. literam post
a. Tametsi fuerunt ridiculi qui pro *Talitha*
scripserunt *tabitha*, cum in dictione supe-
riori immediata sit *talim*, in inferiori *tal-*
me. vnde fit vt ex ratione ordinis debeat scri-
bi *talitha*. Sed cum טליהא *talitha* sit *puel-*
la, קומי *cumi surge*, ambigeret fortasse quis-
piam, vnde conflatum est, quod Euangelista
interiecit, *tibi dico*. Neque enim in sermonis
serie continetur. Hieronymus de optimo ge-
nere interpretandi scribēs similem huic que-
stionem ad septuaginta interpretum volun-
tatem refert: qui pro eo quod apud Hebręos
ex principio Plal. 21. legitur. *Deus Deus meus*
quare me dereliquisti: quę verba sunt à saluato-
re nostro in cruce repetita: ipsi *respice in me*,
interposuerunt, dicentes: *Deus Deus meus re-*
spice in me quare me dereliquisti. Nos tamen
in commentarijs artis Grammaticę causam
attulimus cur illud *respice in me*, posuerunt
septuaginta, & *tibi dico* ab Euangelista sit in-
teriectum. Disputabamus contra eos qui di-
cebant vocatiuum aliquando poni absolutè:
diximusque semper regi à secunda persona
imperatiui explicita vel subintellecta: id-
que præcipue fieri, cum oratio ex recta sit
obliqua: vt si dixeris, *o Cæsar legat Pompeius*,
subintelligitur namque, *audi vel attende*.
Quod si vocatiuum sequeretur verbū impe-
ratiui

ratiui modi quod non significet attētionem, intelligendum esse aliud verbum à quo vocatiuus ille regeretur: vt si dixeris, *o Antoni lege*: subaudiendum est verbum quo praparetur auditoris attentio, hoc est *audi vel percipe*. Itaque verbum quod erat implicitum, septuaginta expresserunt dicentes, *respice in me*: & Euangelista cum dixit tibi dico: quod tantum valet quantum *audi vel attende*. vnde mora quædam siue silentium semper interponitur inter vocatiuum & sequens verbum, in quibus *respice* & *tibi dico* poterant enunciari.

CAPVT XLVI.

Tibicines.

IN Matthæo. cap. 9. legitur: quod cum venisset Iesus in domum lairi principis synagogæ, illius filiam suscitaturus vidit tibicines & turbam tumultuantem. Quæreret fortasse curiosus quispiam, quid illud est quod tibicines funeris pompæ interfunt? An quod Boetius in proœmio artis musice scribit, vt cum cantico quodam dulcior fiat causa flendi. Sed iam non illud quærendum est cur in funere cantus adhibeatur, sed cur tibicines in funere puellæ interueniant: cum in exequijs virorum tibicines canant. Persius.

*Hinc tuba candelæ, tandemque beatulus alto
Compositus lecto.*

Et Virg.

Et Virg. 11. Æne. in funere bello peremptorū
Spargitur & tellus lachrymis, sparguntur
& arma:

It cœlo clamorq; virum, clangorque tubarum.
 Sed tibia nimirum in funere puerorum puel-
 larumq; adhibebatur, quasi instrumentū exi-
 le atque angustæ vocis. de quo Martialis.

Parui tibia condyli sonabit.
 Papinius in 6. Thebaidos in funere infan-
 tis Archemori.

Tibia cui teneros suetum deducere manes
Lege Phrygum mæsta.

Quem locum exponens Lactantius Placi-
 dias. *Iubet inquit religio vt maioribus mortuis*
tuba, minoribus tibia caneretur. Tale aliquid
 apud nos quoque hodie obseruatur, vt in fu-
 nere virorum cymbala, ac tintinabula maio-
 ra, in funere infantium minora pulsantur.
 Non igitur temerè dixit Euangelista in su-
 premo luctu puellæ interfuisse *tibicines*, quos
 Saluator noster iussit discedere.

CAPVT XLVII.

Traducere quid sit in Matthæo.
 IN Euangelio Matthæi. cap. 1. legitur. *Io-*
seph autem cum esset vir iustus & nollet eam
traducere, voluit occultè dimittere eam. Sed
 quid illud verbum traducere hoc in loco sig-
 nificet paucis admodū est manifestum. prop-
 ter aliam remotiorem verbi significationem

ab ea quę est in promptu, nam cum latinę dicamus, *ducere vxorem domum*, videtur etiam latinę dici posse *traducere vxorem*: quemadmodum in epigrammate Callimachi de æquali ducenda vxore.

Atque parem paruas letus traduxit in ades.
 Non respicientes itaque reconditam alteram significationem sic exposuerunt: quod cum Ioseph esset vir iustus noluit domum ad se traducere Mariam tanquam ipso indignam. Alij hallucinati sunt id quod erat: expolueruntque traducere, id est, propalare. Glossa quam dicunt ordinariam vtrumque tangit dicens: cum nollet eam traducere in publicum, id est, diffamare: voluit hoc facere occulte: vel non voluit eam traducere in domum suam ad cohabitationem assiduam. hi duo sensus cum sint diuersi ac pene contrarij: ego non video quomodo possint stare simul: neq; enim quia hoc verbum *traduco* diuersos habet significatus: quilibet illorum propterea sensui potest accommodari. Sed vter illorum magis sit veritati consentaneus: discutiendum nobis est. Iam illud in primis satis constat in Testamento nouo, quoties aliquid venerit in dubium ad originem gręcam esse recurrędum, cum pręsertim nulla talis æquiuocatio in gręcis reperiatur, nisi admodum raro. Atqui in gręco pro eo quod nos habemus traducere

re πα-

re παραδειγματίζειν habetur quod significat
 in exemplum dare aut exemplum facere. aut si
 volumus verbum ex verbo interpretari vt sic
 dicam exemplare quod Hispanè dicitur dex-
 emplar. nam παραδειγμα est exemplū & in-
 de παραδειγματίζομαι exemplum trado aut in
 exemplum do siue traduco, quod verbum po-
 tius elegit interpres: quia tantumdem pol-
 leret. cuius significatio omnibus tunc erat
 nota: quemadmodū hominibus nostri seculi
 abstrusa & occulta, nam poterat lectionem
 græcam secutus interpres vertere: cum nol-
 let eam in exemplum dare quemadmodū apud
 comicos legimus frequenter, vt in oratione
 Demosthenis contra Æschinem. *πρῶτον μὲν*
quidem fuerit si potest: occidatur: sin minus
iuuentium ceteris exemplum faciatis, pro quo
 in græco παραδειγμα ποίησθαι legitur. vnde
 & apud poetas pro graui & atroci poena po-
 nitur exemplum quod Hispanè dicitur *escar-*
miento. sed quia huic quod est græcè παρα-
 δειγματίζειν non respondet latinè verbum
 quod æque polleat, nā id esset *exēplare*. inter-
 pres accepit aliud quēadmodum dixi illis tē-
 poribus frequens, nostris seculis minus vsita-
 tum, hoc est *traducere*: quod significat eo modo
 trāferre & ludibrio exponere, quēadmo-
 dum nostro seculo polygami & lenæ mitellatę
 trāferuntur per vrbis vias celebres aut in

190 ANT. NEBRISSENSIS
scalario gradu proponuntur plebi deriden-
dæ, in hac significatione accepit Iuuenalis
cum dixit :

Altera quos nudo traducit Gallia talo.
& Martialis de delatoribus :

Traducta est Geticis, nec cepit arena nocentes.
Idem alio in loco :

Rideris, multoque magis traduceris Afer,
In medio nudus si spaciare foro.

Propertius Elegiar. lib. 2.

Nec sic infamus totam traducerer urbem.

& Papinius in syluis:

Nempe ego sum qui traducor.

ait Liuius libro 2 ab vrbe condita de Volscis
voce præconis à spectaculis exactis: Nos, in-
quit, omnibus ciuibus peregrinis spectaculo abe-
untes fuisse vestras coniuges, vestras liberos, per
ora hominum traductos. Tranquillus quoque
in Vespasiano, delatores, inquit, assidue in foro
flagellis ac fustibus cæsos, ac nouissime traductos
per amphitheatri arenam. eiusdem prope sig-
nificationis est verbum, quod à Græcis dici-
tur καταμειδιᾶν, hoc est, deridere & ludibrio
exponere. quo verbo vsus est Ælius Spartianus
de constitutionibus Hadriani Cæsaris: Deor-
ctores, inquit, bonorum suorum auctoritatis essent
catamidiari in amphitheatro ac dimitti fas sit, ex
quibus colligitur traducere & catamidiare ci-
tra mortem fieri solitum cum in adulterio
depre-

deprehensa ex lege foret lapidibus obruēda.
sed interpres latinus non potuit Græci verbi
vim exprimere quod virumque comprehen-
debat.

CAPVT XLVIII.

V. literæ varius vsus.

V Litera apud latinos triplici fungitur of-
ficio. nam modò profertur quasi *voca-*
lis plena vt Deus tuus, modò vt *vocalis liquida*.
id est, cùm sequitur post q. semper, aut post g.
& s. aliquando, vt aqua, lingua, suavis. modo
vt *consonans*, hoc est, quando ferit sequentem
vocalem: vt vado, venio. Hebræi v. liquidam
non habent, quia semper apud illos aut *voca-*
lis est, aut *consonans*. sed *vocalem* per apices,
consonantem per propriam figuram designant.
Græci neque habent v. *liquidam*, neque v.
consonantem, sed proferunt vocalem; cui ta-
men non dederunt propriam figuram, qua
possent illam scripto representare, sed sup-
plent illius sonū per *ou* diphthongon. Quod
in verba Hebraica in suam linguam interpre-
tari volunt, pro v. consonante transferunt *ou*
diphthongon, quā proferunt quasi vocalem.
Quæ verò apud Hebræos post a. vel e. u. con-
sonantem habent, Græci per *au*. & *eu*. diph-
thongon satis commodè scribunt; vt auoth,
sau, eua, casleu, vbique proferentes quasi per
consonantem. Cùm verò latina vocabula

in suam linguam adiscunt. u. vocalem per ou diphthongon scribunt. u. quoque consonantem latinam æque per ou diphthongum designant: & nihilominus quasi vocalē proferunt: vt Vespasianus, Οὐεσπασιανὸς, Siluanus, Σιλουανὸς hoc est prius nomen sex syllabis. sequens quatuor. At vero. u. liquidam post q. modo expūgūt, vt pro eo quod latini dicunt *Quirinus* ipsi *Cyrimum* transferunt distincta. u. litera. Vt in euangelio Lucae, *Hec* inquit *descriptio prima facta est à præside syria Cyrino*, modo vertunt illam in. u. vocalem. vt pro eo quod latini dicunt *quartus* per. u. liquidam: ipsi κουάρτος per cappa & ou. diphthongon vocalem interpretantur. vt Paulus in calce Epistolæ ad Romanos. & iterum secundæ ad Tim. Illud vero nō possum nō mirari: cur Hieronymus qui dixit pro eo quod est *quirinus* inter latinos & à græcis scribi *cyrinus*: cur rursus cum ex græco interpretatur in sermonem latinum scribit *cirinus* & non *quirinus*? Sed esto quæ ab hebræis per u. consonantem scribuntur proferunturque, græci per ou. diphthongon scribāt: & per sonum. u. vocalis enunciēt necessitate possunt excusari: quoniam vt diximus. v. consonantē non habent. At latini qui non minus quā Hebræi. u. consonantem habent: qua ratione se tueri possunt. u. consonantem proferentes

tes quasi vocalem. & u. vocalem rursus quasi consonantem. vt quod in libris Regum & in Paralipomenis sæpè scribitur צרוריה Seruia pro matre Ioab eademque sorore David regis, & quod in Genesi מַחֲוִיָּאֵל Mechuiael pro filio Ired. Quodque iterum in 2. Regum volumin. אַרְרַנָּה Arauna Iebusæus legitur apud Hebræos. u. consonans est, quare à latinis quasi consonans est proferēda, nō vt vocalis, quemadmodum ab imperitis rationis eius profertur. atq; è contrario quod in Daniele & in lib. Esther scribitur אַחַשְׁוֵרֶשׁ achasueros, quodque in Genesi pro quodam filio אִשָּׂוֹ Iisua, à quo in libro Numerorum est familia *Iesuitarum*: quodque in 4. Reg. volumin. & in Esaia סֶפְהַרְוַיִּם sepharuaim non per u. vocalem, vt isti legunt, sed per u. consonantem proferenda est.

CAP. XLIX.

Zelotes pro Cananaeus.

Simon vnus ex duodecim Christi Discipulis ad differentiam Simonis Petri *Cananaeus* cognominatus est, quod fuerit ex *Cana* ciuitate Galilææ: in qua Dominus aquā in vino mutauerat. Sed & si קַנָּא canna ex hebræo sermone interpretetur *Zelus* in literis secularibus non liceret etymologiam proprii nominis interpretari: vt pro *Simone Cananaeo*

Σ

Simon

Simon Zelotes vestetur: non magis quàm si pro Gregorio, Theodoro, Phrontisco, Vigilantium, Deodato, Prudentium quispiam interpretetur. Aut propterea quod *Plato* interpretatur *latus*, & *athena* sit *Minerva*; pro *Platone Atheniensi* quispiam transferret *latum minervalem*. Quandoquidem nominum priorum siue hominum siue locorum significationes & etymologiæ in aliam linguam vertendæ non sint: quod & septuaginta Interpretes, & qui post illos sunt secuti, pertinacissimè obseruarunt: nam quid absurdius dici posset, quàm si pro eo Hebraicè dicitur *Adam ex Eva genuit Abel*, quoniam *Adam* interpretatur homo, *Eva* mater viuentium, *Abel* vanitas siue vapor siue nihil hoc: quispiam interpretaretur *homo ex matre viuentium genuit vanitatem* siue vaporem siue nihil hoc. Iure igitur Hermolaus Barbarus in Thucydidis interpretatione Laurentiū Vallam notat, quod pro eo quod est ἰχθῦς græcè, latinè est *piscis*, aut quod Strabonis interpretes *paradiso cœlestis oppido viridarium* interpretatus est: non quod παράδεισος *viridarium hortum* quæ non significet, sed quod nomina oppidorum propria, sicut & hominum in quacunque lingua retineri solent. Apud auctores tamen sacrarum literarum, quibus non solum nomina significant res, sed etiam deinceps res ipsæ possunt signifi-

significare alias res; licet aliquando non tantū nomina, sed etiā res ipsas quæ per ea significantur, interpretari: & sic pro eo quod vnus Euangelista dixit, *Simon Cananeus*, alter dicere potuit *Simon Zelotes*: quod ex Græco sermone interpretari in Latinum potest amator, qui non patiatur cōsortem in eo quod amat. Hac eadem ratione defendi potest, quod Hieronymus in 2. Regum 21. cap. interpretatus est בן יערי Elchanaan Ben-jaare. *Adeodatus filius saltus*, propterea quod אלוו בן Elchanaan est à Deo datus, בן ben, *filius*, יערי jaare, *saltus*, in regimine à יערי jaar *sylvæ*. E cōtrario fecit idem interpres in Genesi c. 38. pro nomine appellatiuo quasi proprium interpretatus. *Vidit*, inquit, *Iudas filiam hominis Cananæi vocabulo Sue*: vbi כנעני Kenaani, quod aliqui nomen est gentile siue aliquis de genere *Canaan*: quemadmodum in Hebræo legerat reliquit, cū in eo loco pro *mercatore* accipiat. In qua significatione etiam accipiendum est quod in calce Prouerbiorū legitur. *Sindonem fecit & vendidit & cingulum tradidit Cananæo*, nam vtrouque *Cananeus* pro *mercatore* accipi debet, cū sit aliàs, vt diximus, quispiam de gente *Canaan* filij Cham filij Noe. Aliquando etiam ab auctoribus nomina propria transferuntur: sed non quasi propria, sed tanquam appellatiua. vt pro septem mōtibus

Africæ

196 ANT. NEBRISSENSIS
 Africę, qui mari Athlantico impendēt: quos
 græci Επτὰ δέλφους appellāt: Pompon. Mela
septem fratres dixit, quoniam ob similitudi-
 nem, & æqualitatem, inter se fratres dici pos-
 sunt, ob numerū, septē. Sed quando licitū sit
 huiusmodi nomina interpretari, quando nō
 licet: opus est partim prudentiæ, partim sceli-
 citatis cuiusdā: prudentię, inquā, quia enentus
 est dubius quā in partē id quod aude is acci-
 piendū sit: vt si *dueñas* in *dominas* verteris, nō
 absurdē fortassis erit factum illud planē rīdi-
 culum, si pro *tor de sillas*, *iugum* siue *turrem sel-*
larum dicas: sed & aliās pluribus.

C A P V T L.

Zona.

Legimus in Euang. Matt. c. 10. *Nolite possi-*
dere aurū neq; argentū, neq; pecuniā in Zonis.
 In Marco etiā c. 6. *non peram, neque in zona es.*
 Sed cū *zona* sit *cingulum* siue *semicinēctium*, hoc
 est, quod ē regione vmbilici hominē cingit
 mediū: quid sibi vult quod Euangelistę scri-
 bunt, *pecunia siue es in zona?* aut quomodo pe-
 cunię in zonis cōportantur. Nisi forte vt nos
 Hispani consueuimus marsupia illa zonis ap-
 pendere, quę pastores appellāt *escaria*: quod
 in illis deferre solēt annulos ferreos, filices &
 ignis escas, hoc est, fungos aridos, & fomitem
 vnde scintilla excussa rapit flammā. Nos verō
 non tale cingulū, sed *cortem* *sacculum* intel-
 ligimus:

ligimus : qui pecunijs impositis cingitur, & pro cinctu potest esse vsui, atque viatico importando. Tales sacculi ex como me puero erant: quo tēpore non tā frequentes aurei atq; argentei nūmi verfabātur, sed ærei magna ex parte, quo viatores cincti faciebant iter, in eo viaticū deferentes, hoc est pecunijs ad sumptus viatorios. Itaq; zona nō tam pro cingulo accipienda est quā pro marsupio & loculis nūmorum refertis accipitur. Apuleius li. 7. de asino. *Plotina, inquit, preciosissimis moniliū & auro monetalī zonis refertis incincta.* Suetonius quoq; scribit, *Vitellium zonā se aureorum plenā circumdedit.* Spartianus etiā Pesceniū nigrū Imperatorē iussisse ne milites in zonis nummos aureos vel argenteos portarēt ad bellum. Lāprid. quoq; Alexandrū Cæsarē dicere solitū ait: *miles nō timet nisi vestitus, catceatus, & satur, & aliquid in zonula habens.* & ferè hæc est consuetudo Hispanorū, vt cingulo bursam escariam applicent, in quā portent nummos. Itaque Saluator noster discipulis interminatur ne portent zonam. In hoc significato accepit Vulpianus in tit. de bonis damnatorum. l. diuus. *Neque si zonam, inquit, circa se habuerit, proinus aliquis sibi vindicare debet.* Accurs. Zonam putauit esse cingulum magni precij.

F I N I S.

INDEX

INDEX CAPITVM QVINQVAGENÆ ANT. NEBRISSENSIS.

- A** Rcheutina & Thina ligna quæ sunt. 2. Pa-
ralip. 2. Cap. 1.
- Artemon, quid. Actor. 27. leuato Artemione
secundum auræ flatum tendebat ad lit-
tus. Cap. 2.
- Azotus, pro Asdod, ut in Hebræo est, legitur
sepe. Cap. 3.
- Aurichalcum. Apocal. 1. Cap. 4.
- Bethsaida pro Bethesda. Ioan. 5. Cap. 5.
- Bethdagon. 1. Reg. 5. 1. Machab. qui & Dercetus
Astarte. 3. Reg. cap. 11. Cap. 6.
- A bimatu, & infra. Matth. 2. Cap. 7.
- Camelopardalis. Deuter. 14. Cap. 8.
- Castores. Act. 28. Nauis insigne Dioscori. Insignis
nauium, Strabo. Horatius. lucida sydera. &
de S. Telmo Vincentius Iustinianus. Cap. 9.
- Charadrius. Leuit. 11. & Deut. 14. Cap. 10.
- Cynos pro Schino in Daniele cap. 14. Cap. 11.
- Cœmiterium non cimiterion. Vide & Petrum Vi-
etorium. Cap. 12.
- Collirida. 2. Reg. 6. & Leuit. 6. Cap. 13.
- Daphne quid. Numer. cap. 34. Cap. 14.
- Debora, non Delbora. Genes. 35. & altera libro
Iudic. Cap. 15.
- Dextera

I N D E X.

- Dextera, numerandi ratio. Prouerb. 3. Computatio per digitos. loci multi emendantur. Tringinta nuptias, sexaginta viduas, virgines centenarias significat.* Cap. 16.
- Drama, atis. Frequentate nobis dulcia cantica dramatis, & Epithalamium quid.* Cap. 17.
- Electrum. Ezech. 1. cap.* Cap. 18.
- Euroaquilo. Act. 27.* Cap. 19.
- Gaius pronunciandum, non Caius.* Cap. 20.
- Gir siue Melanthium quid & Cyminum.* Cap. 21.
- Herba fullonum. Malachie 3.* Cap. 22.
- IESVS nomen an Iesuah, Latinis Iosue.* Cap. 23.
- Ioannes Simon Bar-Iona, In Ioan. est Simon Ioannes.* Cap. 24.
- Lustrum an quoque annorum spatium.* Cap. 25.
- Moyse an Moses scribendum dissyllabum, an trissyllabum.* Cap. 26.
- Manianum quid sit. Esræ 6.* Cap. 27.
- Meditor, pro exerceor, Genes. 24. Prouerbior. 8.* Cap. 28.
- Melita insula. Act. 27.* Cap. 29.
- Micol, pro Merob legitur. 2. Reg. 21.* Cap. 30.
- Mysale quid. Leuit. 11.* Cap. 31.
- NON particula adiecta sepe, vel detracta.* Cap. 32.
- Onocrotalus. Leuit. 11.* Cap. 33.
- Palah, Phase, Pascha. Exod.* Cap. 34.
- Python, vulgo male Phiton. Exod. 20. Pytho, Pythonissa.* Cap. 35.
- Parthyrio

I N D E X.

- Porphyrus. Levit. 9. Cap. 36.*
Scruta. 3. Reg. 10. Horat. Sidonius, Aug. Politia-
nus. 30. Cap. 37.
Secunda varietate. al. circumdata. Psalmor. 44.
Polymita vestis. Cap. 38.
Sedere ad dextrā aut sinistram. 3. Reg. 2. Cap. 39.
Symbolum, quid. Cap. 40.
Similia & similago. Levit. 2. & alibi. Cap. 41.
Sin pro sed si contra Vallam, 2. Elegant. Cap. 42.
Striatus. 4. Reg. 6. Cap. 43.
Stibio oculi ornabantur, 4 Reg. 9. Ezech. Hierem.
Hirp. Alcohol. Plinius, adde Xenophontis loca.
Cap. 44.
Talicha & Tabitha. Marc. 5. Cap. 45.
Tibicines in funere. Matth. 9. Cap. 46.
Traducere. Matth. 1. noluit eam traducere, παπα-
δαγματίζεσθαι, in exemplum dare, aut ex-
emplum facere. Cap. 47.
V literæ triplex usus. Cap. 48.
Zelotes, Simon vnus è duodecim ad discrimen
Petri. Cap. 49.
Zona, Matth. 10. Nolite possidere aurum neque
argentum, neque pecuniam in zonis vestris.
Cap. 50.

F I N I S.

GASPA.

GASPARIS VARRERII LV-

SITANI COMMENTA-
RIVS DE OPHYRA REGIONE
in sacris litteris lib. III. Regum. & II.
Paralipomenon.

D. IOANNI III. POR-
TVGALLIÆ ET ALGAR-
biorum Regi inclyto, Africo, Æthiopico,
Arabico, Persico, atque Indico, Gaspar
Varerius S. P. D.

EVM animaduerterem, Rex in-
clyte; Varias & diuersas Docto-
rum virorum opiniones & senten-
tias: de Ophyra regione, quæ olim Salomoni
Iudæorum regi, innumera penè auri pondo
suppeditare solita esset, cepit me auiditas quæ-
dam inexhausta inuestigandi, quonam terra-
rum situ hæc regio esset posita. Nam alij So-
colam insulam credidere. Multi Hispanio-
lam, Ut vocant, aliam nuper repertam in-
sulam, opinati sunt. Plurimi apud Indos esse
Patuentes, nullum tamen certum atque defi-
nitum

nitum in tam vasta & ampla regione locum
expresserant. Quo maiore studio huiusce dis-
quisitionis, ut dixi, incendebar. Itaque cœpi
rem perpendere, auctores evolvere, quam ra-
tionem habuerint singulæ uniuscuiusque
sententiæ observare, multa exquirere, plura
ratiocinari, eodem denique inuestigando per-
venire, ut, Ophyram regionem: in illis oris,
quæ in India ultra Gangem sub tuo imperio
& ditione sunt, omnino esse deprehenderim.
Quam vero rectè aliorum sit iudicium, certe
perdiligenter, quantum mea tulit & erudi-
tionis & ingenij tenuitas. De qua regione
hunc commentarium elucubratus sum. Quem
ut tibi dicarẽ: multæ me causæ, multæ impu-
lerunt rationes. Ut enim præteream, oram il-
lam Gangeticam, tuo nutu & ditione guber-
nari, ad eamque singulis quibusque annis
classēs tuas nauigare solitas, uti Salomonis
auspicijs factitatum olim fuisse proditum est,
multa tibi cum sapientissimo illo rege commu-
nia esse comperiebam. Nam illi, ob mitem
animi naturam: ad pacem quam ad bellum
propensior

propensio-rem, Deus Opt. Max. Ut templum
sibi ædificandum curaret iniunxit, non au-
tem patri, eo quod multa cæde & humano
sanguine sese cruentasset. Tu vero rex in-
clyte, non modo in summa pace & placidissi-
ma tranquillitate, hæcenus regna cunctam-
que tuam ditionem stabilivisti, verum reli-
gionem etiam Christianam, tua pietate, pru-
dentia, consilio atque industria, quæ summa
in te sunt, auxisti. Legem Evangelicam in
remotissimis Orientis oris propagasti, au-
gusta illic templa dedicari iussisti. Ordines
monachorum à pristinis institutis degeneran-
tes, instaurandos & renouandos curasti. No-
bilissimum gymnasium, omni disciplinarum
genere extructum Conimbricæ fundasti, ut
quod Salomon ipse solo penè nomine habuisse
visus sit, tu reipsa cumulatè præstitisse vi-
deare, nempe dulcissimam & saluberrimam
& semper optatissimam cunctis nationibus
pacem. Quis enim mortalium, Unquam bel-
lum non exhorruit ac summè detestatus est?
Enim ut torrens è montibus lapsus, hyber-

bernisque auctus imbribus : sata leta suo
euertit impetu , atque aquarum violentia
agros populatur, ita bellum vel iuste suscep-
tum: nefarium & horrificum per se est, om-
nia diripit , cuncta conuellit : Utpotè quod
ipsis etiam victoribus non minus quam vi-
ctis exitiales soleat plerunque exitus asferre,
ita ut belluarum immanitati magis quam
humanis ingenijs, conuenire videatur , &
ut rectè dixit quidam , sic ab unoquoque
suscipi oportere, ut à ratione stabiliendæ pa-
cis non discedat. Quæ si absque bello confici
& honestè conseruari potest, quis adeo ferus
inhumanusque sit , ut cum hoste configere
& ferro humanum sanguinem fundere , quàm
pacem malit? nisi qui omnino inimicus gene-
ris humani, à natura informatus esse videat-
tur? Quod si qui sunt , qui bellica consilia
quietis cogitationibus anteponunt, inani qua-
dam specie gloriæ decepti, ij omne rectum at-
que honestum peruertunt & labefaciunt,
atque à Christiana pietate longè abhorrent.
Nec conquisitis rationibus ad hæc confir-
manda

manda opus est, cum satis in promptu sint.
In quo genere colendæ pacis, rex humanissi-
me tantum excellis, ut, si exemplo tuo alij
Christiani principes & reges, (pace quod
omnium dixerim) ab armis ciuilibus absti-
nuissent, nihil dubium est, quin, iam Christo
summo Deo restituta fuissent tot regna, ac
tot prouinciæ, quot illi Barbaræ nationes
iamdudum ademerint: inuitatæ magis fortas-
sè bellis Christianorum intestinis, quàm
rei militaris scientia, aut ingenti quadam
animi magnitudine. Quæ dum vident nos
domesticis dissidijs, veluti quibusdam perti-
nacibus verborum concertationibus impli-
catos, maiora quotidie audent, ac eò iam au-
dacie prorumpunt, ut, quod reliquum ha-
bemus, ingenti fiducia eripere aggrediantur.
Quos tu, Rex inuictè, tota animi contentio-
ne, omniq; armorum vi exturbare, ab A-
fricæ, Æthiopie, Arabie, Persiæ atque
Indiæ possessione non desistis. Fortunet Chri-
stus tam pios labores, aliosque Christianos
reges ad hoc iustissimum & honestissimum
O 3 bellum

bellum erigat & inflammet. Quò Christia-
num nomen, non modo ereptas prouincias
& amissa recuperet imperia, Verùm dilatat
etiam augeat & amplifcet, tuo & maiorum
tuorum exemplo. Hoc vero opusculum quod-
cunque est, quod tibi plurimis de causis dedi-
care constitui, precor obtestorque te, eo fa-
uore & benignitate prosequare, quibus ius-
centes soles erigere & humanitate regia for-
uere, ne in lucem prodire aliquando pertimes-
cat. Rex inuictissime Christus Opt. Max.
Maiestatem tuam saluam & incolumem ser-
uet & perpetuam illi donet felicitatem. Vale
Eboræ. v. Kalen. Decembris. M. D. L.

D. SE

D. SEBASTIANO,
SVMME SPEI PORTV-
galliae & Algarbiorum Regi inclito, Afri-
co, Æthyopico, Arabico, Persico atque
Indico, GASPAR VARRERIVS
S. P. D.

Dicaueram augustissimo Regi Ioanni
III. auo tuo, Rex inclyte, Commen-
tarium, quem decem ab hinc annos, de
Ophyra regione composueram. Sed
antequam edidissem naturæ concesserat tantus
Rex ac tanti nominis, à Deo Opt. Max. (vt cre-
dere par est) ad illud concilium & cœtum beato-
rum è terris euocatus, ob plurima & præclara vir-
tutum ornamenta, quibus illum, dum viueret, de-
corarat. Quando igitur nutus diuini numinis re
in demortui Regis aui tui locum suffecit, tam ma-
gno cunctorum præsertim tuorum omnium ap-
plausu, vt cum adoleuerit ætas, sceptrâ teneus
hereditaria, ad Regnorum administrationem fe-
liciter incumbas, prædictum Commentarium tibi
dicandum statui, eo maximè consilio, quod illas
Indiæ partes, quibus regio ipsa Ophyra contine-
tur, in partem quoque Regni tibi contigisse vide-
antur. Quam regionem propterea exquisita qua-
dam curiositate indagare arbitratus sum, quòd
viderem multos varie de hac re sensisse. Quan-
tum verò in huiusmodi molesto & operoso nego-
tio,

rio, quo me implicauit, consecutus sim, alij viderint, certe quod potui prestari, quantum per re-
nuem & literarum, & ingenij facultatem licuit.
In qua regione, vt omnes tui & alieni, qui pre-
claram & excellentem & verè regiam istam
admirantur indolem speramus, reddes Ophyrjjs
pro auro, (quod rerum aliarum permutationi-
bus, Salomon redimere consueuerat) inestima-
biles legis Euangelicæ merces. Sustines enim cum
honorum & bonorum hereditate, non paruum
expectationem industriæ & auitæ virtutis imi-
tandæ, & pro egregia innata indole fortassè etiam
superandæ. Nimi cuncti maiores tui reges, tam
ex paterno quam materno sanguine, maximam
& singularem erga Deum semper præstitere pie-
tatem, & omnem hanc Hispaniæ Prouinciã,
ab impotentissimo Barbarorum dominatu armo-
rum vi, & summa militari virtute eripuerunt,
adeò vt quem quisque eorum locum, semel pedi-
bus proculcauerat & ferro aperuerat, eundem
manu strenua pugnando retinuerit. Nec intra
Hispaniæ fines virtus tanta se ipsam continuit.
In Africam traiecerunt, vt fugientes Barbaro-
rum reliquias persequerentur, & funditus dele-
rent. Ibi ingentes illorum copias parua manu se-
pius profligarunt. Multa ibi oppida maritima,
obsidione & oppugnatione ceperunt. Postea in
Æthiopiam, in Arabiam, in Persiam, in In-
diam denique arma conuerterunt. Quæ verò in
ijs

ys Prouincijs strenuè gesserunt, hæc tu, Rex in-
clyte, & à tuis scire poteris, & apud Asiaticam
historiam, ab auunculo meo doctissimè & ele-
gantissimè scriptam, literis mandata facilè cog-
nosces. Alij ad longinquas Occidui orbis plagas,
nunquam antea cognitæ se contulerunt, multas
illic Barbarorum prouincias occuparunt, atque
deleto impio idolorum cultu, Christi Euangelium
latè propagarunt; vt nullus fere in toto terrarum
orbe tam longè positus, nec tam abditus & ab ho-
minum consortio semotus sit locus, quem non ma-
iorum tuorum arma vel occupauerint vel terrue-
rint. Nec ad eorum tot ac tantas virtutes imi-
tandas, vel etiam superandas, ea tibi desunt, quæ
non parum optimo Principi formando conduce-
re, semper viri sapientes arbitrati sunt. Nam vt
præteream, magnam spem multis & non obscuris
significationibus concitatam, & multarum, non
adumbratam sed expressam virtutum effigiem,
habes; apud Catharinam auiam tuam, illustrissi-
mam Reginam & feminam lectissimam educaris,
cuius domus quoddam magis virtutum domici-
lium quàm aula; optimarum disciplinarum scho-
la potius quàm regia, iure nuncupari potest. Ha-
bes quoque intra ipsius aule recta, Clarissimum
Principem Henricum, Cardinalem amplissimum,
ac Portugalliae Infantem auunculum tuum, à Deo
Optimo Maximo tibi velut dono datum. Quem
Sapientissima Regina in tuorum regnorum curam

& administrationem sibi socium asciuit ; & , qui
te priscorum morum atque vitæ sanctissimæ ex-
emplo , multarumque & optimarum rerum do-
ctrina imbueret & informare valet . Cuius dicto si
te semper audientem præstiteris , sine ulla dubita-
tione tibi polliceri & confirmare possum , Rex in-
clyte , non fore cur omnes tui in te quicquam desi-
derent , sed futurum potius , ut alij reges & te ad-
mirentur , & tuam æmulari virtutem maximè la-
borent . Habes præterea illustrissimas Principes
duas , Mariam , & Isabellam , sanguine tibi con-
iunctissimas , quarum utraque rarum quoddam
est omnis & virtutis & probitatis documentum ,
quæ maximum afferre momentum , ingentesque
conciliare utilitates ad tuam educationem etiam
possunt . Habes insuper viros Principes , qui te
cognitione attingunt , ceteramque nobilitatem ,
atque omnes aliorum ordinum Lusitanos , quo-
rum egregia fides erga suos Reges perspecta mas-
ximè semper fuit . Qui vitam suam , cum res
ita tulerit , pro tua & tuorum regnorum incolu-
mitate profundere nunquam dubitabunt . Habes
quoque literarum Magistrum , quem serenissima
Regina & excellentissimus Princeps Henricus ,
ex nouo & amplissima sanctæ Societatis ordine ,
ad hoc munus delectum tibi dederunt , virum sci-
entiæ & nobilitate generis , & literarum scientiæ , &
morum claritate conspicuum , à quo nihil nisi
quod bonum decorumque sit & Regia Maiestate
dignif-

dignissimum disces. Quare, bone Deus, ad summam virtutem, vel excitandam vel constituendam facultates, quanta ad res optimè gerendas præsidia tibi adsunt rex inclyte ? Quare macte virtute, omni contentione enitere, ut omnes tui talem te habeant qualem habere desiderant. Et paruum hoc nostrum munusculum tuo nomini dedicatum, pro tua humanitate singulari, benigne, precor, suscipias. Christus Deus omnipotens Maiestatem tuam saluam & incolumem seruet, & felicitatem nunquam interituram tibi largiatur. Vale, Eboræ sexto Kalend. Maij. Anno M. D. LX.

ARGV.



ARGVMENTA COMMEN- TARII DE OPHYRA RE- GIONE GASPARIS VARRERII.

T Res de OPHYRA regione opiniones.

I. Rabani Mauri & Nicolai Lyrani, apud
INDOS esse.

II. Francisci Vatabli, HISPANIOLAM esse O-
ceani Occidentalis insulam.

III. Raphaelis Volaterrani, esse SOFALAM Æ-
thiopici Oceani insulam.

Primam sibi tuendam auctor suscepit, & refelli-
tur secunda Hispaniolam à Christ. Columbo
reptam esse: & an ea sit quam Carthaginenses
repperisse ait Aristoteles.

Ptolemæi error Lusitanorum nauigationibus e-
reptus.

Nauigatio { Poenorum duorum.
Eudoxi cuiusdã & Eudoxi Cyziceni.
Hispanicarum nauium.
Hannonis Carthaginienfis.

Reijcitur tertia opinio de Sofala insula.

I. Opinio de Indis comprobata.

Malaca oppidum Indiæ.

Iosephi Iudæi laus, qui G. Plinij æqualis fuit.

De C' erroneo aurea vbi nunc Malaca ditionis
Lusitanorum.

Ormouza celebre Persiæ emporium.

Ganges fluuius hodie BENCATTI.

Aurum vbi reperiatur.

Taprobane vbi sita, & situs Ophyræ.

Rabani Mauri & Lyrani de Ophyræ solo, & ani-
mandi.

ARGVMENTA.

mantibus sententia;

Tigrium copia atque audacia.

Ioannes Barrius Indiarum Historicus Lusitanus.

Lestores aureę Cherronesi finitimi Ptolemæi.

De Chrysa & Argyra, Mela & Plinius.

Lusitanorum audax in Indiam nauigatio.

Nauigandi origo rudis, cum rates primum adhibita.

Nautica pyxis prisca ignota, nuper reperta.

Magnetis lapidis mira vis.

Argonautarum & Vlysis in nauigando errores.

Lusitanorum nauigandi industria laudata.

Christophori Columbi laus.

Causa cur olim nauigatum sit rarius, & diuturniore temporis spatio.

Classis Salomonis cur triennio tantum nauigarit.

Tertia opinio Valaterrani de SOFALA insula reijcitur.

Tharsis 3. Regum 9. an sit Africa.

Diuo Hieronymo ubi sit Tharsis.

Africa Hebræis PHVT hodie FEZ.

Hebræos prouincijs nomina à primis cultoribus dedisse ex Iosepho ostensum.

ALCAYRVM male à quibusdam MEMPHIM nominari.

Tharsin non rectè Africam appellare Rabinos.

Iudæorum intencia quam nihil hodie tribuendum sit.

B. Hieronymi laus, & cur Carthaginem esse dixerit Tharsin.

OPHYRA Carthago esse non potest.

OPHYRAM non esse Sofalam insulam vidit Georg. Agricola.

India

ARGVMENTA.

India cur in sacris litteris OPHYRA dicta
Philonis & Iosephi eruditorum Iudæorum laus.
Iudæorum hodie mira ignauia, inscitia, ac perti-
nacia.

Petrus Gallatinus de Hebraicis bene meritis.
OPHYRA vnde dicta Iosepho, & INDIAM
esse.

Phison fluuius Hebræis, qui Ganges est India.
De OPHYRA & Heuilath, sententia B. Hiero-
nymi & Oleastri, & Rabani Mauri, error vero
Augustini Steuchi Eugubini.

Rabini Hebræorum caute legendi.

Diui Hieronymi summa linguæ Sanctæ peritia.
Thomæ Caietani opinio reiecta.

COM.



COMMENTARIUS DE OPHYRA REGIONE, LIB.

III. REG. CAP. IX. ET X. ET II.

*Paralip. IX. commemorata; Unde Salomoni
Iudæorum Regi inclyto, ingens auri, argenti,
gemmarum, eboris, aliarumque rerum copia
apportabatur. GASPARE VARRERIO
Lusitano auctore*

IN monumentis rerum gestarum
Salomonis, ingentes commemo-
rantur diuitiarum copiae, quibus
adeò Rex ille inclytus abundasse
fertur: ut, præ nimia auri affluentia, cunctis
regiæ supellectilis vasis, ceterisq; vsus & splen-
doris domestici ornamentis, ex auro factis v-
teretur: & argentum apud Hierosolymorum
id temporis copiosissimâ urbem, nihili pro-
pmodum pederetur. Tantâ auri vim (classe
ad oram maris Rubri in hunc vsum ædifica-
ta) aduectam ex Ophyra regione narrat eadē
Iudæorum Regum historia. Verùm in qua-
nam orbis terrarum parte hæc regio sit posi-
ta, cinctane mari, an illi continens, silentio
præterit. Nec quo nomine his temporibus
nuncupetur, apud aliquem idoneum aucto-
rem memini me legisse. Si qui verò sunt,
qui in eo aliquam operam posuere, pa-
rum aut nihil consecuti mihi esse videntur.

Ac

Ac priusquam ad huius regionis cognitionem accedamus, de qua nostra futura disputatio est, visum fuit primum quorundam referre sententias, quam quisque de eadem re tulit. Deinde ea, quæ ab illis sunt in hoc genere disputata; & quæ nullam veritatis formam præ se ferre videtur, refellere. Postremò ijs adhærere, quæcunque vera sinceraque eos protulisse fuerint animaduersa. Ex quo ordine serieque tractationis, & rerum ac rationum collatione, dilucidior emergat nostra, quam super hac ipsa re, sumus in medium prolaturi, sententia.

I. *Opinio.*

Rabanus Maurus, summo vir iudicio & in sacris libris interpretandis satis exercitatus, regionem hanc apud *Indos* esse, nomenque inuenisse ab *Ophyro* Iectani filio, memoriam mandauit. Eamque terram auream, propterea quod ei aureum sit solum, nuncupatam. Quam nulla gens mortalium, sed leonum, aliarumque ferarum id genus multitudo ingens incolet. Qua propter nullos ad eam ausos succedere, præter nautas, positus in statione nauibus, quò facilius pateret periculum, ab imminente ferarum maleficio, & tractu illo circumcirca antè per exploratores diligentissimè perlustrato. Quam verò humum ab ipsis feris egestam offendissent, ad naues exportasse, ex eaque tandem aurum eruisse,

eruisse. In hanc ferè sententiam discedit Nic. Lyranus, peritissimus & ipse sacrarum literarum interpres.

Franciscus Vatablus Parisiensis, putat O. II. *Opinio* phynam regionem esse insulam *Hispaniolam*, in Oceano occidentali positam, nostrisque temporibus repertam. Atque ad id confirmandum nonnullas colligit rationes. Primum quod plurima auri idque optimi metalla gignat hæc insula. Deinde quod longissimis & maris & terrarum interuallis disjungatur à portu sinus Atlantici Afion gabero, è quo classis Salomonis nauigabat in Ophyram regionem, ut tanta locorum disjunctio, cum tam diuturna trium annorum nauigatione, à sacris literis cōmemorata, conuenire videatur.

Raphael Volaterranus nonnullos arbitra- III. *Opinio.* tos fuisse memorat, insulam *Sofalam* in Oceano Æthiopico sitam, (quæ nunc in ditione Portugalliæ Regum est) esse Ophyram. Idque Ludouicus quidam Venetus, in quadam sua ab Vlissipone in Indiam nauigatione, scripto ab eo prodita; sibi affirmasse certos homines apud eandem insulam in præsidio locatos dicit, sed quibus in ea re parum fidei præstitisset.

Hæc ferè sunt, quæ, circa huius regionis inuestigationem varia & diuersa ij, quos
P modo

modo nominavi, literis mandarunt. Sunt igitur, ut ea colligamus, tres orbis partes à se inuicem disiunctissimæ, *India*, quæ Asiæ celeberrima prouincia est: *Æthiopia*, quæ in Africæ partibus continetur. Et *Hispaniola*, quæ (ut diximus) in occidentali posita est Oceano insula: quæ sibi vindicare videntur hunc velut aureum principatum, sicut olim aliquot Græciæ ciuitates, suum vnaquæque ciuem Homerum vindicabat.

I. Opinio. Prima opinio, in qua duorum nec contemnendorum virorum cernitur summa cōsensio, partim ad rem & veritatem ipsam proximè accedere; partim dubia & incerta sanè quidem continere mihi visa est. Dabimus tamen operam, quo pacto perspiciatur aliquam veritatis rationem, seu certè verisimilitudinem præ se ferre.

II Opinio de Hispaniola. Quod vero insula *Hispaniola* non sit *Ophira* regio, ad id in promptu est, ut nullis nec argumentis, nec rationibus egeat. Verùm quia communi iudicio popularique intelligentiæ, quæ disciplinarum rationes minùs attingit, accommodandæ sunt plerumque rerum argumentationes, id existimauimus faciendum, etiam si doctioribus minùs gratum futurum esse videatur.

Primum omnium, illud maximè in confesso est, illam terrarum immensitatem & se in max.

in maximam latitudinem effundentem, quæ iam satis peruulgato vocabulo *Terræ nouæ* nuncupantur, quam, nostra memoria Hispani duce Christophoro Colúbo Ligure, longis periculosisque navigationibus in Oceano Atlantico exhaustis reperiunt, non modò ætate Salomonis Regis à nullis Asiæ, Africæ, atque Europæ gentibus: sed nec infinitis propè posterioribus seculis fuisse cognitam.

Nec illi meâ quidem sententia audiendi sunt, qui hanc insulam eam ipsam esse arbitrantur, quam Aristoteles prodidit Carthaginenses olim inuenisse ultra Gades, multorum dierum navigatione, legemque huiusmodi constituisse, ut capitale esset, si quis eam incoheret, quia sic consultum fortasse videretur publicis illius Reipublicæ rationibus. Quis enim id pro certò affirmet in tanta insularum multitudine, quibus mare ipsum Atlanticum ad omnes cœli plagas veluti quibusdam maculis distinguitur? Sed esto, vera sint quæ de hac insula opinantur, nonne Salomon Carthaginis originem antecessit 150. annis, ut auctores sunt Iosephus, & Eusebius Cæsariensis Episcopus? Accedit huc nec esse probabile nec verisimile, insulam ab Aristotele memoratam, in ipso statim Carthaginis ortu fuisse repertam, sed potius post-

Aristotel.

quam vrbs illa Romani imperij æmula cre-
uit, bonamque Africæ partem imperio ac-
ditione tenuit. Quibus viribus aucta, po-
tuit fortasse ad maris etiam imperium ani-
mum adijcere. Nam duorum Pœnorū lon-
ginquas nauigationes, ex Strabonis, Pópo-
nij Melæ, Plinij, & aliorum auctōrū monu-
mentis, constat fuisse multis annorum cur-
riculis post conditam Carthaginem, nem-
pe in ipso vrbs incremento, &, vt ipse Pli-
nius ait, florentissimis rebus Punicis. Præ-
terea nauigatio ipsa à mari Indico in Atlan-
ticum, per Australem orbis plagam, non
modo Salomonis ætate, nondum nota, sed
nec satis explorata fuerat, vsque ad tem-
pora Emmanuelis Portugalliæ regis incly-
ti. Cuius classes velis audacibus magnum
illum Oceanum longè latèque diffusum
percurrentes, vtramque Indiam citra & vl-
tra Gangem penetrauerunt: erroremque
Claudij Ptolemæi Alexandrini illustris Ma-
thematici, aliorumque existimantium In-
dicum mare, minimè ad Oceanum Atlan-
ticum pertinere, toti orbi summa cum
laude eripuerunt. Nec illud me mouet,
quod Scriptores aliquot (in quorum est nu-
mero, cuius modo mentionem feci, Plinius)
memoriæ prodiderunt, extitisse aliquos
multis antè seculis, qui ab ortu in occa-
sum,

sum, per magnum ac propè immensum illum maris circuitum nauigassent, vt de quodam Eudoxo accepimus, qui (fortè capite damnatus) cum iram Ptolemæi Lathyri Ægypti regis, quam incurrerat, declinare properasset, è sinu Arabico soluens fortunæ libidini & pelagi arbitrio se commit- tens, vsque Gades tandem peruenisse nar- ratur. Sed nec me mouent signa nauium Hispaniensium, in mari Rubro ex naufragio reperta, tempore Tiberij Romanorum Prin- cipis. Nec nauigatio Hannonis Cartha- ginensis à Gadibus ad finem Arabiæ, quam literis prodidisse etiam fertur. Nam huius- modi nauigationes etiam si fieri potuerunt, præterquam quod casu aut felicitate qua- dam potius accidisse, mea quidem sententia videntur, quam consilio aliquo, aut scien- tia nauigandi, tantam incogniti & procello- si maris vastitatem, tamen non tam proba- tæ vel illis vel posterioribus seculis extite- re: nec tantam fidem facere potuerunt, quanta opus erat, ad tam inusitatam & pe- riculis plenam nauigationem aggredien- dam. Suspectæ namque vt arbitror, vulgò maximè fuerunt. Qua propter Strabo nobi- lis Geographus, historiam, quam Heracli- dem Ponticum narrasse dicit, de certis nau- gationibus cuiusdam Eudoxi Cyziceni,

tempore Euergetis secundi Regis Ægypti, tanquàm ineptam fabulam reiecit, & explodit. In qua scripsisse asserit eundem Eudoxum, à mari Rubro supra Æthiopiam delatum, lignum quoddam nauigij, in quo effigies equi insculpta erat, ex naufragio se reperisse. Quod cum in Ægyptum detulisset, tandem à quibusdam naucleris (nostri maris forsitan nauigationibus assuetis) Gaditanorum esse nauium comperisse. Quo argumento satis sibi persuasum esse assererat Eudoxus, totius terræ globum vndique Oceano circumfundi. Quæ, (tametsi vera extitisse crediderim) neutiquam refelleret nobilis Geographus, si in ea, qua fuit ætate, nauigaretur tota illa pars Australis Oceani, quemadmodum à nostris hominibus nauigatur hodie, idque tanta facilitate, quanta mare nostrum à cunctis ferè nationibus Africæ & Europæ nauigatur. Quando igitur illis temporibus, non modo non ita absoluta, ut oportebat, & plena quadam cognitione hæc nauigatio pernoscebatur: nec vllis Geographicis Tabulis illustrata circumferebatur, quò littora & promontoria, portus, vrbes, fluminumque ostia, atque horum omnium situs ex certa cœli & siderum obseruatione internosci quocunque tempore adiri que possent, sed etiam à Claudio Ptolemæo disciplina-

plinarum Mathematicarum peritissimo omninò sublata fuerat, quí fieri poterat, vt ætate Salomonis notum esset, quod nulla tot seculorum posteritas, præterquam memoria nostra, vsu & experientia consecuta est?

Sed esto, *Hispaniola* insula Ophyra sit regio. Quorsum attinebat per tot vastissima vagari maria, & vniuersum penè orbem laboriosissima nauigatione, infinitis penè & casibus & erroribus obnoxia, peragrarè; si per fretum Herculeum è nostro mari in Atlant. cum exeuntibus, compendiaria nauigatione & breuiore temporis interuallo, illuc licebat peruenire? Iam illud prætereundum censeo, quòd hæc insula, præter aurum, nihil earum rerum gignat, quæ ex Ophyra Salomoni apportabantur, videlicet gemmas pretiosissimas, ebur, pauonès, simias, & ligna optima, ex quibus citharæ, aliaque Muscorum organa fabricabantur. Suspiciòr Vatablum ituc ipsum hausisse ex libris Petri Martyris Anglatiensis. Is enim narrat Christophorum Columbū, cum primū hanc insulam reperisset, atquè Indiæ partem aut certè illi finitimam, ob plurimam auri vbertatem illic animaduersam, esse existimasset, per suasum habuisse Ophyram esse.

Quòd verò nec *Sofala* insula, sit Ophyra regio, quam, supra diximus Volaterranum

III. Opinio de Ophyra insula.

ab aliquibus *Ophyram* fuisse existimatam, commemorasse, & quam Ludouicus Venetus, cum illuc appelleret, idem sibi Lusitanos quosdam affirmasse significat; ex toto nostræ disputationis contextu, faciliè apparebit, quàm rectè iudicauerit Venetus, illos id falso opinari.

Opinio
confirma-
ta.

Indi.

lib 8. An-
tiquit. lu-
daic. ca. 2.
(alijs 6) &
lib. 1. ad-
uersus A-
pionem.

Iosephus.

His igitur iactis velut fundamentis, reliquum est, ut in medio ponamus rationes, quibus nostra de hac ipsa re tota nititur sententia. Flavius Iosephus omni genere doctrinæ instructissimus, in historia sacrorum librorum, quam more panè Paraphrastico interpretatus est, hanc regionem scribit apud *Indos* esse, atque vulgò ætate sua *Terram Auream* nuncupatam fuisse. Cuius verba subiicienda duximus ad pleniorē huius susceptionis tractationis intelligentiam. Ait enim. *Habuit autem (Salomonem intelligit) ad edificandas naues beneficio regis Hiræ. Ipse namque ei multos viros gubernatores & in marinis rebus edoctos misit; quos iussit nauigare cum dispensatoribus suis ad locum, qui olim Ophyræ, nunc Terra Aurea nuncupatur (est enim in India) ut aurum deferrent, & colligentes quadringenta talenta, ad regem denuò sunt reuersi. Ex quibus satis apparet non solum antiquam & peruulgatam, sed clarorum etiam virorum hanc fuisse sententiam. Fuit namque Iosephus Græcarum*

carum literarum longè peritissimus, & in
 euoluendis Græcis auctioribus exercitatissi-
 mus, vt eius libri testantur, quos contrà A-
 pionem Grammaticum Alexandrinum scri-
 psit, multiplici rerum doctrina & cognitio-
 ne refertos. Quo in genere tantum excelluit,
 vt ob ingenij elegantiam, statua ei Romæ
 publicè posita fuerit, & de quo satis præcla-
 tum Elogium exstat apud diuum Hierony-
 mum in libro *De claris scriptoribus*. Cuiusque
 septem libri *de captiuitate Iudaica* publicè bi-
 bliothecæ sunt traditi, vt eodem libro idem
 vir sanctissimus testatur. Floruit principatu
 Vespasiani Imperatoris, eique cum primis
 charus fuit. Quo tempore C. Plinius, totum
 cursum, quem Romani terra, marique sin-
 gulis quibusque annis, in Indiam tenebant,
 summa cum diligentia scripsit. Quo loco e-
 tiam commemorat amplissimas pecunias,
 quas quotannis India ex ærario Populi Ro-
 mani, in redimendis aromatibus alijsque id
 genus mercibus exhauriebat. Quemadmo-
 dum apud nos forsitan pessimo publico fieri
 videmus, & non sine iusta querela maximo-
 que dispendio publicarum Lusitaniæ ratio-
 num. Quo circa cum idem Iosephus, tam va-
 ria multarum rerum cognitione, & doctrina
 polleret, atque omnis antiquitatis præsertim
 Iudaicæ, acutissimus esset indagator, multa-
 P s que,

que vetustate iam penè obruta è tenebris
 eruiſſet, omniſque regio Indiæ illis temporibus,
 quibus ipſe vixit, Romanorum nauigationibus
 explorata, ab aliarumque nationum mercatoribus
 ſatis perluftrata foret, haud e-
 quidem conſentaneum videtur, Ophyræ re-
 gionis notitiam, ità ex hominum memoria
 excidiſſe, vt, incuria ſeu obliuione penitus
 exoleſceret. Quare Iolephus ità ipſam aper-
 tè rem locutus eſt, vt nihil ſignificantius dici
 poſſet, quàm regionem hanc apud Indos
 eſſe, & *Terram Auream* nuncupari, adeò vt
 digito penè commonſtraſſe videatur. Nam
 Claudius Ptolemæus eam ipſiſſimam, (vt
 Plautino more loquar;) in India ſitam ſcri-
 bit, libro ſeptimo vndecimę Tabulæ Aſiæ,
 his verbis. *Super Argenteam autem regionem,
 in qua multa dicuntur eſſe metalla non ſignata,
 ſuperiacet autem Aurea regio Beſyngitis appropin-
 quans, quæ & ipſa metalla auri quam plurima
 habet.* Hæc Ptolemæus. Quoniam verò vl-
 tra peninſula eſt: ad quam mercatores ex
 Aurea regione exque inſula Somatra, tan-
 quàm ad nobiliſſimum totius Orientis en-
 porium, maximam (vt hodie fit) auri co-
 piam conferrent, euenit, vt *Aurea Cherſo-
 neſus* appellaretur, cuius omnes meminere
 Geographi, omniumque maximè Ptole-
 mæus. Quæ ſine controuerſa eadem ipſa
 eſt, vbi

Aurea
 Cherſo-
 neſus.

est, vbi oppidum nunc *Malâca* positum, sub imperio ac ditione Portugalliæ regum est, permanetque & durat ad hoc tempus, apud idem oppidum celebris cunctarum rerum mercatus, quò omnes negotiatores Orientalium partium, emendi & vendendi gratia confluunt. Cui oppido, propterea quòd in extremitate cuiusdam promontorij, quod Ptolemæus *Maleicolum* appellat. situm est, nomen *Malâca* inditum existimo. Eamque terræ lingulam in altum excurrentem, mare, vi reciprocantis æstus, à continente, cui tamen ponte coniungitur, abstulit. Quo effectum est, vt *Malaca* in insula remanserit. Quemadmodum insula *Ormuzia*, (quæ ab incolis alio nomine *Gerum* appellatur) vbi totius Persiæ celebre emporium est, nomen traxisse videtur ab *Armuzio* promontorio in sinus Persici fauces proiecto, & à regione *Armuzia* à Plinio in eadem *Carmania* parte, vbi hodie *Ormuzium* regnum est, commemorata. Hæc iccirco meminisse libuit, vt gratiam inirem à curiosis in exquirendis Antiquitatis vestigijs. Verùm, vt ad propositum reuertamur, si quis Ptolemæi Tabulas, cum nostris Geographicis Tabulis, à peritissimis nauticæ artis hominibus confectis, diligenter contulerit, iam profectò reperiet inter sinum *Gangeticum* (nunc *Bengalicum* *Ganget.* appel-

appellatum) & auream Chersonesum, Auream & Argenteam regionem esse positam. Quo terrarum situ Pegusium regnum esse nemini dubium est. Atquæ huic nostræ opinionioni confirmandæ, satis fidem debet constituere, quod citra & ultra Gangem nulla pars Indiæ sit, quæ aurum gignat præter *Pegusium* & *Somatram* insulam, quam multi falsò opinati sunt esse *Taprobanam*. Vt enim à nobis in quibusdam nostris Geographicis obseruationibus satis disputatum est, constat eam esse insulam *Taprobanam*, quæ his temporibus eodem ipso penè nomine *Scilam* appellatur, quo iam olim, auctore Ptolemæo, fuerit nuncupata. Qua propter omnem illam oram, quæ Pegusijs, Malacca, & Somatra continetur, apud diuinam historiam, *Ophyram* regionem esse appellatam facile contenderim, ob locorum vicinitatem, quam inter se habent, ut nullus terrarum interiectus reperiatur. Nam ora ea maritima à sinu Gangetico in Pegusium, hinc autem in Malâcam excurrit. Ab hac verò vrbe ad Somatram, exiguus maris traiectus interpositus est. Cuius incolæ, illi præsertim qui *Benancabi* & *Barri* nuncupantur; ingentem auri vim ad Malâcæ mercatus semper importare consueuerunt. Præterea, illud maximo ad hanc rem argumento esse arbitror, quod

Taproba-
na vbi.

Ophyra
regio, vbi.

quòd ingens cæterarum rerum copia apud Pegusium sit, quæ præter aurû & argentum ex Ophyra regione Salomoni afferebantur. Nam gēmas cuiuscunque generis pretiosissimas Indorum nulli præterquā Pegusij vendunt. Simias & Pauones quam plurimos habent, Eboris ingentem numerum. Siluis lignorum pretiosorum, ex quibus apud nos citharæ aliaque id genus Musices instrumenta conficiuntur, longè plurimis abundant.

Sed priusquam ad reliqua totius disputationis veniamus, discutienda videntur ea, Refellitur 1. opinio. quæ Rabanus Maurus & Nicolaus Lyranus protulere, de Ophyra regione aureum solum habente, deque leonibus alijsque maleficis animantibus, quæ Salomonis ætate eosdem terre tractus adeò infestabant, vt sinè maximo periculo è nauibus egredi non liceret. Hæc quanquam similia fictis fabulis, & finitima videntur ijs, quæ Herodotus & Aristæas Proconnesius (vt à Plinio traditur) scriptum reliquere, de gryphibus aurum custodientibus, & Arimalpis rapientibus; aut ijs, quæ Pomponius Mela tradit, de formicis magnitudine maximos canes equantibus, quæ prædictorum gryphium more, aurum etiam egestum in multorû exitium custodiant: tamen maximè exploratû est, vasta Pegusiorum & deserta loca, tum tigrum, tû elephātorum

torum esse longè refertissima. Atque tantam earundem ferarū esse copiam, apud *Auream Chersonesum*, (quæ regio Pegusij finitima 1360. pass. patet longitudine) vt nulla ibi oppida, nullæ habitentur vrbes, præter Malacam & perpaucos barbarorum vicos, obtruculentarum tigrium (quas *Reimones* appellant) immanitatem & maleficia, adeò vt noctu nullum sit miseris accolis perfugium, præterquàm succensi ignes, quos maximè formidat hoc animal, & arborū summitates. Si enim non altius quam ad altitudinem 20. pedum ascendunt, à tigribus perniciosissimo saltu corripuntur. Ac vulgò memoratur apud nostros, quandam tigrim, magnum aliquando facinus intra urbem Malacam edidisse, iam tum cum illic rerum potiremur. Ad tantam si quidē prorupit audaciam, sæuiente prædæ auiditate, vt nocte concubia in urbem irrumpens, hortumque quendam inuadens: tres seruos ad trabem ob flagitia vinctos arriperet, eisque cū trabe simul dorso impositis, maceriam etsi præaltam saltu tamen euasisse. Idque, & accepimus & à multis viris auctoritate grauissimis, & legimus in historia Asiatica doctissimi, atque clarissimi viri Ioannis Barrij auunculi nostri. Quod verò iam olim, tigres & elephantos habuerit Aurea Chersonesus & finitima tota illi regio, auctor

Ioan Bar-
rius histo-
ric. Indiar.

auctor est Ptolemæus. Qui postquam Chal-
 citim regionē, atque aliquot vicinas gentes
 descripsit: tandem ad Doanos veniens, post-
 que ipsos ad montana quædam, tigres & ele-
 phantes habentia descendit: iuncta Lestorū
 regioni. Qui *Lestores* finitimi sunt Aureæ
 Chersonelo: sed eiusdem verba hæc ferè
 sunt. *Postea Daonæ ad flumen eiusdem nominis,*
& post ipsos montana sunt, iuncta Lestorum siue
Prædonum regioni, tigres habentia & elephan-
tes. Potuit enim fieri vt Salomonis ætate, in
 qua nondum terrarum orbis vniuersus tanto
 hominū cœtu & frequentia; quanta poste-
 riōribus seculis habitaretur, Pegusiorum re-
 gio adhuc inculta ac deserta esset. Postea ve-
 rò quàm finitimæ gentes animaduertissent
 multos mortales ad eam, auri adipiscendi
 gratia cōmeare, huius auiditate quoque al-
 lectæ, in animum induxissent ipsam Auream
 regionem incolere, vt auro potitæ rerū mul-
 tarū, quibus carerent, permutationibus au-
 gerentur. Qua de causa hominum crescente
 multitudine, feræ paulatim loco cedentes, ad
 solitudinem confugerent. Quæ in *Aurea*
Chersoneso fieri non potuissent, propterea
 quòd nulli mortalium, ob soli sterilitatē vti-
 litate aliqua ad eam habitandum alliceren-
 tur: exceptis locis aliquot maritimis ad mer-
 caturas faciendas accōmodatis, quorum est
 Malâca

Malaca illius regionis metropolis. Quod verò regio *Ophyræ* solum aureum habuerit, ut asserunt prædicti Rabanus Maurus, & Nicol. Lyranus, nemini mirum videri debet, illos istuc ipsum credidisse, quippe cum peruulgatum id multis ante sæculis apud omnes esset, ut Pomponius Mela & Plinius testantur. Ait enim iste: *Extra ostium Indi Chryse & Argyræ fertilis metallis, ut credo. Nam, quod aliqui tradidere, aureum argenteumque ijs solum esse, haud facile crediderim.* Mela autem: *Ad Tamum* (est enim Indiæ promontorium) *insula est Chryse, ad Gangem Argyre, altera aurei soli (ita veteres tradidere) altera argentei. Atque ita, ut maximè videtur, aut ex re nomen, aut ex vocabulo ficta fabula est.* Hæc Plinius & Pomponius. D. etiam Hieron. in epistola ad Rusticum monachum nonnulla commemorat, quæ ijs conuenire videntur. Quæ ideo commemorare visum est, ne vituperatores aliquot libidine obtrectandi hanc ansam arriperent, ad Maurum & Lyranum reprehendendos. Id enim illos, hinc liquido constat ab antiquis auctoribus accepisse. Nec modò opinio ea, constanti fama multorumque scriptorum literis, antiquis illis temporibus celebrata est, verum etiam ad nostram usque ætatē & apud Indos emanauit, adeò ut multi Lusitanorū, auri cupiditate inducti, magnos adierint

Plinius li.

6. cap. 21.

Pompon.

Mela libr.

3. cap. 8.

adierint labores, non sine maximo vitæ dis-
 crimine & rei familiaris iactura, in perqui-
 rendâ & inuestiganda hac Aurea regione. In-
 crebuerat enim fama, certos homines, casu
 in eam regionem naue quondam appulso,
 ibique dum fortè idoneam ad nauigandum
 tempestatem nanciscerentur, aliquot dies
 commoratos, cum ea, quibus ad instruendam
 nauim opus erat, pararent, & alia non suppe-
 teret ad saburram materia, præterquàm hu-
 mus, magno eius pondere in carinam inie-
 cto, nauim firmasse. Atque illinc soluentes
 urbem Goam tandem peruenisse. Cum verò
 ea naus posteris temporibus vetustate cor-
 rupta, in naualibus dissolueretur, & aurei
 grumuli in saburra lucentes, homines ad se
 allexissent, inuentum aurum fuisse: atque
 hinc coniecturam cepisse, humum illam ex
 Aurea regione casu non scienter exporta-
 tam. Porro de ijs, quæ de aureo solo huius re-
 gionis, deque malefico genere animalium
 eandem infestante produntur, nihil de-
 finire certum mihi est, eò quòd sint ad iu-
 dicandum difficillima. Verum seu ex ege-
 sto à feris solo, aurum eruerint, seu ex rerum
 permutationibus (quod vero similis ma-
 gisque consentaneum est, & diuus Hierony-
 mus, vt inferius apparebit, innuere vide-
 tur) vel quauis alia ratione comparauerint,

Lusitan.
 nauigatio
 in Indiam

Q

hæc

hæc quomodo sese habuerint, affirmare nihil dubitauerim facta atque transacta fuisse, in ea ora maritima, quæ Pegusij, aurea Chersoneso, & insula Somatra, (vt iam conclusimus) circumscribitur.

3. Reg. 10.

Iosephus
Iudæus.

Sed ijs cognitis, ad aliam partem disputationis, quæ non paruam dubitationem habere videtur, oportet accedamus. Narrat siquidem eadem rerum Iudaicarum historia, *classis Salomonis* (vt eiusdem verbis vtamur) *cum classe Regis Hiræ, semel per tres annos, ire in Tharsis.* Quæ verba in hunc sensum explicat Iosephus, vt huiusmodi nauigationem ante triennium, haud quaquam fuisse confectam & absolutam existimet. Nos verò, tamen si hunc locum aliter ac censet Iosephus intelligi posse (vt postea disputabimus) arbitramur, tamen pro virili parte, quantum fieri possit, ne aliquis resideat scrupulus, nonnullas colligemus rationes, quibus illum rectè sensisse intelligatur. Porro, vt causas dubitationis explicemus, cum hac tempestate visu & experientia compertum sit, illos, qui à mari Rubro secundo cursu *Auream Chersonesum* nauigare, atque indè commodè renauigare solent, totam nauigationem decimo mense, aut summum anno conficere, apparet omninò incredibilis & absurda illa nauigatio, quæ cum vnum atque idem maris spatium

tium percurreret, id præterquàm triennio non absolueret. Quæ causa impulit Franciscum Vatablum, ut crederet tam longi temporis interuallum, cum longissima huiusmodi conuenire nauigatione, qualis esset à sinu Atlantico maris Rubri ad *Hispaniolam* insulam. Ex quibus facillè intellectu est, aut Ophyram regionem non esse ad oram maritimam Pegusiorum & Auræ Chersonesi atque Somatræ, aut, tam diuturnam nauigationem, quæ perpetuum triennium completeretur, esse prorsus vanam & commentitijs fabulis quàm vero similiorem. Sed si rectè diuersæ temporum rationes expendantur, iam profectò non inepta nec absurda hæc Iosephi interpretatio iudicabitur. Etenim si huius facultatis, quæ vocatur nauigatio, siue artis siue scientiæ volumus considerare originem, facillè reperiemus, eam, sicut aliarum artium & disciplinarum principia, ab exiguis initijs esse ortam atque deductam. Nam cum principio animaduertissent homines, magnas atque ingentes utilitates in fluminum & maris nauigationibus esse constitutas, cœperunt inire rationem, qua eis ad vitæ vsus necessarios uti commodè & utiliter possent. Itaque primum rudis illa ætas, trabes inuicem connectere atque coniungere cœpit, quas *trabes* appellauit. Quibus primò in fluminum

Nauigationis origo. vide Horatij Odâ III. *Ille robur & æs triplex, &c.*

transfectionibus utebantur, deindè per ipsa flumina vecti ad finitimos importabant ea, quorum maximè indigere intelligebant; ex quorumque permutationibus alia similiter compararent, quibus etiam ad vitam tuendam & propagandam carere non poterant. Postmodum scaphas & lembos aliaque id genus minuta nauigia, per solertiam excogitarunt, velis & remis, multisque rebus ad vsus nauticos pertinentibus, paulatim inuentis, non modo instruxerunt, sed etiam alijs ad decorem & ornatum appositis illustrarunt. At crescente iam cum longa experientia, & frequenti huius rei vsu audacia, in altum se maioribus nauigijs contulerunt. Primum propter oram maritimam nauigantes, propinquitate continentis animos faciente, deinde ad interiora maris eos ducente peritia, cœpere procellosis fluctibus se opponere, & iam audacter ventis vela dare, atque confidenter tandem & strenuè longa maris spatia transmittere. Vnde colligitur, huius artis nauticæ scientiam, paulatim & per quosdam velut ætatis gradus creuisse, adeò vt, auctore Plinio, remum Copæ & eius latitudinem Plateæ, vela Icarus, Tyrrheni anchoram, malum & antennâ Dædalus, rostra Piseus, Salaminij hippagum, & alia alij diuersis temporibus inuenerint,

Plin. libr.
7. cap. 56.

rint, & plurima adiumenta huic arti submi-
 nistraverint. Nec in tot sæculorum ætati-
 bus, ad perfectam illam & omnibus suis nu-
 meris expletam nauigationis rationem per-
 uenerunt, vsque ad illud tempus, in quo mul-
 ta quoque Mathematices disciplinæ, ad rei
 nauticæ facultatem maximè pertinentia, fue-
 runt excogitata instrumenta. Quorum il-
 lud extitit, valde post homines natos admi-
 randum, quod vulgò *Acum nauticam* appel-
 lant: Quæ Septentriones nimia & mira qua- Nautica
 dam insita auiditate, ex vi contactus magne- pyxis.
 tis lapidis contracta, appetit: & cuspide ve-
 luti digito perpetuò ostendit. Cuius vim, Magnetis
 natiuamque lapidis in Arctos semper respe- vis.
 ctantis, antiquis ignotam fuisse manifestum
 est. Hinc illa summa admiratio, quam Ar- Argona-
 gonauis Argonautarumque à Thessalia in uis.
 Colchos per quam brevis nauigatio illis
 temporibus excitauit. Hinc Vlyssis nescio Vlyssis er-
 quos errores, priusquam in Siciliam insulam ror & Æ.
 ab Illo peruenisset, intra tam exigua maris nez apud
 spatia exhaustos, admirata est maximè An- Virgil. 3.
 tiquitas, quos illustris ille Græcus poëta Æncid.
 propterea egregijs decorauit numeris. Quis
 igitur (vt diximus) hæc ars non subito,
 sed per longa temporum interualla nata
 fuerit incrementa, repertæ sunt compen-
 diariæ nauigationes, usu & consuetudine

nauigandi. Nam, vt Plinius refert, cum ab
 Siagro Arabiae promontorio (quod hodie
Fartacum appellatur) Patalam Indiae vibem
 petere consuetum esset, posterior aetas bre-
 uiorem tutioremque esse nauigationem, ab
 eodem promontorio ad amnem Zizerum,
 Indiaeque portum credidit, diuque ita naui-
 gatum esse dicit, donec auidi & lucro inhian-
 tes mercatores, aliam magis compendiariam na-
 uigationem inuenerunt, qua singulis quibus-
 que annis Romani in Indiam nauigabant.
 Quo in loco (vt supra memorauimus) dili-
 genter scribit, quem cursum Romani terra-
 marique, dum Indiam peterent, ad species
 aliaque id genus aromata comparanda tene-
 bant: & quo anni tempore hinc atque illinc
 proficiscebantur, quantoque spatio (quod
 annum esse significat) totum illud iter, vs-
 que dum reuerterentur conficiebant. Ita igitur
 usque ad Plinij tempora certos quosdam
 progressus fecisse videtur nauigatio. Verum
 tamen multo ampliores usque ad nostram
 aetatem. In quo genere iure laudantur Lusitani,
 qui magnum fundamentum perpetuae
 suae commendationis & famae iecisse, atque
 memoriam nominis sempiternam consecuti
 esse videntur, apud quos magis quam in cae-
 teris nationibus haec ars exulta est. Cum
 primi mare Atlanticum nauigantes, cunctam
 Mauri-

Lusitan.
 laus.

Mauritaniæ & Æthiopix orā, vsque ad magnum & vastum illud *Bonam Spem* promontorium; maris interiora magno impetu irrumpens, atque ab antiquis Geographis ignoratum, summa cum animi fortitudine & solertia, & magnis tandem exantlatis laboribus explorarunt, temporibus Infantis Henrici & Ioannis Portugallix regis secundi, & plurimis annis antequā Christophorus Columbus Ligur occidentalem Oceanū nauigasset, viamque munitam posteris reliquere, qua perfectum est, vt postmodum in Indiam ab Vlissipone, summa, vt hodie fit, facilitate nauigaretur. Vt igitur hanc partem disputationis concludam, in illa ætate, in qua necdum tam strenuè tantaque artis peritia maria percurrerant homines, interdiu nauigare, noctū verò in anchoris diem expectare consuecebant. Vt nunc quoque fieri videmus in sinu Arabico, propterea quòd illic & vadosum & maxime scopulosum sit mare. Tū etiā quoad fieri poterat, propter orā maritimā, atq; secundis dūtaxat flatibus nauigabāt, eò quòd nondum alijs ventis vela dare, ad vsumque & vtilitatem nauigandi trahere nouerant, vt posteris temporibus inuentum est. Alia tam tardæ ac lentæ nauigationis causa erat, quòd ob maris & locorū maritimorum insolentiam, naucleros pro diuersitate regio-

Christop.
Colūbus
Ligur.

num mutabant, aliosque mutuabantur vicinarum nauigationum scientissimos : vti à nostris hominibus factitatum fuisse satis cōpertum est, cum primū in Indiam nauigarent, propterea quòd certiores & tutiores cursum ignorarent. Sed alia quoque huiusce rei erat causa quòd cum id temporis nauigia, propter modicam magnitudinem, tantum cibarium numerum capere nequiuissent, opus erat aquandi & commeatus gratia, sæpius apud maritima loca ad id maximè opportuna, moras producere. Ad hæc mare Indicum (vt satis notum est) hyeme, quæ apud Indos à Kal. Aprilis circiter Kalen. Octobris protenditur, ad cō procellosis & immodicis tempestatibus agitur, vt infestum & inuiū hoc tempore efficiatur. Præterea sunt in illo coelo statim ventorum flatus, (quemadmodū apud nos *Etesia* certo æstatis tempore,) quos *Monsoas* vocant, quibus exceptis, idoneæ ad nauigandum tempestates nullæ sunt. Quare oportet hos tempestiuos ventos expectare. Nam qui à sinu Arabico seu Persico vel ab vrbe Goa in Auræ Chersonesum nauigant, nec statim illinc renauigare valent, sed tantisper ibi manere opus est, dum huiusmodi venti flare incoeperint. Quapropter tres aut quatuor, & amplius menses, apud Malacam commorantur. Itaque cum illa ætate non

non admodum vigeret , vt postea viguit,
 hæc nauigandi scientia , cumque dies non
 noctes & proximè oram maritimam nauiga-
 rent, ex quo tardiores efficiebantur nauiga-
 tiones, propter longos orarum anfractus, ve-
 luti quosdam in semet reductos Mæandros;
 idque verno non hyemali tempore. Deinde,
 cum in crebras, tum aquationes, tum ligna-
 tiones, & in perquirendos nouos naucleros,
 atque in expectandos cōmodissimos vento-
 rum accessus, postremò in aurū comparandū,
 seu rerum permutationibus, seu quacumque
 alia ratione id fieret, non modicum temporis
 infumendum esset, nihil mirum videri debet,
 si totum cursum antè triennium cōficere ne-
 quiuerint. Mitto instrumentorum nautico-
 rum duplices apparatus, quibus illa ætas in
 nautica disciplina nondum satis exercita-
 tata, opinor non utebatur. Quorum penuria
 solet sæpe numerò cursus nauigationum re-
 tardare, dum reficiendis nauibus, vi vento-
 rum ac tempestatum corruptis incumbunt, vt
 vsu venire videmus nostris nauibus ex India
 huc properantibus, quæ in insula *Mosambi-*
qua hyemare eisdem de causis sæpissimè co-
 guntur. Quanquam, vt superius diximus, illa
 verba sacræ historiæ, *semel per tres annos*, etiam 3. Reg. 10.
 in hunc sensum & fortasse veriore explicari
 Q 5 posse

posse arbitramur, vt trinis annis semel classis Salomonis solita sit in Ophyram regionem nauigare, non autē quod perpetuos tres annos in hanc nauigationem intumpserit. Accidere namque poterat, vt ex tam longa nauigatione naues adeò dissipatæ & dissolutæ redderentur, vt integrum triennium, tum in nauigatione peragenda, tum in classe, maris iactationibus corrupta & conuassata, reficienda insumeretur. Quemadmodum accidere nostris nauibus in Indiam nauigantibus solitum est, vt quam paucissimas extitisse credamus, quæ duas amplius nauigationes, in tam longinquas oras perficere quierint. Nec sic integræ omnibus suis partibus redierint, vt non refici & instaurari ad iterum nauigandum, malis, carinis, lateribus, proris, puppibus, antennis, velis, gubernaculis, alijsque huiusmodi ad earum robur & firmitatē stabiliendam pertinentibus, opus eis fuerit. Quapropter mirari desinamus, cum Romani in ea ætate, in qua iam ars ipsa nauigandi ampliores fecerat progressus, plurimū terra marique possent, annū tamen (vt auctor est Plinius) in eadem Indica nauigatione, quæ citra Gangem continebatur, absumerent, classē Salomonis longius (quippe vltra Gangem) progressam (qui nec opibus, nec nauali disciplina, antiquis illis temporibus, nondum satis cognita

cognita nec culta, cum Romanis esset conferendus) ante triennium conficere nequiuisset. Sed hæc hæctenus.

Sequitur, ut de reliqua parte dicendum sit, quam in ultimum locum nostræ disputationis coniecimus. Quæ quorundam huiusmodi continet sententiam, ut statuant insulam *Sofalam*, quam ultra Bonam Spem promontorium, ad oram maritimam Æthiopiæ sub Ægypto positam commemorauimus, esse *Ophyram* regionem. Idque huiusmodi rationibus concludunt. Cum id vocabulum *Tharsis* apud sacras literas (ut ipsi volunt) *Africam* significet, cumque insula *Sofala* in *Africæ* regione sita sit, illicque plurima auri suppetat vbertas, quod finitimi Æthiopes, qui eorum lingua *Casri* appellantur, ad prædictam insulam importare soliti sint, ut eius permutationibus, ea, quibus carere non possunt, à nostris hominibus ibidem degentibus nanciscantur, satis apparere ijs sic constitutis, & consequens esse quod statuunt, *Ophyram* scilicet esse *Sofalam*.

III. Opinio Volaterrani.

Tharsis in sacris literis an sit Africa.

Verum hæc quo verius ac rectius intelligi dijudicarique, valeant cunctos factorum librorum locos, in quibus hæc nauigatio commemoratur, subiiciemus. Deinde, quæcumque in rei huiusmodi disquisitione sunt posita, in omnes partes disputabimus. Postremo, si quod aliquorum peccatum, in hac ipsa re dijudicanda sit animadu-

1. Reg. 9.

maduersum, indicabimus. Sed ipsa iā Sacre
historię verba diligēter attēdamus. Ait enim:
Classē quoque fecit rex Salomon in *Asiongaber*, quæ est iuxta *Ailath* in littore maris Rubri,
in terra *Idumæa*, misitq; *Hiram* in classe illa, ser-
uos suos viros nauticos & gnaros maris, cum
seruis Salomonis. Qui cum venissent in *Ophir*
sumptum inde aurum, quadringentorum viginti
talentorum, detulerunt ad regem Salomonem.

3. Reg. 10.

Et sequenti capite. Sed omnia vasa de quibus
potabat rex Salomon erant aurea, & vniuersa
suppellex domus saltus libani de auro purissimo.
Non erat argentum, nec alicuius pretij putaba-
tur in diebus Salomonis, quia classis regis, per
mare cum classe *Hiram*, semel per tres annos ibat
in *Tharsis*: deferens inde aurum & argentum,
& dentes Elephantorum, & Simias & Pauones.
In 2. verò libro Paralip. cap. 2. ait. Tunc abiit
Salomon in *Asiongaber*, & in *Ailath* ad oram
maris rubri, quæ est in terra *Edom*. Misit ergo
ei *Hiram*, per manus seruorum suorum, naues &
nautas gnaros maris, & abierunt cum seruis Sa-
lomonis in *Ophir*, tuleruntque inde quadringenta
quinguenta talenta auri, & attulerunt ad re-
gem Salomonem. Nono autem cap. idem ite-
rum refert. Sed & serui *Hiram* cum seruis Sala-
monis, attulerunt aurum de *Ophir*, & ligna *Thyi-
na* & gemmas pretiosissimas, de quibus fecit rex
de lignis scilicet *Thyiniis*, gradus in domo Domini
& in

& in domo regia, Citharas quoque & Psalteria
 cantoribus. Nunquam visa sunt in terra Iuda
 ligna talia. Et in eodem cap. eadem inculcat,
 dicens Omnia quoque vasa conuiuij regis erant
 aurea, & vasa domus saltus Libani ex auro pa-
 rissimo. Argentum enim in diebus illis pro nihilo
 reputabatur, si quidem naues regis, ibant in Thar-
 sis cum seruis Hiram semel in annis tribus, & de-
 ferebant inde aurum & argentum, & ebur &
 simias & pauones. Magnificatus est igitur Salo-
 mon super omnes reges terræ, præ diuitijs & glo-
 ria. Præterea c. 20. sic ait. Post hæc autem inijt
 amicitias Iosaphat rex Iuda, cum Ochozia rege
 Israel, cuius opera fuerunt impijssima, & parti-
 ceps fuit, vt faceret naues quæ irent in Tharsis,
 feceruntq; classem in Asiongaber, prophetauit au-
 tem Eliezer filius Dodau de Marcia ad Iosaphat
 dicens. Quia habuisti fœdus cum Ochozia, per-
 cussit Dominus opera tua, contritaq; sunt naues,
 nec poterunt ire in Tharsis. Quibus diligen-
 ter inspectis intelligitur, sacram historiã,
 eandem regionem modo Ophyr, modo Thar-
 sis, diuersa nominum appellatione nuncupa-
 re. Quod ansam præbuit aliquibus (cum per-
 suasum haberent Tharsis apud Hebræos *A-*
fricam significare) ad existimandum *Sofalam*
 insulam (vt diximus) fuisse olim Ophyrã.
 Verum diuus Hieronymus hunc nobis eri-
 puit errorem. Nam dum quædam loca Elaię
 explicat

Tharsis
D. Hiero-
nymo, vi-
de Geo-
graphicū
Thesaurū
Ortelij, &
P. Riber.
in XII.
Prophet.
minores.

explicat, hæc infert. *Est autem Ophyr Indiæ locus, in quo aurum optimum nascitur.* Et alibi explicans vim significationis huius vocabuli *Tharsis* ait, *Tharsis, vel Indiæ regio est, ut vult Iosephus, vel certe omne pelagus Tharsis appellatur.* Et in explicatione ultimi capituli Isaïæ, eadem rursus inculcat. *Tharsis lingua Hebræa mare appellatur, & ut aiunt, Indiæ regio, licet Iosephus litera commutata Tharsum putet nuncupari pro Tharsis urbem Ciliciæ.* In Ionæ autem commentarijs hæc quoque subiungit. *Vnde imitatus Cain Ionas, & recedens à facie Domini, fugere voluit in Tharsis, quam Iosephus interpretatur Tarsum Ciliciæ civitatem, primæ tantum litera commutata.* Quantum verò in Paralipomenon libris intelligi datur, quidam locus Indiæ sic vocatur. Porro Hebræi *Tharsis* mare dici generaliter autumant, secundum illud: *In spiritu vehementi confringes naues Tharsis, id est, maris.* Et in Isaia. *Ululate naues Tharsis.* Super quo ante annos plurimos, in epistola quadam ad Marcellam dixisse me memini. Non igitur propheta ad certum fugere cupiebat locum, sed mare ingrediens quocumq; pergere festinabat, & hoc magis conuenit fugituo & timido, non locum fugæ ociosæ eligere, sed primam occasionem arripere nauigandi. Iplius verò epistolæ ad Marcellam hæc verba sunt. *Queris si Tharsis lapis Chrysolitus sit aut Hyacinthus, ut diuersi*
inter-

interpretes volunt , ad cuius coloris similitudinem Dei species scribatur. Quare Ionas propheta Tharsis ire velle dicatur, & Salomon & Iosaphat in Regnorum libris naues habuerint, quæ de Tharsis solita sint exercere commercia. Ad quod facilis est responsio , homonymum esse vocabulum, quod & Indiæ regio ita appelletur, & ipsum mare quia cæruleum sit & sæpe solis radijs percussum , colorem supradictorum lapidum trahat, & à colore nomen acceperit, licet Iosephus T. pro Θ. litera mutata Græcos putet Tarsum appellare pro Tharsis. Hæc diuus Hieronymus. Ex quibus liquidò perspicitur persuasissimum fuisse viro sanctissimo & eruditissimo, hanc regionem in India esse positam, eique duo nomina indita, videlicet *Ophyr* & *Tharsis*, atque in eadem sententia fuisse Iosephū, vt ex verbis ipsius à nobis paulò ante recitatis, & ex diuo Hieronymo , qui istuc ipsum sensisse Iosephum affirmat, ostensum est. Atquæ ipse auctorem in illa ætate grauem extitisse neminem existimo , qui hoc verbum *Tharsis*, apud Hebræos *Africam* significare scribat, sed longè alio nomine ac diuerso Hebræos *Africam* nuncupare solitos accepimus, quod est *Phut* siue *Phul*. Ait namque diuus Hieronymus , dum caput vltimum Isaiaë interpretatur: *Phut autem siue Phul Libye, omnisque Africa vsque ad mare Mauritania,*

niæ, in qua fluvius hodie qui Phut dicitur, & cuncta circa eum regio, Phutensis appellatur.

lib. 1. An-
tiquit. c. 6.
(alijs 12.)

De quo fluuius sic meminit Iosephus. Instituit & Phut Libyam, Phutos à se vocans prouinciales. Est autem & fluuius in Mauritania prouincia, qui isto nomine nuncupatur. Vnde & plurimos Græcorum historiographorum inuenimus huius fluminis memoriam facientes, & ex adiacenti prouincia, quæ Phuti vocatur, ei nomen impositum. Hæc diuus Hieronymus &

lib. 5. ca. 1.
Natur. hi-
stor.

Iosephus. Eius fluuij quoque mentionem facit Plinius, cum Mauritaniâ Tingitaniam describit, cuius hæc verba sunt. Indigenæ autem tradunt, in ora ab Sala. C L. M. pass. Flumen Asanam, marino haustu sed portu spectabile, mox amnem quem vocant Phut. Hunc Ptolemæus quoque Phichut nominat, in eademque prouincia esse, eiusque oris situm gradus habere 72302. scribit. Quod flumen Phut, nunc corrupto nomine Fez, & regio Phuti etiam Regnum Fez hodie nuncupari, nemini dubium est. Quod & nos, in quibusdam nostris Geographicis Obseruationibus accuratè disputauimus; & satis credo, diligenter (absit verbo inuidia) perquisita & inuestigata, à nobis sunt hæc ipla, huius antiqui nominis vestigia. Sed ne de pluribus agam, ad propositum reuertar. Iam illud opinor notum & satis compertum esse, vel illis qui

qui mediocri literatura præditi sunt, Iudæos, prouincias & regiones, atque maria & insulas, longe alijs nominibus ac nos, solitos esse nuncupare. Nam nomina eorum, quos maximè persuasum habuere, extitisse primos terrarum cultores, ipsis terris indident. Quapropter Africam (ut modò diximus) *Phu* à Chami huius nominis filio, *Æthiopia* verò sub *Ægypto*, *Chus* à Chuso *Phutis* fratre. A *Mezraimo* horum etiam fratre, totam *Ægyptum* *Mezraim* appellauere. Quo nomine his temporibus, à Iudæis & Arabibus, *Ægyptus* *Muzraim* nuncupatur, & urbem *Alcayrum* eius Prouinciæ metropolim, (quam nonnulli falsò *Men-phim* arbitrantur) ob linguarum inter se similitudinem, *Mizzaram* vocant. Quemadmodum temporibus etià Iosephi à Iudæis vocabatur, ut testatur ipse his verbis. *Seruata est etiam Mezraim secundum appellationem prisca memoria. Ægyptum namque Mezrim & Mezraeos omnes vocamus Ægyptios.* Tum *Cyprum* insulam *Cethim* appellauere, à *Cethimo* Iapheti nepote. Atque hinc mos apud illos inoleuit, ut insulas hoc nomine *Cethim* significarent. Italiam verò *Thubal* nuncupant à nomine *Thubalis*, quem primò credere hanc Prouinciā coluisse. Nec mare *Rubrum*, vel hoc nomine, vel sinum Arabi-

Hebræi
Regiones
ferè à pri-
mis cultoribus no-
minant.

Ægyptus

Méphim,
malè *Al-
cayrū* no-
minant.

libr. i. An-
tiquit. Iu-
daic. c. 6.

Cyprus

Italia.

R

cum,

cum, vt Græci & Latini, sed *mare Carectosum* appellare semper consueuerunt. Qua de re, miror si qui sunt, qui apud Hebræos existiment *Tharsis* nomine Africam significari. Nisi fortè auctoritate ducti cuiusdam Iudæi Dauid Chimhi nuncupati. Cui ego alijsque recentioribus Iudæis, nullam tribuendam esse auctoritatem existimo, maximè quando aliter sentiunt ac diuus Hieronymus, & antiqui ac doctissimi Iudæorum, illi præsertim qui Christi præcesserunt ætatem. In quorum sunt numero *Philo & Iosephus*, ab ipso Hieronymo & sapientissimi & eruditissimi existimati. Nam (vt præteream quòd à viris longè grauissimis & in Hebraicis literis exercitissimis acceperim : cum Romæ apud Paulum III. Pontificem Maximum, negocia gererem illustrissimi Principis Henrici Cardinalis ac Portugalliæ Infantis, Iudæos huius ætatis, nullam aut certè perexiguam Hebraicæ linguæ eruditionem callere,) quæ tanta potest esse hominum quorundam inscitia, seu potius amentia, vt perfidi Iudæi, à veraque Christi Optimi Maximi Religione alienissimi, iudicium præferant diui Hieronymi eruditioni & auctoritati. Quem diuus Augustinus *virum doctissimum* appellat, & *omnium trium linguarum peritissimum*. Et quæ Iudæi illius ætatis, rectè de Hebraicis veterem

rem sacrorum librorum scripturam, in Latinum conuertisse ingenuè fatebantur. Quapropter non aliter huiusmodi homines desipere arbitror, ac si veritati vanitatem anteponant. Susplicamur ipsum Dauidem, & si qui sunt in eadem sententia, cum apud Isaiam, Hieremiam & Ezechielem, Septuaginta interpretes diuumque Hieronymum, hoc vocabulum *Tharsis* *Carthaginem* aliquando interpretatos esse animaduernerent, hinc occasionem fortasse nactos ad hanc opinionem confirmandam, videlicet Tharsis, vnde aurum Salomoni afferebatur, *Africam* significare; cumque, vt diximus, finitima *Sofalæ* regio auri feracissima sit, & in quadam *Africæ* parte collocata, omninò statuerunt *Sofalam* *Ophyram* esse regionem. Quasi verò in multis *Æthiopie* partibus, ad quas breuiore temporis interuallo, è nostro mari in Atlanticum exeuntes nauigare potuissent, non magna etiam auri, idque optimi affluentia sit, summaque vbertas? Ex cuius *Æthiopie* diuersis locis, nostri homines, auspicijs Christianissimorum Portugallie Regum, singulis quibusque annis, ab ipsis *Æthiopibus* variarum rerum permutationibus, aurum comparantes huc deferunt. Quod si diuus Hieronymus & LXX. apud commemoratos Prophetas, idque certis duntaxat locis, id vocabulū *Thar-*

sis Carthaginem significare profitentur, non id propterea, quòd ex sua præcipua, &, vt dicam natiua significatione, urbem Romani imperij æmulam exprimat. Quî enim id fieri poterat, cum Salomonis ætate necdum *Carthago*, vt iam demonstraui, condita esset? Sed cum ciuitas admodum opulenta foret, & maximis afflueret auri & argenti diuitijs, commercio Hispaniæ id temporis omnium metallorum feracissimæ adeptis, quibus domi forisque potentiam & imperium suum largiter auxerat, eam nomine *Tharsis* expressit diuina Scriptura: sicuti terris nouis nostra memoria repertis vsu venisse videmus. Quæ idcirco quòd à nobis procul versus occiduas orbis partes recesserint, & auro plurimum abundauerint, vulgò iam *Indiæ* nomen inuenerint. Qui enim aliter statuunt ij multum à veritatis ratione abesse, nec iusta reprehensione caruisse mihi videntur, si iudicant sacram Scripturam Salomonis principatu, hoc verbo urbem, quæ id temporis nusquam esset, designasse. Quoniam verò recentiores Iudæi, in summa Geographicæ facultatis ignoratione, temporumque inscitia versantur, nec exterarum nationum historias attingunt, quòd temporum ordines, varietates, eorumque congruen-

gruentiam, disquirere & dijudicare valeant, quippè cum *Historia testis sit temporum*, & *nuntia vetustatis*, vt rectè iudicauit quidam, fit, vt varijs id genus imbuantur erroribus.

M. Tull.
2. de Orat.
ad Q. Fratrem.

Quod accidere nequaquàm potuit in hoc genere *Iosepho & Philoni*, in omni disciplina-
tum doctrina, & rerum multarum cogniti-
one versatis. Hanc Hieronymi & Septuagin-
ta interpretationem, nonnulli fortasse arri-
pientes, existimauerunt aliquandò *Cartha-*
ginem fuisse *Ophyram*, parùm attenden-
tes è quonam portu, quoue ex sinu classis
Salomonis eandem regionem petitura sol-
ueret. Sed nec attenderunt apud *Sofa-*
lam insulam, nullum pretiosarum gem-
marum genus, nullum argentum, nullos esse
pauones. Quæ omnia, ex *Ophyra* regione
præter aurum, etiam afferebantur. Id quod
Georgius Agricola animaduertisse visus est,
cum *Sofalam* *Ophyram* esse negauit, in libris
quos de *Veteribus & nouis metallis* compo-
suit. Atquæ tantum abest, vt *Tharsis*, Salomo-
nis tempore *Africam* significauerit, vt non
defuerit, qui hac tempestate, libros veteris
legis conuerterit ex Hebraicis, & vocabulum
Tharsis apud historiam Regum (tertio Re-
gum 9. & 10.) *Iudæorum mare* interpretaretur,
non autem *Indiæ oram*, integra re-

Georgius
Agricola.

manente historia *Ophyræ* regionis.

Nunc reliquum est, ut causas explicemus, cur in mentem venerit Sacræ historiæ, eam *Indiæ* regionem *Ophyræ* nuncupare. Quod si ea, quæ superius à nobis in hoc genere sunt disputata, diligentius attendamus, facile reperiemus ut supra diximus, moris esse sacræ Scripturæ, nomina eorum, qui terras primum incolere & habitare cœperunt, ipsis terris imponere. Sed cum huiusmodi nomina, parum cognita alijs nationibus fuerint, ut ipse similiter Iosephus animaduertisse visus est, propterea quod eis soli Iudæi vterentur, evenit, ut ob prædictorum nominum insolentiam, multa sacrorum librorum huius generis loca, maximè obscurarentur & magnam dubitationem afferrent. Quod si nonnulli Iudæorum viri doctissimi, qui aliarum gentium & exterarum nationum literas, historias, & monumenta, variasque artium disciplinas perceperunt, ex quibus extitere *hilon & Iosephus*, summa cum diligentia, non multa huiusmodi posteris explicata, literis tradidissent, quæ peculiari quadam cognitione indigebant, multò peius etiam nunc circa locorum huiusmodi abstrusorum intelligentiam hallucinaremur. Si autem recentiores Iudæi, more illorum (quos modo nominavi) clarorum virorum, literis Græcis & Latinis,

Ioseph. li.
i. Antiqui.
cap. 6.

Philo &
Iosephus.

Latinis ab ineunte ætate imbuerentur, reli-
 quasque, disciplinas attingere in animum in-
 ducerent, quò rerum ac temporum con-
 gruentiam intueri & intelligere possent, non
 esset sanè quòd in tantis ac tam deprauatis
 opinionum erroribus implicarentur. Nunc,
 cum præter Hebraicas literas, hasque sine vl-
 la Grammatices ratione, primoribus labris
 degustatas verius quàm perceptas, quippè à
 parentibus veluti tumultuariè traditas, nul-
 lum, nec literarum nec disciplinarum genus
 consequantur, quid aliud quàm labi, falli, &
 turpiter errare illis futurum putamus? Quod-
 que caput est, præterquàm quòd cum ipso
 nutricis lacte errorem sugere incipiunt, non
 modo ignoratione verè Religionis imbuun-
 tur, sed varijs, tum falsis, tum peruersis, &
 quãdoque ridiculis etiam opinionibus, poë-
 tarumque portentis similibus adhærescunt.
 Quarum plura quidem genera videre licet,
 cum apud multos benè doctos viros, à qui-
 bus aduersus Iudæorum peruicaciam plura
 sunt subtiliter & acerrimè disputata, tum vel
 maximè apud Petrum Gallatinum, bonum Petr. Ga-
 in primis auctorem, & Hebraicarum litera- latinus
 rum satis peritum. Adcò vt pudeat & mise-
 reat me infelicitis hominum conditionis in
 tot mentis cæcitates & animi prauitates im-
 meris. Iosephus igitur hunc locum è tene-

bris in lucem euocare videtur. Explicans enim in primo libro Iudaicarum Antiquitatum, quendam locum sacrorum librorum, satis docet unde nominis originem *Ophyræ* regio traxisse videatur. Quum enim diuina historia commemoret, temporibus Phaleg diuisionem fuisse terram, quamobrem hoc ei nomen inditum, quod diuisionem significat apud Hebræos, ita, *Natiue sunt Heber filij duo, nomen vni Phaleg, eo quod in diebus eius diuisa sit terra: & nomen fratris eius Iectan. Qui Iectan genuit Almoad, & Saleph, & Asarmoth, Iare, & Adonan, & Vzai, & Decla, & Hebat & Abimael, Saba, & Ophir & Heuila, & Iobab. Omnes isti filij Iectan. Et facta est habitatio eorum de Messa pergentibus vsque Sephar montem Orientalem.* Iosephus verò eadem in hunc modum narrat. *Heber autem iectan genuit & Phaleg. Dictus autem Phaleg, quoniam secundum diuisionem habitationum natus est, Phaleg autem diuisionem Hebræi vocant. Iectan verò, qui filius fuit Heber, habuit filios Helmodad, Saleph, Asarmoth, Iarach, Aduram, Vzai, Decla, Obal, Abimael, Saba, Ophyr, Euila, Iobab. Isti a flumine Casbina India, & posita circa eam Syriæ, loca quedam inhabitant.* Hæc Iosephus. De quo flumine qui Indum influit, frequens mentio fit apud Geographos. Quorum verba subiicienda duxi.

Ophyræ
unde dicit
Iosepho.

Genes. 11.

lib. 1. Ant.
tiqu c 6.
(alijs 14)

duximus, ad pleniorē rei cognitionem & intelligentiam. Nam Pomponius hæc profert. *Indus ex monte Paropamiso exortus, & alia quidē flumina admittit, sed clarissima Cophen, Acessinem, Hydaspem.* Plinij verò huiusmodi sunt. *A proximis Indogentibus montana Capissanæ habent Capissam urbem quam diruit Cyrus, Arabosia cum oppido & flumine eiusdem nominis. Quod quidē Cophen dixerē a semiramide conditum.* Et paulò inferius subiungit. *Flumen Cophes, influunt in eum navigabilia Sadarus, Parospus, Sodinus.* Strabo autem incidens in mentionem Alexandri in Indos expeditionis, de eodem fluuiō sic meminit. *Quare usdem montibus per vias breuiores exuperatus, reuersus est, habens Indiam à sinistris. Postea rursus in eam rediit ac occidentales eius fines, & Cophen flumen & Choaspem qui in Cophen immittit. Et paulò inferius. Post Cophen itaque Indus fluit. Regionem inter hæc duo flumina mediam habitant Astaceni, Mastiani, Nisei, &c.* Et Plinius iterum. *Ultimo fine Cophete fluuiō, quæ omnia Ariorum esse alijs placet. Nec non & Nysam urbem plerique Indiæ ascribunt. Quum igitur decem filiorum Iectani coloniar, partim in quædam Syriæ loca Indiam penè attingentia, partim, in illum Indiæ tractum quæ Cophe fluuiō irrigatur (ut Iosephus narrat) deductæ sint, & vnus ex eius*

Pompon.
mel. libr.
3 cap 7.

lib 6. nat.
hist. c. 23.

Strabo.

lib. 6. c. 21.
nat. hist.

filijs *Ophyr* nuncupatus fuerit, apparet ex hoc nomine, per interiores Indiæ partes pertinente, *Ophyræ* regionem esse nominatam, ut rectè existimauit Rabanus Maurus & Nicolaus Lyranus. Quoniam verò Heuilat frater

Phison
amnis est
Ganges
Indiæ flu.

*Ophyr*i, finitima *Ophyræ* regioni loca etiam incoluit, ideò Moles cum Indiam exprimere voluisset, quam inclytus amnis Ganges (*Phison* ab eo appellatus) vberrimis aquis interfuit: Hauilat nuncupauit. Et fluius (inquit) egrediebatur de loco voluptatus ad irrigandum Paradisum, qui inde diuiditur in quatuor capita, nomen vni *Phison*, ipse est qui circuit omnem terram *Heuilat*, vbi nascitur aurum. Et aurum terræ illius optimum est. Quam regionem Heu-

lib.1. An-
tiqu. c.1.

lat Iosephus Indiam interpretatur. Cuius hæc sunt verba: Rigatur autem hic hortus ab vno flumine circa omnem terram vndiquè profluente. Hic in quatuor diuiditur partes, & vni quidem nomen est *Phison*, quod inundationem significat: eductus in Indiam pelago diffunditur: qui *Gethi* nuncupatur à Græcis. Sed ne quis arbitretur hanc esse *Heuilat*, quam alio in loco

libr.1. An-
tiquit. c. 6.
(alijs 12.)

idem Iosephus dicit esse *Geruliam* Africæ prouinciam, ab Heuila Chusi filio nominatam, opus est ut duos fuisse eiusdem nominis intelligatur; hunc quem modo nominaui, alterum Iectani filium *Ophyr*i que fratrem, de quo nunc agimus. Quam dubitationem funditus

titus sustulit Iosephus, cum significauit flumen *Phisonem* apud Indiam in pelagus deducere. Et Indiam prouinciam à Mose *Heuilar* esse nuncupatam, præterquàm quòd ex ipsius verbis paulò antè recitatis liquidò dig-
noscitur, tum etiam ex *Commentarijs* diui Hieronymi de locis *Hebraicis*, quibus sic ait. *Heuilar* ubi aurum purissimum, quod *Hebraicè* dicitur *Zahab*. & gemmæ prætiosissimæ, carbun- culus, smaragdusque nascuntur. Est autem regio ad Orientem vergens, quam circuit de *Paradiso* *Phison* egrediens. Quem nostri mutato nomine *Gangem* vocant, sed & vnus de minoribus *Noe* *Heuilar* dictus est, quem Iosephus refert cum fratribus suis à flumine *Cophene* & regione *Indiæ* usque ad eum locum, qui appellatur *Ieria*, posse- disse. Et paulò post subiungit. *Messe* regio *Indiæ*, in qua habitauerunt filij *Iectan* filij *Heber*. *Sophera* vero mons *Orientalis* in *India*: iuxta quem etiam prædicti habitauerunt, quos Iosephus re- fert à *Copheno* flumine & *Indiæ* regionibus us- que ad eum locum peruenisse, ubi appellatur re- gio *Ieria*. Sed & *Classis* *Salomonis* per triennium hinc quædam commercia deportabat. Hæc ille. Intelleximus diui Hieronymi sententiam, etiam *Rabani Mauri* cognoscamus. ait enim: *Heuilar* regio est *Indiæ*, quæ post dilunium possessa ab *Heuilar*, filio *Iectan* filij *Heber* patriarchæ *Hebræorum*. In quorum sententiam discedit

Heuilar
Moyse est
India.

Hiero.

Hieronymus ab Oleastro, amplissimus Theologus in doctissimis Cōmentarijs, quos proximis annis edidit, in quinque libros Moyli, cuius etiam verba transcribere visum est, quæ huiusmodi sunt. *Alia est Chauilah, denominata à Chauilah filio Iectan filij Heber. Quæ quidem Chauilah etiam Orientalis est, quia ibidem dicitur fuisse habitatio filiorum Heber, à Mesah usque ad Sephar montem Orientis, quæ etiam auro abundat, cum sit propè Ophir. Nam Ophir, fuit frater Chauilah, ut ibidem dicitur. Hæc ille. Ex quibus omnibus intelleximus Iudæorum peculiare, regionum, fluminum, insularum, & maris appellationes, à Græcis & Latinis, ab alijsque aliarum nationum longè diuersas, easque à primis terrarum habitatoribus esse deductas. Tum etiam perspeximus Ophyrum & Heuilam fratres, ut Iosephus, ut diuus Hieronymus, ut alij quoque viri doctissimi (quorum modo mentio facta est) profitentur, Indiæ quasdam partes incoluisse, quas diuina historia ex more suo, eisdem duorum fratrum nominibus, Ophyram & Heuilam appellat. Quarum alteram Moses scribit aurum optimum gemmasque pretiosissimas producere: ex altera vero ingentem auri copiam Salomoni delatam, Iudæorum regum monumenta testantur, hasque finitimas esse,*

esse, & (vt paulò antè dixit diuus Hieronymus) ex quarum altera classis, Salomonis ^{3. Reg. 9.}
 per triennium quædam commercia depor- & 10.
 abat. Præterea Africam, consentientibus
 doctorem virorum testimonijs, apud He-
 bræos *Phut*, non *Tharsis* esse appellatam, &
 & *Ophyram* apud Indos esse etiã percepimus.
 Quid ergo amplius pertinaciter inharemus,
 inanissimis Iudæorum recentiorum opinionibus
 & deliramentis, eorumque lutulentos titulos
 consecramur, ex limpidissimis autem doctissimorum
 atque Orthodoxorum Patrum fontibus, haurire negligimus? Nec me mouent
 nouæ Augustini Eugubini in hunc locum
 interpretationes, noua nescio quæ flumina
 cõminiscentis, (quanquam aliàs hominis
 eruditionem & doctrinam suspicio &
 veneror, & quanquam cū illo mihi arctissima
 Romæ consuetudo intercessit, magis
 tamen amica veritas.) Quæquidem parum
 momenti (si rectè quis id perpendere voluerit)
 habere videntur, & quas non magni fuerit
 negocij conuincere. Nec me mouent vel
 sexcenti recentiores Iudæi nouis & deliris
 semper interpretationibus studentes, & noua
 sentia ab antiquis Orthodoxorum Patrum
 sententijs, longe abhorrentia, in diuinos libros
 architectantes. Quorum Iudæorum libri, integra mente & acri attentoque animo
 cuo-

Rabini
 cautè lo-
 gendi.

euoluantur oportet. Nam hinc, vt arbitror, iam eò processit hæreticorum quorundam hominum audacia, vt asserere nihil vereantur, etate diui Hieronymi non admodum vixisse, seu potius elanguisse Hebraicarum litterarum scientiam. Qui nihil aliud mihi visum est dicere, quum hæc dicunt, quàm diuum Hieronymum summis labris has literas attigisse. Quem vt (supra dixi) diuus Augustinus *peritissimum in hoc genere*, cum summa testificatione laudum ipsius fuisse dicit. Et quæ doctissimi Iudæorum eius temporis profitebantur, sacros libros veteris legis, summo animi iudicio & syncerissima interpretatione conuertisse. Sed prohi Deum immortalem, quid hoc est si mera insania non est? Ad cōne esse homines imperitos quibus tanta sit innata vecordia, vt antiquos illos Ecclesiæ Patres, (diuino spiritu sine controuersia affatos, atque ad exprimenda vera diuinorum librorum sensa, à Deo Optimo Maximo nobis velut dono datos) dicere audeant hallucinatos esse in enodandis quibusdam Prophetarum intelligentijs, nec præcipua & germana illa sensa, quæ in illis locis ipsi præstulerunt Prophetæ attigisse. Quibus Prophetarum locis, ad Christianum dogma maxime confirmandum appositis, & eodem sensu enodatis, posteris temporibus Ecclesiæ pro-

D. Hiero.
peritia lin-
guæ san-
ctæ.

acerti-

acerrimo telo vſa ſit, ad infringendam multorum hereticorum peruicaciam? Quid dici poteſt infanlius? aut quid iſti omnium hominum ſuperbiſſimi aliud perſuadere videntur, quàm ea ſe (ſi dijs placet) aſſecutos eſſe, quæ magni & ſapientes illi viui ne deguſtarunt quidem?


Verùm hæc nos in aliud tempus, in alium- Epilogus.
que locum differamus, ad propoſitumq; reuertamur. Perſpectis tot, tantorumque Patrũ testimonijs & auctoritatibus, nemini opinor, iam dubium & controuerſum erit, *Ophyram* regionem apud Indiam eſſe, ab *Ophyro*que Iectani filio denominatam & *Tharſis* vocabulũ eſſe homonymum, vt aſſerit Diuus Hieronymus ad Marcellam, propterea quod & *mare* & *locum Indiæ* ſignificet. Hanc igitur rationẽ habet Diui Hieronymi, Flauij Iosephi, aliorumque ſententia, circa regionem *Ophyram*, quam apud Indos eſſe, vt diximus, ſtatuunt.

Nunc excutienda ſunt quæ literis mandauit nobiliſſimus & clariſſ. Theologus Cardinalis Gaictanus, non de *ophyra* regione, quã prorsus ignorare ſe ingenuè fatetur, ſed de curſu quem classiſ Regiſ Hiræ teneret, cùm ad classi ſe coniungendum Salomonis, ſolueret è portu, vt vnà peterent eandem regionẽ. Thomæ
Caictani
opinio.
De nominibus (inquit) proprijs, quæ hic ſcribuntur, reddere certam rationem neſcio, hoc tamen certum

certum est, quod Salomonis tum scientiæ tum providentiæ attestatur constructio & missio navis in Ophir pro auro. Et in secundo Paralipomenon capite octavo isthæc dicit. Salomoni siquidem fecit propriam classem in illo mari. Rex autem Tyri misit naues suas ad serviendum Salomoni, simul cum proprijs naubus Salomonis. (Et ierunt cum servis Salomonis in Ophir) Regio Indiæ dicitur. Reliqua vide exposita rebus Regum nono: adueriendū duo. Alterum, quod quia navigatio in Ophir per mare Oceanum erat, ideo Salomon ad evitandam navigationem per mare Mediterraneum usque ad Oceanum, perrexit ad oram maris Rubri, (quod est quidam finis maris Oceani) & ibi construxit classem, ad hoc enim illuc iuit. Alterum, quod rex Tyri naues quas misit, non nisi per Mediterraneum mare mittere ex Tyro potuit, ad coniungendum illas cum naubus Salomonis. Hæc ille. Quam rem rectè quidem iudicavit vir doctissimus. Quis enim non in eiusmodi causâ? Nam qui fieri posset, ut naues à Tyro soluentes aliter in sinum Atlanticum pergerent, quam per stratum Herculeum in Oceanum Atlanticum exeuntes, totamque oram Africae & Æthiopiæ permeantes, magnum illud Bonam Spem promontorium transgredirentur, atque inde recto cursu aliud Arabiae promontorium, olim Saramatam, nunc autem

Guardasum nominatum petentes, tandem angustias Rubri maris ingrederentur? Sed præterquàm quòd hæc nauigatio tunc temporis omninò incognita erat (vt sæpè iam diximus) multò facilius à rege Tyri id perfici poterat, & minore, cùm temporis tum rei familiaris suæ dispendio, & tandem expeditiore via, si materia dolata, ex qua naues ædificari solent, camelis & alijs iumentis, superato isthmo inter illa duo maria interiecto, *Afiongaberum* deportaretur, (sicut olim fieri consuetum est à Sultanis Ægypti, nunc autem à Turcarum Regibus, quodocunque classes, quas illic habent, reficere, seu novas ædificare vsus est,) quàm tantam maris vastitatem transmittere, vt cum Salomonis classe coniungeretur. Sed ea persuasio fortè literatissimū virum fefellit putantem, regis Hiræ classē è Tyro (ad oram nostri maris posita) in Indiam solitam nauigare. Cum enim legeret hæc verba sacræ historiæ. *Tunc abiit Salomon* 2. Paralip. 8. 17.
in Afiongaber & in Ailath, ad oram maris Rubri, quæ est in terra Edom. Misit ergo ei Hiram
per manus seruorum suorum naues & nautas gnaros maris, & abierunt, &c. Fortè non videbatur illi, cum Salomon ageret apud maritima loca maris Rubri superius memorata, rectè significasse diuinam historiam, Regem Hiram ad illum misisse naues & nautas suos,

si in eodem quoque mari id temporis esset
 Hirę regis classis. Quare rem parum videtur
 perpendisse tanti nominis Theologus. Nam
 quę apud Alexandriam in nostro mari sunt
 naues, quis verat quin Carthaginem mittan-
 tur, atque hinc Vticam seu Hipponem Re-
 gium, quę oppida in locis maritimis eius-
 dem maris sunt posita? Cum Carolus quin-
 tus Romanorum imperator Tunnetum op-
 pidum obsidet, naues quę à Neapoli cum
 com meatibus, reliquisque id genus bellici
 apparatus, eò mittuntur, nonne ad portus
 eiusdem maris mittuntur? quis hoc audeat
 inficiari? Verum hæc tot verbis persequi non
 est necesse, cum sint in promptu. Porro quę
 ad oppidorum *Ailanzę & Afiongaberi* cogni-
 tionem, & notitiam pertinent, eis, quoniam
 in quibusdam nostris Geographicis Obser-
 uationibus mox in lucem prodituris, à nobis
 sunt multis verbis disputata, in præsentia su-
 perlegendum duximus. Sed hæc in mentem
 mihi venerunt, de *Ophyra* regione quę dice-
 rem.



F I N I S .

DE OPHIRA REGIONE
ABRAHAMVS ORTELIVS
IN THESAVRO GEOGRAPHICO.

OPHYR regio aurifera, in sacris litteris celebris, vnde Salomoni, alijsque Hebraeorum Regibus, ternis annis (vti 3 Reg. 9. & 2. Paral. cap. 9. habetur) magna vis anni adhibebatur. Sed vbi terrarum hæc regio sita sit, & an alio etiam nomine cognita esset, hæcenus ignoratū fuit. $\sigma\acute{o}\phi\epsilon\iota\pi\alpha$, & $\sigma\omicron\upsilon\phi\upsilon\rho$, legunt LXX. interpretes. Iosephus eam in India ponit: & TERRAM AVREAM $\chi\epsilon\upsilon\sigma\eta\nu\ \gamma\eta\nu$ suo tempore vocatam addit Eupolemus auctor apud Eusebium lib. 9. cap. 4. Præparationis Evangelicæ, $\nu\epsilon\rho\rho\eta\epsilon\nu$ appellat, & dicit insulam Maris Rubri esse, nauesque cogi solere Melanis, Arabiæ vrbe (Hesion Gâber, hanc vocat Sacra Scriptura: cū Epiphanius *Adon* dici in sacris litteris prodat.) Hinc Marius Niger cā AVREAM CHERSONESVM Ptolomei interpretatus est, non parum enim ad *terram auream* alludit; & Rubri Maris nomen huc vsque pertingere, ex classicis auctoribus doceri potest. Sed hâc Chersonesum, auri diuitem olim fuisse, nemo veterum, quod sciam auctor est, neque nunc etiam esse, ex recentioribus palam est. Edidit tamen Gaspar Varrerius Lusitanus

nuper peculiare opusculum, de *Ophyrâ regione*: in quo constanter asseuerare multisque argumentis persuadere conatur, Sacre Scripturæ *Ophyrâ*, esse auream Cherisonesum: aut potius omnem eam oram quæ Pegusis, Malaca & Somatra continetur. In Biblijs Vatabli à Rob. Stephano excusis, pro *Hispaniola*, Noui Orbis insula habetur. Postello autem *Peru* videtur: cui suffragatur doctissimus Goropius in sua Hispania. Idem affirmat Ben. Arias Montanus, cuius viri sententiam non solum ob multiplices eius virtutes, quibus à natura abunde ornatus, sed ob omnis generis doctrinæ solidam peritiâ, multarumque linguarum cognitionem admirabilem, libenter amplecterer, nisi deterreret me ab ea vastus ille Oceanus intermedius, quem omnis antiquitas innauigabilem, atque à mortalibus, quia sacrum Diuûmque sedem existimaret, navigatione minimè violandum, (vt docet apud Senecam Peto Albinouanus) credidit. Neque apud vllum veterem auctorem reperies, ab vlllo mortalium ante repertum magnetis lapidis vsum, (quem nuperum habemus) vnquam tētatum, nec immeritò. Neminem hoc enim potuisse vel posse, norunt, intelliguntque qui nauigant omnes. Casu forte aut felicitate hoc aliquando euenisse, vt credam, facit Plutarchus in Sertorio: At consilio

filio aut scientia hunc ab illo traiectum, nulla
apud priscos siue sacros siue prophanos scrip-
tores memoria. Circa littora autem nauigatū
sæpius testes exstant tot antiquorum Græco-
rum Pericli : vt Hannonis, Arriani, Iasonis
Nearchi: & qui temporis iniuria intercidere,
Etesia, Menippi, Marcelli, Alexandri Theo-
phili. &c. Ego Ophyr *Cephalam* vel vt alij pro-
nunciant *Sofalam* Africae versus Orientē re-
gionem interpretari cū Volaterrano malim,
tum quod hæc, teste grauissimo Io. Barroso,
admodum aurifera sit, adeo vt etiamnum ni-
hil præter aurum, vt Lusitanorum testantur
peregrinationes, exteris mercatoribus cōmu-
nicet: Tū quod scribat in sua Indica nauiga-
tione Thom. Lopesius, hos Sofalēses habere
libros patria lingua scriptos, in quibus legitur
Salomonē regē tertio quoq; anno hinc aurū
tulisse. Ex Ophir etiā, ebur habuisse Salomo-
nē sacrae referunt litteræ. atque hoc nō ex Pe-
ruiana regione, vbi nullus vnquam elephas.
Pro Ophir, *Ophath* *ὄφαρ* legit Ioā. Tzetza, &
insulā, siue pæninfulā auream in India esse di-
cit. De Ophir adde quod habet Iosephus à
Costa. Societ. Iesu li. i. c. 14. de natura Noui
Orbis. vbi Ophir Indiā Orientalē, cū Iosepho
Iudæo, interpretatur. VPHAS locus vnde aurū
adfertur, Hierem. 10. MOPHAS legunt LXX.
OPHI autē D. Hieronymus & Chaldaeus.

DE PARADISO IDEM.

In tabula.
Geogra-
phicæ sacræ

DE *Paradiso* magna quoque inter Theologos controuersia. Maxima pars hunc in Oriente statuit, alij in Syria; Postellus sub polo Arctico. Sūt qui sub Æquinoctiali fuisse conijciant. Goropio nostro apud Indoscytas esse multis argumentis persuadetur. Ex veteribus quidam Lunarem globum pertingere tradunt: alij alibi. Cælius Nazianzeni frater, in Dialogis vbi hunc collocarit ignoro. Danubium enim hic vnum ex huius fluminibus facit: eum nempe, quem Sacra vetustas *Phison* nominat. Hunc vero D. Hieronymus & Eusebius *Nilum* interpretantur, alij *Gangem*. Sed addam quoque D. Augustini ad Manichæos hoc, *Beatam vitam Paradisi nomine significatam existimo*. Alij recentiores qui ex professo de situ huius scripsere, sunt Moses Bar Cephæ, Benedictus Pererius Societatis Iesu in Genesim; Ioannes Hopkinson peculiari libello, in quo & huius Chorographica delineatio. Alij quoque, vt Beroaldus, in Chronico, Vadianus in trium orbis partium descriptione; item Ludouicus Nugarola in libello de Timotheo, siue Nilo. Ego vero Paradisum vbique fuisse puto, ante Adami nempe lapsum; & non locum significare, sed loci naturam, siue qualitatem.

F I N I S.


Errata quædam in Hebræis, nam quæ in Græ-
cis & latinis commissa, facile quiuis
obseruabit.

Pag. 10. lin. vlt. post Scealthiel omissum בן.
pag. 15. lin. 9. à fin. literæ non satis benè separata,
& ideo duæ voces in vnam coaluerunt, & aliæ
nimis propinquæ vnam vocem ex duabus fecere,
& in vltima voce caph pro resch positum. pag.
28. lin. 2. à fin. עביר corr. צגיר. pag. 40. lin. antepe.
בסנהדרין tertia à fine litera ponatur resch. &
lin. vlt. לה transponatur לה. pag. 56. lin. 12. in
tertia vucula dalet positum pro resch. pag. 63.
lin. 5. à fin. מירם litt. transpositæ pro מרים. pag.
207. in margine Ophyra insula, corr. Sofala insula.

Hos tres libellos dignos censeo
qui recudantur:

*Guiliel. Fabricius Nouiomagus,
Apostolicus ac Archiducalis
Librorum Censor.*





A Rev. 78/4/12



UNIVERSIDAD DE SEVILLA



601079267

18682306

